

Dill' wen dill' kob daa bzej Lúcaza'

Dga bzej Lúcaza' na' bseleen lao Teófilona'

¹ Ben' zan ba goklall'gake' wzejgake' to to diika' ba gok ladjnto'ni ² kon ka wna ben'ka' bli' bsemi neto', ben'ka' ble'gakile' daa gok dezd nech na' gok lo na'gake' be'gake'n dill'. ³ Na' ka'kz nad', ba wñabyoll' nakyen'an gok dezd nech. Na' chakid' nakan wen wzej' li', Teófilo, kon ka gok to to diiki, ⁴ kwenche inezilo' daa ba bli' bsemi'gakile' li' nakan dowalj dii li.

Wdixjee anjla' galj Juanna'

⁵ Kana' chñabia' rey Heródeza' gana' mbani Judeana' wzoa to ben' wlie' Zacarías, goke' toz bñozka' nonlen dii Abíaza'. Na' xoole', Elizabeta', lekzka' goke' xiin dia che dii bñoz Aaronna'. ⁶ Na' chop xooltie' chongake' wen lao Chioza', na' chongake' yog'lolte daa nllie' bia'. ⁷ Na' aga no xiingake' wzoa daa nak Elizabeta' nool will; na' ba nakte-gake' ben' gol.

⁸ Na' to shii ka bidol' bñozka' nak Zacaríaza' txen gongake' xshin Chioza' daa nak lo na'gake', ⁹ bengake' to wyitj, ka yoologake' chongake', kwenche got'bia' noe' yidol' lljlo' llen yala' loo lill xlatj Xancho Chioza'. Na' bidol' Zacaríaza' gone'n. ¹⁰ Na' shlak chgwee llen yala' loo yoodo'na', ben' zan bgaan chyoolə choe'llwillgake' Chioza'. ¹¹ Na' bli'lao to anjl che Xancho Chioza' Zacaríaza', na' anjla' zie' shlaa de shlina' gana' chzeygake' yala'.

¹² Ka ble'i Zacaríaza' anjla', bikzə bi billet-lallee gone' daa le bllēbe'. ¹³ Na' anjla' chi'ene':

—Bi illebo' Zacarías, la' Chioza' ba bzenague' daa chñabilo'ne', na' xoolo' Elizabeta' sane' to xiino' na' wsi'ob' Juan. ¹⁴ Na' yibachgailo' kat' galjb', na' lekzka' beñ' zan yibayi, ¹⁵ la' xiino'na' gakb' to beñ' zakii lao Chioza'. Bi chiyal' wnixb' vino wa bichlə dii gonan ka sollib', na' Espíritu Sántona' soloe' inabi'e yichjlall'do'baa ka zi' galjləb'. ¹⁶ Na' yigoob' beñ' zan xiin dia che Israela' lo xnez Chioza', beena' nak Xangake'. ¹⁷ Na' kwialob' lao Xanchona', na' soalen Espíritu che Chioza' leb' ka wzoalene' Elíaza', na' gapb' ye'l' wak ka daa wdape'. Na' ye'b' beñ'ka' bi zoalen xiine'ka' wen, yizoagake' mbalaz. Na' gom' ka wzenag beñ'ka' bi cheeni wzenaggake' dill' sin' che beñ'ka' zej shli lao Chioza'. Na' diikin gom' kwenche kat' za' Xanchona' na' gonlilall'gake'ne'.

¹⁸ Na'ch che' Zacaríaza' anjla':

—¿Nakra gak inezid' shi lekzilo'n?, la' ba nak' beñ' gol na' lekzka' nool cha'na'.

¹⁹ Na'ch che' anjla'ne':

—Nadaan anjl Gabriela', na' chon' xshin Chioza', na' kwine' bselee nad' kwenche zaa zidnia' li' dill' wenni. ²⁰ Na' daa bi wyajli'o daa wnia' li', idap shi'ona'. Bich gak inio' axt kat'ch illin lla gak yog' dga ba wnia' li'.

²¹ Na' beñ'ka' lle' chyoolə chbezgake' yichej Zacaríaza', goklejjgakile' daa wllaile' loo yoodo'na'.

²² Na' ka bicheje' bich chak inie', senzə chone', na' gokbe'gakile' nan nochodan' bli'lao le' loo yoodo'na'.

²³ Na' ka biyoll ben Zacaríaza' daa llia bia' gone' yoodo'na', na'ch biyaje' lille'na'. ²⁴ Na' ka wde gok diiki, na' bia' xoole', Elizabeta'. Na' lao gay' beo' bichkzə ga bcheje', na' wne': ²⁵ “Xancho Chioza' ba goklene' nad' kwenche bich sia' yel' zto' lao ben'.”

Wdixjee anjla' galj Jesús'a'

²⁶ Na' ka gok xop beo' noa' Elizabeta', bsel' Chioza' anjla' le Gabriel yella' le Nazaret daa llia gana' mbani Galileana', ²⁷ gana' zoa to nool wew' lie' María. Na' Maríana' ba nakan wshagna'lene' to ben' le José, na' Joséna' nake' xiin dia che dii rey Davina'. ²⁸ Na' wyoo anjla' gana' zoa Maríana' na' chi'ene':

—¡Chwap' li' chiox, nool, ben' ba goklen Chioza' kwenche gak dii wen cho'! Xanchona' zoalene' li', na' ba benleeyche' li' aga ka yog'lo'lte nool.

²⁹ Na' Maríana' bibanile' daa golle'ne' ka', na' gokile' berache naz beeni nad' ka'. ³⁰ Na' che' anjla' le':

—Bi illebo' María, la' Chioza' ba wleje' li' kwenche gone' to dii wen cho'. ³¹ Na' naa woo to bdo' na' kat' galjb' na' wsi'ob' Jesús. ³² Na' gakb' to ben' zakii na' ye'gake'b' Xiin Chios, beena' nak liizelozi ben' choo ben' xen. Na' Xancho Chioza' gone'b' to ben' wñabia' ka dii xoxzto'b' Davina' ³³ kwenche toshiizi inabia'b' le' ben' Israel, le' nakle xiin dia che dii Jacoba', na' yel' wñabia' che'baa bi yiyoll yidon.

³⁴ Na'ch wñabi Maríana' anjla', chi'ene':

—¿Nakra gakz wa', lla?, la' aga no ben' byo zoalen'.

³⁵ Na'ch che' anjla' le':

—Espíritu Sántona' yidsoalene' li', na' yel' wak che Chioza', beena' nak liizelozi ben' choo ben' xen, soalenan li'. Na' bi'do'na' galj gakb' lall' na' Chioza' na' ye'gake'b' Xiin Chios. ³⁶ Lekzka' dialla cho' Elizabeta' ba no'e, la'kzi ba nake' ben' gol. Na' la'kzi chaki ben' nake' nool will, ba gok xop beo' no'e. ³⁷ Aga bi de dii bi chak gon Chioza'.

³⁸ Na'ch che' Maríana' anjla':

—Xmos Xancho Chiozan' nak', na' wak gone' cha' kon ka ba wno'.

Na' biza' anjla' gana' zoa Maríana'.

Jawia Maríana' Elizabeta'

³⁹ Na' lii wza'te Maríana' wyaje' to yell dii lia yaa yao che Judeana'. ⁴⁰ Na' blline' lill Zacaríaza' na' bwape' Elizabeta' chiox. ⁴¹ Na' ka bwap Maríana' le' chiox, gokbe'i Elizabeta' bxit' bdo'na' loo li'ena'. Na' wzolo wñabia' Espíritu Sántona' loo yichjlall'do'ena', ⁴² na' wñie' zillj, chi'ene':

—Chioza' ba benleeyche' li' ladj yog'lol' nool, na' lekzka' bdo' cho'na'. ⁴³ ¿Nora nak' nad' zidwia'zə xna' Xan'na' nad', lla? ⁴⁴ La' kon ka bwapo' nad' chiox, lii bxit'te bdo' cha'ni loo li'ani daa chibaib'. ⁴⁵ Chakomba li' wyajli'o ka wna anjla', la' yog' daa wna Xanchona', aga wde bi gakan.

⁴⁶ Na'ch wna Maríana':

Do yichj do lallaa choe'lawaa Xancho Chioza'.

⁴⁷ Chibayi yichjlall'dawaani lao Chioza', beena' chisla nad'.

⁴⁸ Ba biyesh'lallile' nad' nak' xmose',
naa solo yog' ben' ine' nad': “Chakomba li'.”

⁴⁹ La' Chioza', beena' nap yel' wak choo yel' wak xen, ba bene' dii wen inleeb cha'.

Nake' liizelozi ben' li ben' shao',

50 na' chiyesh'lallile' yog'te beṅ'ka' chall chlleb-gake'ne'.

51 Dii zakii nleeb ba benlene' yeḷ' wak che'na'.
Ba b̄chinj bselle' yog'l̄ol̄ daa nan gon beṅ'ka' chep cha'lall'.

52 Ba bikwase' yeḷ' wṅabia' che beṅ' wṅabia'ka',
na' beṅ'ka' ble'gakile' nakzi, Chioza' ba bene' ḷegake' beṅ' zakii.

53 Na' beṅ'ka' chbiḷ chdon, ba bzesh bzeljile' ḷegake'
kon dii wen dii shao' che'na',
na' bilague' beṅ' wni'aka' to ka cha'gake'.

54 Ba goklene' cho' beṅ' Israel, cho' nakcho xmose',
na' toshiizi chiyesh'lallile' cho',

55 kon ka b̄chebe' gone' che dii x̄ozxto'cho Abra-
hama'
na' yog' beṅ' zizaak lo dia che'na'.

56 Na' Maríana' bgaane' ka do shoṅ beo' lill Eliza-
beta', na'ch bizee ziyaje' lille'na'.

Golj Juanna'

57 Na' ka bllin lla wxan Elizabeta', wxane' to bi' byodo'. 58 Na'ch ka w̄nezi beṅ' wlill che'ka' na' beṅ' dialla che'ka', wyajgake' bibalengakile'ne' daa ba biyeshii X̄ancho Chioza' le'. 59 Na' ka gokib' to xman, j̄loogake'b' seṅ daa ne' circuncisión, na' gok-lall'gake' wsi'gake'b' Zacarías ka le x̄abaa. 60 Na' che' x̄na'baa:

—¡Bi gakan! Juanan chiyaḷ' wsi'nto'b'.

61 Na' gollgake'ne':

—¿Biḷe wsi'zo'b' ka? ḷa' aga no dialla cho' le ka'.

62 Na'ch bengake' seṅ kwenche wṅabgakile' x̄abaa bi cheenile' wsi'e bdo'na'. 63 Na'ch wṅabe' to yagla'do' kwenche bzeje'n, na' daa bzeje' nan:

“Juanan wsi'nto'b'.” Na' yog' beṇ'ka' bibani. ⁶⁴ Na' lii gokte biṇe Zacaríaza', na'ch wzoloe' choe'lawee Chioza'. ⁶⁵ Na' beṇ' wllill che'ka' bblebgake' ka nak daa gok, na' yog' yellka' lle' ladj yaa yao che Judeana' wze dill' ka gok. ⁶⁶ Na' yog' beṇ'ka' beni ka gok, gogkatile':

—¿Noran gak bi'do'ni, lla?

Wnagake' ka', la' nakbia' zoalen Xancho Chioza' leb'.

Daa wna Zacaríaza'

⁶⁷ Na' Espíritu Sántona' wṇabi'e yichjlall'do' xab' Zacaríaza' na' bi'e cho'a xtil' Chioza', wne':

⁶⁸ Choe'lawaa Xanchona', beena' nak Chios checho, cho' beṇ' Israel, la' ba bide' ladjchoni, cho' nakcho beṇ' yell che', kwenche yisle' cho' lawi dii mala'.

⁶⁹ Na' ba bselee to beṇ' nap ye' wak xen yisle' cho', na' zee lo dia che dii Davina', beena' gok xmose'.

⁷⁰ Ba chak ka bchebe' gone' kani'yi daa golle' dii beṇ'ka' wdixjee cho'a xtilleena', beṇ'ka' gok lall' nee.

⁷¹ Bchebe' yisle' cho' lao beṇ'ka' bi chle'shii cho', na' lao yog' beṇ'ka' chakzi' chakzbani cho'.

⁷² Na' golle' dii xozxto'choka' yiyeshile' legake', na' bi gal-lallee ka nak diika' bchebe' gone'.

⁷³ Ki nak daa bcheb Chioza' gone' che dii xozxto'cho Abrahama':

⁷⁴ Bchebe' yisle' cho' lao beṇ'ka' bi chle'shii cho' kwenche we'la'ochone' na' bibi wwall wsheban cho',

⁷⁵ na' gon kwincho lall' nee na' goncho ka yiyoolallile' shlak mbancho.

⁷⁶ Na'ch Zacaríaza' chi'e bdo' che'na':

Na' li', xiindawaa, ina ben' li' ben' chyixjee daa na Chioza', beena' nak liizelozi ben' choo ben' xen.

Na' kwialozego' lao Xanchona' kwenche wzenagake' che' kat' zee.

77 Wzenilo' ben' wlall chechoka' daa chiya' gongake'

kwenche yizi'xen Chioza' saaxya che'ka' na' yisle' legake' bi tegake' lo yel' zak'zi'na'.

78 La' Chios chechona' chakile' cho' na' chiyesh'lallile' cho',

na' wselee to ben' za' yabana' nsee to beeni' che yichjall'do' ben' yell-lioni

79 kwenche sho' beeni'na' loo yichjall'do' ben'ka' chda gani nak shgasj shcho' ni che dii mala' daa nsa' yel' wit,

na' wliile' cho' nez li che'na' na' soacho mbalaz.

80 Shlak bgol Juanna', ben Chioza'ne' ben' wal. Na' wzoe' to latj gana' bibi chashj chleb axt ka bllin lla wzoloe' be'lene' ben' Israelka' cho'a xtill' Chioza'.

2

Golj Jesúza'

(Mt. 1:18-25)

1 Kana' chñabia' César Augústoná', bene' byen ibab bal' ben' lle' to to yell doxen yell-liona' gana' chñabi'e. 2 Na' ka wbagake' dii nech, beena' le Cirenio nake' gobernador che Síriana'. 3 Na' benan byen biyaj yog' ben' yell che chegake' kwenche jada' lie'ka'. 4 Na' daa nak Joséna' xiin dia che dii Davina', bizee yell Nazareta' daa lliá gana' mbani Galileana', na' biyaje' yell Belénna' gana'

golj dii Davina', daa lliá gana' mbani Judeana'.
⁵ Na' kwenche ibabgake' biyaje' yell Belénna' len
 Maríana', beena' ba nakan ikee. Na' Maríana'
 ba no'e. ⁶ Na' shlak zoagake' Belénna', bllin lla
 sane'. ⁷ Na' wxane' to bi' byodo' nakb' bi' nech, na'
 btobe'b' lechaa na' wdixje'b' gana' chao bayix'ka',
 la' bich bi latj blllel gana' chigaan ben'.

Jtixje'i anjla' ben'ka' chap xil'ka' ba golj Jesúza'

⁸ Na' lle'na' goljb', gaozə yell Belénna' lle' xonj
 ben' chapgake' xil' che'ka'. ⁹ Na' gokxe to anjl
 che Xancho Chioza', na' yel' chey cheeni' che
 Xanchona' bzeeni'n gana' lle'gake', na' le bllleb-
 gake'. ¹⁰ Na' che' anjla' legake':

—Bi illeble, la' ziditixje'id' le' dill' wen dill' koba'
 daa gonan ka yibachgayi yog' ben'. ¹¹ La' naa
 yell che dii Davina' ba golj beena' yisla le' lao dii
 mala'. Na' len' Xancho Crístona', beena' chbezle
 wsel' Chioza'. ¹² Na' kwenche yillelileb', ki nak
 gana' deb': deb' gana' chao bayix'ka' na' ndobb'
 lech'.

¹³ Na' ka biyoll goll anjla' ka', lii bllinte anjl zanch
 kwite'na', na' choe'la'ogake' Chioza', nagake':

¹⁴ ¡We'la'ocho Chioza' zoa yabana'!

Mbalaz ben'ka' zoa yell-lioni, ben'ka' ba bli'yi
 Chioza' yel' goklen che'na'.

¹⁵ Na' ka biza' anjlka' ziyajgake' yabana', na'ch
 che' ljjwell ben'ka' chap xil'ka':

—Li yidoshki Belénna', li sho' diwiashki daa ba
 gok, daa ba wdixje'i anjl che Xanchona' cho'.

¹⁶ Na'ch ziyajdogake' Belénna' na' bllingake'
 gana' zoa Maríana' len Joséna', na' bdo'na' deb'
 gana' chao bayix'ka'. ¹⁷ Na' ka biyoll ble'gakile'b',

na' be'gake' dill' lao ben' wlall che'ka' daa goll anjla' legake' che bdo'na'. ¹⁸ Na' yog' ben'ka' beni ka wna wap xil'ka' bibangakile' ka dillaa be'gake'. ¹⁹ Na' Maríana' kon ka biyoll bzenague' dill'ka' na' bgaanan loo yichjall'do'ena', na' gokile' bera zejin dga. ²⁰ Na'ch ziyaj wap xil'ka' choe'la'ogake' Chioza' daa ba ben ble'gakile' yog' daa goll anjla' legake'.

Jwa'gake' Jesúza' yoodo'na'

²¹ Na' ka gokib' to xman, wloogake'b' sen daa le circuncisión, na' bsi'gake'b' Jesús kon ka goll anjla' Maríana' kana' zi' weeb'.

²² Na' kon ka na ley che dii Moiséza' gongake', wlezgake' ka bzaa llaka' bixi biyech Maríana' len bdo' che'na', na'ch wyajlengake'b' Jerusalénna' kwenche jengake'b' lo na' Xancho Chioza'. ²³ Bengake' ka', la' ley che Xanchona' nan: “Bi' byo nech che yog'lol ben', chiyal' gongake'b' lo na' Chioza'.” ²⁴ Na' jaake' je'la'ogake' Xancho Chioza' jengake' ka na leya' daa nan chiyal' witgake' chop golbex wa chop palom.

²⁵ Na' kana' jwa'gake' Jesúza' yoodo'na', zoa to ben' le Simeón Jerusalénna'. Nake' to ben' chon dii wen dii shao' na' choe'lawee Chioza', na' chbeze' batan wsel' Chioza' beena' gaklene' ben' Israelka'. Na' zoalen Espíritu Santo che Chioza' le'. ²⁶ Na' Espíritu Sántona' ba bzenile'ne' nan aga wete' shi bin' ile'ile' Crístona', beena' chbez-gake' wsel' Xancho Chioza' kwenche inabi'e. ²⁷ Na' Espíritu Sántona'kz bseleene' yoodo'na', na' na' zie'

ka bllinlen xaxna' Jesúsza' leb' kwenche gongak-
ile'b' ka na leya'. ²⁸ Na'ch b̄len Simeónna' leb' na'
be'lawee Chioza', chi'e:

²⁹ Chios cha', be' latj guet' mbalaz naa,
la' ba beno' daa b̄chebo' gono' cha', nad' nak'
xmoso'.

³⁰ La' ba ble'id' beena' yisla neto',

³¹ beena' ba bseloo lao yog'lol̄ ben' yell-lioki.

³² Len' kwee beeni'na' loo yichjall'do' ben'ka' bi
nakgake' ben' Israel.

Na' gone' ka neto' ben' Israel sho'nto' balaan, neto'
naknto' yell cho'.

³³ Na'ch Joséna' len xna'ba bibangakile' ka
nak daa wna Simeónna' cheb'. ³⁴ Na'ch wnabi
Simeónna' Chioza' gaklene' legake', na' chi'e
Maríana', xna' Jesúsza':

—Ba n̄chogbi'a Chioza' che bi'do'ni gom'
kwenche zan ben' Israelka' kwiayi'gake' na' lekzka'
zane' yila. Na' wliib' ben' ka nak yel' wak che
Chioza', na' ben' zan inegake' zban cheb' na' bi
shajle'gake' cheb', ³⁵ na'ch gakbia' ka chza'lall'
ben' loo yichjall'do'eka'. Na' ka nako' li', loo
yichjall'do'na' gakan ka'kzə ga chaz to spad ka
ile'ilo' daa illaglob'.

³⁶ Na' lekzka' yoodo'na' zoa to nool goldo', ben'
chyixjee daa che' Chioza'ne', na' lie' Ana. Nake'
xiin̄ dii Fanuela' na' xiin̄ dia che dii Asera'. Ben'
xkwid'ze' bshagnee, na' gall yizchga wzoalene'
ben' che'na' ka wite'. ³⁷ Nake' noolə wizeb na' ba
gokile' taplalj tap yiz. Na' toshiizi zoe' yoodo'na',
na' ka wal̄ ka tella zoe' choe'lawee Chioza', na'
tlizi chzoe' wbas' na' choe'lwille'ne'. ³⁸ Na' lekzka'
wbiguee kwite'ka' na' bi'e Chioza' yel' choxken daa

ba bselee beena' gaklene' ben' Israelka'. Na' bi'e dill' che Jesúza' lao ben' Jerusalénka', ben'ka' chbez wsel' Chioza' beena' yisla legake' lao dii mala'.

Biyajgake' Nazareta'

³⁹ Na' ka biyoll bengake' yog' daa nllia ley che Xancho Chioza' bia', na'ch biyajgake' lalle'ka' daa le Nazaret daa llia gana' mbani Galileana'. ⁴⁰ Na' Jesúza' bgolb' na' zejch gokb' bi' wal na' bi' sin', na' le goklen Chioza' leb'.

Jesúza' jashaljlem' ben' sin'ka' yoodo'na'

⁴¹ Xaxna' Jesúza' chajgake' Jerusalénna' yog' yiz kat' chal' lni Paskwa'. ⁴² Na' ka goki Jesúza' shllin yiz, wyajlengake'b' lnina' kon ka yoologake'. ⁴³ Na' ka wde lnina' biza' xaxna'baa, na' bi gokbe'gakile' bigaan Jesúza' Jerusalénna'. ⁴⁴ Gokgakile' do ladj ben'ka' ziyajlengake' zilem', na' kon bigootezgake' nez do lla. Na' ka biyiljgake'b' ladj ben' dialla che'ka' na' ben'ka' nombia'gake' ⁴⁵ aga billelgakile'b'. Na' bibiigake' jadiljgake'b' Jerusalénna'.

⁴⁶ Na' ka gok shonə lla billelgakile'b' yoodo'na', chi'b' ladj ben'ka' chli' chsedi leya' chzenagb' xtilleeka' na' chnabib' legake' che daa choe'gake' dill'. ⁴⁷ Na' yog' ben'ka' chzenag xtill'baa chiban-gakile' yel' chajonii che'baa na' ka chilliib' xtill' ben'ka' chli' chsedi leya'. ⁴⁸ Na' ka ble'i xaxna'baab' bibangakile'. Na'ch che' xna'baa:

—Xiindawaa, ¿biche benzilo' neto' ka'? Xo'ni na' nad' ba gokshejlall'chgainto' biyiljnto' li'.

⁴⁹ Na'ch che' Jesúza' legake':

—¿Biche chiyiljzle nad'? ¿Abi nezile chiyal' soa' lill Xa'na'?

50 Na' aga wyajni'gakile' bi zejin daa gollb' legake'.

51 Na'ch Jesúza' biyajlem' legake' Nazareta' na' bzenagb' chegake' toshiizi. Na' xna'baa aga gol-lallee diika' gok. 52 Na' Jesúza' zejch bgolb' na' wdapchb' yel' sin', na' Chioza' bibachile'b', na' lekzka' bibayi beñ' leb'.

3

Juanna', beena' bchoa beñ' nis

(Mt. 3:1-12; Mr. 1:1-8; Jn. 1:19-28)

1 Na' ka gok shin' yiz chñabia' César Tibériona', na' Poncio Pilátona' chñabi'e gana' mbani Judéana', na' Heródeza' chñabi'e gana' mbani Galileana', na' beñ' bishee Felípena' chñabi'e gana' mbani Ituréana' len Traconítana', na' Lisániaza' chñabi'e gana' mbani Abilíniana', 2 na' Anáza' len Caifáza' nakgake' b̄xoz choo b̄xoz xen che beñ' Israelka'. Na' kana'yen' w̄ne Chioza' Juanna', xiin Zacaríaza', kana' zoe' to latj gana' bibi chashj chleb. 3 Na'ch wyaj Juanna' jte' doxen yell-liona' de cho'a yao Jordánna' na' wdixje'ile' beñ' chiya! yiyaj yilengakile' na' choagake' nis kwenche yizi'xen Chioza' chegake'. 4 Bene' kon ka bzej dii Isaíaza' gana' nan: To beñ' gosyee latja' gana' bibi chashj chleb, na' in'e':

“Li se kwas wzenagle che Xanchona' na' wsalj yichjlall'do'leka' kat' zee.

5 La' le' gone' ka chon beñ' chillée ga nak xitj yao, na' ka beñ' chchinj yaa kwenche chileshe'n.

Na' chilie' yog'lol' nez dii nyok nlew, na' chillée xitjka' chi' lo neza'.

6 Na' yog'loł ben' ile'gakile' ka gon Chioza' yisle' ben' lawi dii mala'.”

7 Na' ben' zan chllin lao Juanna' kwenche wchoe' legake' nisa', na'ch kat' chllingake' lawe'na', chi'e legake':

—ıLe' naklikzle ka bel znia! ȷAchakile wak wxonjile' yel' zak'zi' daa wsel' Chioza'? 8 Li gon ka gakbe'i ben' nan dii li ba biyaj bilenile'. Na' bi gakzile bibi yel' zak'zi' ile'ile daa inazle: “Neto' naknto' xiin dia che dii Abrahama'.” Ni inia' le' axt yajki wak gon Chioza' xiin dia che dii Abrahama'. 9 Yog'loł-le shi bi chonle ka chiyoolallii Chioza' na' gak chele ka chak che to yag dii choe' dii zix dii bi nak wen, na' lii chchogtegake'n na' chzal'gake'n lo yi'na'.

10 Na' ben'ka' chzenag xtil' Juanna' che'gake'ne':
—ȷBeran chiyal' gonnto', shka'?

11 Na'ch che' Juanna' legake':

—Beena' de chop kwe' xe', chiyal' wi'e shkwe' che beena' bi de che'. Na' beena' de dii cheej chawe', chiyal' gaolene'n beena' bi de cheyin.

12 Na' lekzka' bllin bal ben' wıchixjka' kwenche wchoa Juanna' legake' nisa', na' wıabgakile'ne':

—Maestro, ȷberan chiyal' gonnto', shka'?

13 Na'ch che' Juanna' legake':

—Bi wıchixjle dii xenchlæ ka to daa chiyal' wıchixjle.

14 Na' lekzka' bal ben'ka' nak soldad wıabgakile'ne':

—ȷShera neto', beran chiyal' gonnto' shka'?

Na'ch che' Juanna' legake':

—Bi wwall wsheble beṇ' kwenche ikaazle bi de che', ni bi wtobilene' dii bi nak ka'. Li gon banez laxjlēna'.

¹⁵ Na' beṇ' zan yoo yichjgake' ila' Crístona', beena' wsel' Chioza' kwenche inabi'e, na' yog'ze' gokgakile' Juanna'ljan Crístona'. ¹⁶ Na' Juanna' golle' legake':

—Zi' za' beena' napch yeḷ' wak xench ka nad'. Na' nad' ni bi zakaa gak' xmose' kwenche wleḥj' xeḷe'na'. Nad' chchoa' le' nis daa chiyaj chilēnile, san len' gone' ka yidsoa Espíritu Sántona' loo yichjlall'do'lēna', na' beṇ'ka' bi chiyaj chilēni, wselee legake' lo yi' gabiḷa'. ¹⁷ Na' daa gon Crístona' che beṇ' chzaklebin ka daa chon beena' nox' yag xoz' daa chpa'ile' trígona', na' yitope' trígona' kooshaween na' wzeye' beb cheyinna' lo yi'na' daa biga yiyolkzə.

¹⁸ Kan' nak diika' bzajni Juanna' beṇ'ka', na' dii zanch dill' dii be'lēne' legake' kana' bi'e dill' wen dill' kob che Chioza'. ¹⁹ Na' Juanna' lekzka' bshesh-lēne' Heródeza', beena' wṇabia' Galileana', daa bī-kee Herodíaza', xool beṇ' bishee Felípena', na' che bichlə dii malka' ba bene'. ²⁰ Na'ch Heródeza' benche' bish' ljwell dii malka' ba bene' daa wlo'e Juanna' lillyana'.

Wchoa Jesúza' nisa'

(Mt. 3:13-17; Mr. 1:9-11)

²¹ Kana' chchoa Juanna' beṇ' nisa', len Jesúza' bchoe'n. Na' shlak choe'lwill Jesúza' Chioza', byalj yabana' ²² na' betj Espíritu Sántona' jsoalēne'ne', na' ble'gakile' Espírituna' ka to palom. Na' bengakile' shii Chioza' za'n yabana', chi'e:

—Lin' nako' Xiiñ', chakchgaid' li' na' le chibaid' li'.

Ben'ka' nak dia che Jesucristona'
(Mt. 1:1-17)

²³ Na' do shichoa yizi Jesúza' ka wzoloe' bene' yog' daa llia bia' gone'. Na' yog' ben' wnagake' xiiñ Josénan'. Na' Joséna' goke' xiiñ Elína', ²⁴ Elína' goke' xiiñ Matata', Matata' goke' xiiñ Levína', Levína' goke' xiiñ Mélquina', Mélquina' goke' xiiñ Jánana', Jánana' goke' xiiñ Joséna'. ²⁵ Joséna' goke' xiiñ Matatíaza', Matatíaza' goke' xiiñ Amóza', Amóza' goke' xiiñ Nahuma', Nahuma' goke' xiiñ Éslina', Éslina' goke' xiiñ Nagaina'. ²⁶ Nagaina' goke' xiiñ Maata', Maata' goke' xiiñ Matatíaza', Matatíaza' goke' xiiñ Semeina', Semeina' goke' xiiñ Joséna', Joséna' goke' xiiñ Judána'. ²⁷ Judána' goke' xiiñ Joánana', Joánana' goke' xiiñ Résana', Résana' goke' xiiñ Zorobabela', Zorobabela' goke' xiiñ Salatiela', Salatiela' goke' xiiñ Nérina'. ²⁸ Nérina' goke' xiiñ Mélquina', Mélquina' goke' xiiñ Ádina', Ádina' goke' xiiñ Cosama', Cosama' goke' xiiñ Elmodama', Elmodama' goke' xiiñ Era'. ²⁹ Era' goke' xiiñ Josuéna', Josuéna' goke' xiiñ Eliezera', Eliezera' goke' xiiñ Jorima', Jorima' goke' xiiñ Matata'. ³⁰ Matata' goke' xiiñ Levína', Levína' goke' xiiñ Simeónna', Simeónna' goke' xiiñ Judána', Judána' goke' xiiñ Joséna', Joséna' goke' xiiñ Jonánna', Jonánna' goke' xiiñ Eliaquima'. ³¹ Eliaquima' goke' xiiñ Meleana', Meleana' goke' xiiñ Mainána', Mainána' goke' xiiñ Matátana', na' Matátana' goke' xiiñ Natánna'. ³² Natánna' goke' xiiñ Davina', Davina' goke' xiiñ Isaína', Isaína' goke' xiiñ Obedá', Obedá'

goke' xiiñ Booza', na' Booza' goke' xiiñ Salmónna', Salmónna' goke' xiiñ Naasónna'. ³³ Naasónna' goke' xiiñ Aminadaba', Aminadaba' goke' xiiñ Arama', Arama' goke' xiiñ Ezroma', Ezroma' goke' xiiñ Fáreza', Fáreza' goke' xiiñ Judána'. ³⁴ Judána' goke' xiiñ Jacoba', Jacoba' goke' xiiñ Isaaca', Isaaca' goke' xiiñ Abrahama', Abrahama' goke' xiiñ Taréna', Taréna' goke' xiiñ Nacora'. ³⁵ Nacora' goke' xiiñ Seruga', Seruga' goke' xiiñ Ragauna', Ragauna' goke' xiiñ Pelega', Pelega' goke' xiiñ Hebera', Hebera' goke' xiiñ Sálana'. ³⁶ Sálana' goke' xiiñ Cainánna', Cainánna' goke' xiiñ Arfaxada', Arfaxada' goke' xiiñ Sema', Sema' goke' xiiñ Noéna', Noéna' goke' xiiñ Lameca'. ³⁷ Lameca' goke' xiiñ Matusalénna', Matusalénna' goke' xiiñ Enoca', Enoca' goke' xiiñ Jareda', Jareda' goke' xiiñ Mahalaleela', Mahalaleela' goke' xiiñ Cainánna'. ³⁸ Cainánna' goke' xiiñ Enóza', Enóza' goke' xiiñ Seta', Seta' goke' xiiñ Adánna', na' Adánna' goke' xiiñ Chioza'.

4

Dii xiwaa goklalliin kooyela'n Jesúza' gone' ka cheenin

(Mt. 4:1-11; Mr. 1:12-13)

¹ Ka biza' Jesúza' cho'a yao Jordanna', Espíritu Sántona', beena' chñabia' loo yichjlall'do'ena', bchi'ene' latja' gana' bibi chashj chleb. ² Na' na' wzoe' choa lla, na' dii xiwaa goklalliin kooyela'n le' gone' ka cheenin. Na' shlak wzoe' na' ni lat' bibi wdawe', na' ka gok choa lla, wdone'. ³ Na'ch che' dii xiwaane':

—Shi leilo' nako' Xiin Chios, goll yaji yiyakan yetxtil.

⁴ Na'ch che' Jesúza':

—Cho'a Xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban chegake'.”

⁵ Na'ch ka wde, bche' dii xiwaa Jesúza' to lo yaa sib wal, na' tolbe'do' bliin le' yog' yellka' llia yellioni. ⁶ Na'ch che'n le':

—Gon' li' doxen yel' wnabia'na' na' yel' zakiina' daa de che yog' yellki, la' ba nakin cha' na' wak wi'an kon no cheenid'. ⁷ Na' gona'n li' shi wchek' xibo'na' we'lawoo nad'.

⁸ Na' che' Jesúza':

—Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

⁹ Na'ch ka wde, bizche' dii xiwaa Jesúza' Jerusalenna' na' blepan le' yichj yoodo'na' gana' nakch sib wal, na' gollan le':

—Shi leilo' nako' Xiin Chios, lla bxit'shki ni. ¹⁰ La' Cho'a Xtill' Chioza' nan: Chioza' wselee anjl che'ka' gap wwiagake' li',

¹¹ na' gox'gake' li' kwenche ki koo wchewo' yajka'.

¹² Na'ch che' Jesúza':

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenche xenlalloo shi gone' ka ba wne'.”

¹³ Na' ka bi gok kooyel' dii xiwaa Jesúza' gone' ka cheenin, na'ch bkwasan kwite'na' shloll.

Wzolo Jesúza' bi'e Cho'a Xtill' Chioza' Galileana' (Mt. 4:12-17; Mr. 1:14-15)

14 Jesúza' billine' gana' mbani Galileana' ziyoochgue' yel' wak che Espíritu Sántona', na' doxenzə na' wze dill' daa chone'. 15 Na' chjali' chjasedile' ben' Israelka' gana' chdop chllaggake' choe'lwillgake' Chioza', na' yog' ben' nagake' le xochi cho'e dill'.

Billin Jesúza' yell Nazareta'

(Mt. 13:53-58; Mr. 6:1-6)

16 Na'ch biyaje' Nazareta', yella' gana' bgole'. Na' ka bllin lla sabda', llana' chombaən ben' Israelka', wyaje' gana' chdop chllaggake' choe'lwillgake' Chioza' kon ka yooloe' chone'. Na'ch wzollee lawe'ka' kwenche blabe' Cho'a Xtill' Chioza'. 17 Na' be'gake'ne' yisha' daa bzej dii Isaíaza', beena' wdixjee daa goll Chioza'ne', na' ka bzeshe'n blabe' gana' na:

18 Espíritu che Xancho Chioza' zoalene' nad',
na' Chioza' ba bzoe' nad' zidyelen' ben' yesh'ka'
dill' wen dill' kob che'na'.

Ba bselee nad' kwenche zidtip' lall' ben'ka'
chakyeshii yichjlall'do'eka',

na' zidtxje'id' ben' wak yisell yilaagake',

na' gon' ka ile'i ben' lcholka',

na' gaklen' ben'ka' chchi' chsak' ben' legake',

19 na' wi'a dill' ba bllin lla gaklen Xanchona' ben'
yell-lioki.

20 Ka biyoll blabe' yisha' na'ch bitobe'n na' biyo'en beena' ngoo lall' neen, na' bibi'e. Na' yog' ben'ka' lle' na' shin chizozgakile' chwiagake'ne'.

21 Na' wzoloe' cho'e dill', chi'e:

—Naa billinin ka na Cho'a Xtill' Chioza' dga ba benile.

²² Na' yog' ben'ka' lle' na' che' ljwellgake' le chon beeni, na' chibangakile' ka xochi cho'e dill'. Na' che' ljwellgake':

—¿Aaga beenin xiin Joséna'?

²³ Na'ch che' Jesúza' legake':

—Wnaljale cha' ka dillaa de: “Wen rmech, biyon kwino'.” Na' lekzka' wnaljale nad': “Daa beninto' beno' Capernaúma' lekzka' benschkin lallchoni.”

²⁴ Na' be'che' dill' chi'e legake':

—Dii li nia' le', to ben' chyixjee daa che' Chioza'ne' aga no shajle' che' yell che'na'. ²⁵ Na' nia' le', zan nool wizeb wlle' gani mbani Israeli kana' wzoa Elíaza', beena' wdixjee daa goll Chioza'ne', kana' aga bi yej gok shon yiz yoo gashjə na' wche'chga wbinna' doxen gani mbani Israeli. ²⁶ Na' bi bsel' Chioza' Elíaza' kwenche gaklene' nool wizebka' lle' ni, san bseleene' to yell zit' daa le Sarepta, daa llia gaozə yell Sidónna', gana' goklene' to nool wizeb zoa na'. ²⁷ Na' lekzka' gok kana' wzoa dii Elisewa', beena' wdixjee daa goll Chioza'ne'. Ben' zan ben' Israelka' che'gakile' yillwe' daa le lepra, per ni toe' bi biyone'. Toz ben' Síriana' biyone', beena' le Naamán.

²⁸ Na' yog' ben'ka' lle' gana' chdop chllaggake' le bllaagake' daa wna Jesúza' ka'. ²⁹ Na' lii wzolla'tegake' bibejgake' Jesúza' yella', na' bche'gake'ne' to ga ze bdiñj xen wal, goklall'gake' lljachixgake'ne'. ³⁰ Per Jesúza' bicheje' ladje'ka' na' ziyaje'.

*Bibej Jesúza' dii xiwaa yoo to ben'
(Mr. 1:21-28)*

31 Jesúza' wyaje' Capernaúma', sto yell daa lia gana' mbani Galileana', na' bli' bsedile' ben'ka' lla sabda', llana' chombaṇ ben' Israelka'. 32 Na' bibangakile' ka chli' chsedi Jesúza', la' bli' bsedile' legake' lega ben' nap yel' wṇabia'.

33 Na' gana' chdop chllaggake', len to ben' yoo dii xiwaa na' bgosyaan le' zillj wal, chi'e:

34 —jwayi neto', Jesús, ben' Nazaret! ¿Abido' kwenche wlliyoo neton'? Nad' nombi'a li', na' nezid' nako' liizelozi ben' li ben' shao' che Chios.

35 Na'ch bsheshlen Jesúza' dii xiwaa, golle'n:

—jLlizə wzoa! jBichej!

Na' chwiate ben'ka' bchix btoḷ dii xiwaa beena', na' bichejan na' bikzə gayile' bi goki. 36 Na' yog' ben'ka' lle' na' bibangakile', na' che' ljwellgake':

—¿Naktekan nak cho'a xtill' beeni, lla? Ka chneze' chillesh dii xiw'ka' yoo ben' daa napchgue' yel' wṇabia' na' yel' wak.

37 Na' doxen na' wze dill' ka nak daa chon Jesúza'.

Biyon Jesúza' tobiin che Simón Pédróna'

(Mt. 8:14-15; Mr. 1:29-31)

38 Na' biza' Jesúza' gana' chdop chllaggake' na' biyaje' lill Simónna'. Na' tobiin che Simónna' bi shawee, yoochgue' dii lana', na' wṇabgakile' Jesúza' gaklene'ne'. 39 Na'ch wbig' Jesúza' kwite'na' gana' die' na' bsheshlene' dii lana' na' bichejan. Na' lii biyaste noola' wzoloe' bene' dii weej wdaogake'.

Jesúza' biyone' ben' zan

(Mt. 8:16-17; Mr. 1:32-34)

40 Na' ka ba chxoa wbillá, ben'ka' lle' na' jwa'gake' lao Jesúza' ben'ka' chak wde wdeli yillwe'. Na' bḵoa neena' to togake' na' biyakgakile'.

41 Na' bibeje' dii xiwaa yoo beṇ' zan, na' ka bichej-gakan chosyaagakan zillj inleeb, che'gakan:

—Lin' nako' Xiṇ Chioza'.

Na'ch bsheshlen Jesúza' legakan. Bi bi'e latj inegakan la' nezgakin len' nake' Crístona', beena' chbez beṇ' Israelka' wse! Chioza' inabi'e.

Wda Jesúza' bi'e Cho'a Xtill' Chioza' Galileana'
(Mr. 1:35-39)

42 Ka wyeeni', bchej Jesúza' yella' na' wyaje' ga kono lle'. Per beṇ' yellka' biyiljgake'ne', na' ka bllingake' kwite'na', goklall'gake' wzag'gake'ne' kwenche yigaaṇlene' legake'. 43 Na'ch goll Jesúza' legake':

—Lekzka' chiya! chixje'id' beṇ'ka' lle' yell yoblə ka nak ye! wṇabia' che Chioza', la' daan bselee nad'.

44 Na' wda Jesúza' wdixji'e cho'a xtill' Chioza' to to gana' chdop chllag beṇ' Israelka' choe'lwillgake' Chioza'.

5

Wxengake' bel zan
(Mt. 4:18-22; Mr. 1:16-20)

1 To shii bllin Jesúza' cho'a nido' che Gene-sareta' na' bllin beṇ' zan wal axt bdakwyill-gake'ne', daa cheengakile' wzenaggake' cho'a xtill' Chioza'. 2 Na' ble'i Jesúza' chop barkw chi'gakan cho'a nido'na'. Ba bichej beṇ' wxen belka' na' ba chiyibgake' yixj che'ka'. 3 Na'ch wyoo Jesúza' loo barkw che Simónna', na' wṇabile'ne' wllig' zilateen loo nido'na'. Na' wche' Jesúza' loo barkwa' na' wzoloe' bli' bsdile' beṇ'ka'. 4 Na' ka biyoll bli' bsdile' legake', na'ch chi'e Simónna':

—Wyajlen barkwi gana' zitj na' wzal'le yixj chelena' kwenche senle belka'.

⁵ Na'ch che' Simónna':

—Maestro, do yel ba bennto' llinna' na' ni tlish'b bi bdolinto', per shi kan' no', wzal'chnto' yixjki.

⁶ Na' ka bzal'gake' yixj che'ka', wxenan bel zan inleeb. Na' ka nan yibejgake' yixja' wzolo chcheza'n. ⁷ Na' blaa neeka' ben'ka' lle' loo barkwa' sto kwenche jaklengake' legake'. Na' ka bllin ben'ka', na'ch bissha'chagake' chopte barkwka' axt ba chakgakan ka dii kwe' yel. ⁸ Ka ble'i Simón Pédróna' ka gok, bchek' xibe'na' lao Jesúza' na' chi'ene':

—Bikwasgach kwitii Xan', la' ben' saaxyaz nad'.

⁹ Golle'ne' ka' daa bibanile', na' ka'kzə ben'ka' lene' bibangakile' daa bdol' bel zan inleeb. ¹⁰ Na' lekzka' bibani Jacóbona' len Juanna' xiin Zebedewa', la' lengaken' nakgake' txen Simónna'. Na' che' Jesúza' Simónna':

—Bi illebo'. Kon ka chono' naa chbejo' belki loo nisi, ka'kzan gono' yibejo' ben' lao dii mala'.

¹¹ Na' ka billinlengake' barkwka' cho'a nido'na', na'zə bkwaangake'n len xshinlaze'ka' na'ch janogake' Jesúza'.

*Biyon Jesúza' to ben' chake' yillwe' daa le lepra
(Mt. 8:1-4; Mr. 1:40-45)*

¹² Na' shlak zoa Jesúza' to yell, bllin to ben' lawe'na' chak doxen kwerp che'na' yillwe' daa le lepra. Na' ka ble'ile' Jesúza', bchek' xibe'na' lawe'na' na' bchek' yichje'na' axt lo yona' na' got'yoile'ne', chi'ene':

—Xan', nezid' wak yikwaso' yillwe'ni chak' shi cheenilo'.

13 Na'ch Jesúza' b̄xōa neena' yichj beena', na' chi'ene':

—Cheenid'x. Na' ñaate yikwasa'n.

Na' kon ka golle' ka' lii biyakteyi beena'. 14 Na'ch che' Jesúza'ne':

—Kono yoo ka ba ben' cho'. L̄ete wyaj lao b̄xōza' kwenche ile'ile' ba biyakilo', na' jwa' daa chiyal' lljoo che Chioza' daa nllia dii Moiséza' bia' kwenche ñezi ben' ba biyakilo'.

15 Na' la'kzi golle'ne' ka', zizikchli wzeyi che', na' ben' zan bdop bllaggake' kwenche bzenaggake' cho'a xtilleena' na' kwenche biyone' bittezə yillwe' dii chakgake'. 16 Per Jesúza' yooloe' chaje' ga kono ben' chak kwenche chjelwille' Chioza'.

Biyon Jesúza' to ben' net ñi'a neena'
(Mt. 9:1-8; Mr. 2:1-12)

17 To lla ka chli' chsedi Jesúza', x̄onj fariseoka' na' ben'ka' chli' chsedi leya', na' ben'ka' za' yog' yellka' daa mbani Galileana' na'ch daa mbani Judeana' na' lekzka' ben' za' yell Jerusalénna', chi'gake' chzenaggake' dill' daa cho'e. Na' yel' wak che Chioza' wzoalenan Jesúza' kwenche gok biyone' ben'ka' bi shao'. 18 Na'ch bllin to chop ben' ñlengake' to ben' net ñi'a neena' n̄xoagake'ne' to lo daa. Goklall'gake' sho'lengake'ne' loo yooná' kwenche lljwa'gake'ne' lao Jesúza', 19 per bi gok sho'lengake'ne' daa nyichachga ben'ka' loo yooná'. Na'ch wyepgake' koll' yooná'lə na' bkwasgake' dexka' kwenche gok bletjgake'ne' do daa che'na' ladj ben'ka' lle' na' kwenche blline' lao Jesúza'. 20 Na' ble'i Jesúza' le n̄xenilall'gake'ne', na'ch chi'e ben' we'na':

—Bish'dawaa, ba biyakxen saaxya cho'ka'.

²¹ Na'ch beṇ'ka' chli' chsedi leya' na' fariseoka' wza'lall'gake', chakgakile': “¿Nora beeni chonz kwine' ka Chioza? ¿La' toz Chiozan' chak chizi'xene' saaxya che beṇ'!”

²² Na' gokbe'i Jesúza' daa wza'lall'gake', na'ch golle' legake':

—¿Berache chza'lall'zle ka'? ²³ ¿Achakile chyalljchid' yel' wak xench yep' beeni: “Ba bizi'xen' saaxya cho'na”, ka daa yepee: “Biyas na' bigoo nez”? ²⁴ Na' wliid' le', nad', Beṇ' Bsel' Chioza', nap' yel' wṇabia' yell-lioni kwenche yizi'xen' saaxya che beṇ'.

Na'ch golle' beena' net ṇi'a neena':

—Naa nia' li', biyas, bitob daa cho'na' na' biyaj lillo'na'.

²⁵ Na' lii biyaste beena' chwiate beṇ'ka' lle' na', bitobe' daa che'na' bizee ziyaje' lill-le' choe'lawee Chioza'. ²⁶ Na' yog'lol beṇ'ka' bibangakile' na' be'la'ogake' Chioza', na' do chllebzgake' che'gake':

—Naanlla ba ble'icho dga chonan ka chibanicho.

Gox Jesúza' Levína'

(Mt. 9:9-13; Mr. 2:13-17)

²⁷ Ka biza' Jesúza', na' ble'ile' to beṇ' wiçixj lie' Leví, chi'e gana' chçixjgake'. Na' chi'ene':

—Da, dino nad'.

²⁸ Na'ch lii wzolla'te Levína', wlej yichje' xshine'na' na' janoe' Jesúza'.

²⁹ Na' Levína' bene' to ṇi xen che Jesúza' lille'na'. Na' wyaj beṇ' zan beṇ' wiçixjka' na' zi baḷ beṇ' yoblə wdaogake' txen. ³⁰ Na' fariseoka'

na' ben'ka' chli' chsedi leya' wzologake' chakdil-
lengake' ben'ka' nak Jesúza' txen, che'gake':

—¿Berache cheej chaolenle ben' wichixjka' na'
ben' malka'?

³¹ Na'ch che' Jesúza' legake':

—Beena' zoa shi'a shao' aga no wen rmech
chylljile', san beena' bi shawaan chylljile'ne'.

³² Aga bid' ni che ben'ka' nak ben' li ben' shao',
san bid' kwenche yep' ben' saaxyaka' chiyal' yiyaj
yilengakile'.

Wnabgakile' Jesúza' che wbasaa

(Mt. 9:14-17; Mr. 2:18-22)

³³ Na' wnabgakile' Jesúza', che'gake'ne':

—Ben'ka' nak Juanna' txen na' ben'ka' nak
fariseoka' txen zekizezi chzoagake' wbas' na'
choe'lwillgake' Chioza'. Na' ¿berache ben'ki
nagake' li' txen bi chzoagake' wbas'?

³⁴ Na' chi'e legake':

—Kat' de to ye!' wishagna', aga wak gonle
byen ben'ka' chdop chllag soagake' wbasaa shlak
zoalengake' bi'na' chshagna'. Na' ka'kzan ben'ki
nagake' nad' txen, cheej chaogake' naa zoalen'
legake'. ³⁵ Per wllin lla wkwas ben' nad' ladje'ka',
kana'chan soagake' wbasaa.

³⁶ Na' lekzka' bzoe' sto jempl, chi'e legake':

—Ni to ben' bi chchogue' xa kobe'na' na' chideen
lee xe' dii gola'. La' shi gone'n ka', na' wlliyee
dii koba', na' dii gola' aga wnelebin lech' koba'.

³⁷ Na' ni kono chгаа vinona' daa zi' chchejte to loo
yid golə. La' shi no gon ka', vino koba' wchezaan
yid gola' na' chopten kwiayi'. ³⁸ San vino koba'
chiyal' shollan loo yid koba'. ³⁹ Na' lekzka' to ben'

ba yooloe' cheeje' vino gola' aga weenile' yeeje' dii koba', daa chziachile' dii gola'.

6

Wdishjake' do che trígona' lla sabda'

(Mt. 12:1-8; Mr. 2:23-28)

¹ To lla sabd, llana' chombaan̄ ben' Israelka', wdelen Jesúza' ben'ka' nakgake'ne' txen to ga naz ben' trígona', na' ben'ka' zejlengake'ne' wzolo wdishjake' trígona' na' wxobgake'n wdaogake'n.

² Na' bal̄ fariseoka' gollgake' legake':

—¿Biche chonzle daa bi chiyal' goncho llani chombaan̄cho?

³ Na'ch che' Jesúza' legake':

—¿Abin' wlable gana' cho'en dill' ka ben dii Davina' len ben'ka' nakgake'ne' txen ka wdongake'? ⁴ Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bxozka' de lsens gaogake'. Na' lekzka' bi'en ben'ka' nakgake'ne' txen.

⁵ Na' lekzka' chi'e fariseoka':

—Nad', Ben' Bsel' Chioza' Yell-lioni, chñabi'a lao llani chombaan̄cho.

Biyon Jesúza' to ben' lla sabda'

(Mt. 12:9-14; Mr. 3:1-6)

⁶ Na' sto lla sabd, llana' chombaan̄ ben' Israelka', wyaj Jesúza' gana' chdop chllaggake' choe'lwillgake' Chioza' na' wzoloe' chli' chsedile' legake'. Na' ladj ben'ka' len to ben' net nee de shlina'. ⁷ Na' fariseoka' na' ben'ka' chli' chsedi leya' lle'gake' chwiayen'gake' shi wiyon Jesúza' beena' llana' chombaan̄gake', kwenche gaogake' xya che'.

⁸ Na' gokbe'i Jesúza' daa chza'lall'gake', na'ch golle' beena' net tlaa neena':

—Wzolla' na' wze gchola'.

Na'ch wzolla' beena', wzie' gchola'. ⁹ Na'ch goll Jesúza' ben'ka':

—Ni inabid' le': ¿Beran na leya' chiyał' goncho lla sabdka'? ¿Agoncho dii wenna' anti goncho dii mala'? ¿Ayislacho ben' anti witchone'?

¹⁰ Na'ch bwia Jesúza' legake', na' chi'e beena' net tlaa neena':

—Bli noona'.

Na'ch bli neena' na' biyakin. ¹¹ Na' fariseoka' na' ben'ka' chli' chsedi leya' le bllaagake' na' choe'gake' dill' nak ka gongake' che Jesúza'.

Wlej Jesúza' postlka' shllin

(Mt. 10:1-4; Mr. 3:13-19)

¹² Na' wyaj Jesúza' to lo yaa kwenche jelwille' Chioza', na' do yel be'lwille'ne'. ¹³ Ka wyeeni', goxe' ben'ka' nakgake'ne' txen na' ladj ben'ka' wleje' ben'ki shllin na' bsi'e legake' postl: ¹⁴ Simónna' beena' bsi'e Pedro, len ben' bishee Andréza', na' Jacóbona', Juanna', Felípena', Bartoloména', ¹⁵ Matewa', Tomáza', Jacobo xiin Alfewa', Simónna', beena' bsi'gake' Zelote, ¹⁶ Judas, ben' bish' Jacóbona'* na' Jud Scariota', beena' bene' Jesúza' lo na' ben' malka'.

Bli' bsedi Jesúza' ben' zan

(Mt. 4:23-25)

¹⁷ Na'ch biyetjlen Jesúza' legake' lo yaana' na' billingake' to ga nak lesh'. Na' na' lle'

* **6:16** Ben' bish' Jacóbona': ben'ka' nsed nagake' chiyał' inan xiin Jacóbona'.

ben' zan inleeb, ben' zaak doxen gana' mbani Judeana' na' yell Jerusalénna', na' ben' zaak cho'a nido'na' gana' mbani yell Tírona' na' yell Sidónna'. ¹⁸ Wyajgake' kwit Jesúza' kwenche wzenaggake' xtilleena' na' yiyakgakile' bi yillwe' dii chakgake'. Na' lekzka' biyaki ben'ka' chsak'zi dii xiw'ka' legake'. ¹⁹ Yog'z ben' goklall'gake' idi'gake' Jesúza' daa ba nezgakile' chchej yel' wak che'na' na' chiyaki yog' ben'.

*Ben'ka' zoa mbalaz na' ben'ka' bi zoa mbalaz
(Mt. 5:1-12)*

²⁰ Na'ch bwia Jesúza' ben'ka' nakgake'ne' txen, na' chi'e legake':

—Chakomba le' nakle ben' yesh' daa chleble yel' wñabia' che Chioza'.

²¹ Chakomba le' chbił chdonle ñaa; wllin lla yesh yeljile.

'Chakomba le' chbell-le ñaa; wllin lla yixill-le.

²² 'Chakomba le' shi chakzbani ben' le', shi bi chongake' le' txen, shi biya dii nagake' le', na' shi chongakile' le' nakzi ka chongakile' to ben' wen dii mal ni cha', nad', Ben' Bsel' Chioza' Yell-lioni.

²³ Li yibayi, na' li soa mbalaz kat' ba chongakile' le' ka', la' yabana' gaple to dii wen dii shao'. La' ka'kzə beni dii xozxtoe'ka' ben'ka' wdixjee daa goll Chioza' legake' kani'yi.

²⁴ Nyesh'laz gak chele, le' nakle ben' wni'a, la'kzi le wen chak chele ñaa.

²⁵ Nyesh'laz gak chele, le' de dii cheej chaole ñaa, la' wllin lla ibił idonle.

'Nyesh'laz gak chele, le' chyitj chxill-le ñaa; wllin lla kwellyesh'le.

26 'Nyesh'laz gak chele, le' choe'la'o yog' beñ' le', la' ka'kzə be'la'o dii xoxto'leka' dii beñ'ka' benzə ka chyixjee daa che' Chioza' legake'.

Chiyal' gakicho beñ'ka' chakzbani cho'
(Mt. 5:38-48; 7:12)

27 'Le' chzenagle naa, nia' le', li gaki beñ'ka' chakzbani le'. Li gonigake' wen. 28 Li inabi Chioza' gone' ka gak wen che beñ'ka' chyishj bia' blag' chele. Li inabi Chioza' gaklene' beñ'ka' chiya dii nagake' chele. 29 Shi no kap' xag'lena' tlaa, li wze daa zi shlaa. Na' shi no koyo xachel-lena', li we'tega len xkamislana'. 30 Nottezə beñ' shi bi inabe' chele, li we'n. Na' ka', shi no ikaa bi de chele, bi yinabzilene'n. 31 Li goni beñ' kon ka cheenile gongakile' le'.

32 'Shi to beñ'ka' nllagzile chakile, ¿garan de dii wenna' daa chonle? La' ka'klen chon beñ' saaxyaka'. 33 Lekzka' shi to beñ'ka' chonzi le' wen chiyonile wen, ¿garan de dii wenna' chonle? La' ka'klen chon beñ' saaxyaka'. 34 Na' shi choe'le bi choe'le beñ' daa nezile yigwee wzonna', ¿garan de dii wenna' daa chonle? La' ka'klen chon beñ' ssaxyaka', choe'gake' bi choe'gake' daa nongake' lez wigoogake' wzon che'ka'. 35 Na' le', naalla, chiyal' gakile beñ'ka' chakzbani le', na' gonle wen chegake'. Na' shi we'le dii we'le legake', bi gonle lez yiyongake'n. Shi ka' gonle, Chioza' yiyone' dii xench chele, na' inezi beñ' nakle xiin Chios, beena' nak beñ' choo beñ' xen, la' le' chone' wen che beñ'ka' bi choe' le' yel' choxken na' beñ' wen dii malka'. 36 Chiyal' yiyeshii ljwell-le ka chiyeshii Xacho Chioza' yog' beñ'.

Bi wwia wyile bi chon ben'

(Mt. 7:1-5)

³⁷ 'Bi wwia wyile bi chon ben', kwenche bi gon Chioza' xya chele. Bibi wtobile' ben', kwenche bi gaple dol' lao Chioza'. Li si'xen che ljwell-le, na' Chioza' si'xene' chele. ³⁸ Li we' ben' bi chyalljile' na' Chioza' yiyone'n. Na' yiyonchle' dii xench, ka chon ben' chzanile' do yichj do lallee kat' bi wi'e, chzoayaa chzoalline'n. La' kon ka chonle chzanile' we'le ben' bi de chele, ka'kzan goni Chioza' le'.

³⁹ Na' bzoa Jesúza' to jempl, chi'e legake':

—Nezicho bi gak to ben' lchol wchi'e sto ben' lchol, la' choptegake' lljabixgake' to loo yech. ⁴⁰ Na' beena' chsed bi gak ine': “Chonch' ka beena' chli' chsedile' nad'.” Kat'ch yiyoll yido wsede', kana'chan gake' ka beena' bli' bsedile'ne'.

⁴¹ '¿Biche chwiazó' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴² Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': “Ben'shki yibej' bicha' yoo loo jalawo'na'”? ¡Ben' wxiye! Zigaate bwia cho'na' na' tech wwio' che' bish' ljwello'na'.

Daa chbia to yag chli'n bi yag daa

(Mt. 7:17-20; 12:33-35)

⁴³ 'Biga zoa to yag wen na' kwiazan dii bi nak wen, ni biga zoa to yag dii bi nak wen kwiazan dii nak wen. ⁴⁴ Ka ile'icho daa chbia to yag, na' chnezicho bi yag daa. Yag yeshaa aga wbian yixwewa', na' lekzka' yag bisgaana' aga wbian uvana'. ⁴⁵ Ka'kzan beena' nak ben' wen, choe' dill' wen, la' loo yichjlall'do'enan' yoo dii wenna'. Na'

beena' nak ben' mal, cho'e dill' dii nak mal, la' loo yichjlall'do'enan' yoo dii mala', la' yog' daa chnecho chchejan loo yichjlall'do'chona'.

Chop ben' bengake' twej yoo
(Mt. 7:24-27)

⁴⁶ Berache nazle nad' "Xan', Xan'", na' bi chonle daa nia' le'? ⁴⁷ Ni inia' le' no zaklebi beena' chone' nad' txen na' chzenague' cha' na' chone' ka nia'. ⁴⁸ Zaklebile' beena' ben to yoo. Zigaate wdene' zitj wal na' wleke' leninna' lo yaja'. Ka wde yawa' na' wyoon le'inna', aga bizoyin yisheen daa, la' chi'cha leninna' lo yaja'. ⁴⁹ Na' beena' cheni cho'a xtilaana' na' bi chone' ka nia', zaklebile' beena' ben lille'na' lo yona' na' bibi lenin wleke'. Na' ka wde yawa' wyoon le'inna', lii billeeten na' wlli-ayi'tekkan.

7

Biyon Jesúsza' xmos xan soldadka'
(Mt. 8:5-13)

¹ Ka biyoll be'len Jesúsza' ben'ka' dill', biyaje' Capernaúma'. ² Na' yella' zoa to ben' Roma ben' chnabi'e to guiyoa soldad, na' zoa to xmose' lille'na', beena' le' chakile', na' chake' to yillwe' dii chonan ka witan le'. ³ Na' ka beni xan soldadka' choe'gake' xtill' Jesúsza', na'ch bselee bal' ben' golka' chnabia' Israela' kwenche lljet'yogakile'ne' lljayene' beena' bi shao'. ⁴ Na' ka bllin ben' golka' kwit Jesúsza', got'yogakile'ne', che'gake':

—Xan soldadka' chidolee gakleno'ne', ⁵ la' le' chakile' cho' ben' Israel na' len' bene' yoon'a gana' chdi'anto' choe'lwillnto' Chioza'.

⁶ Na'ch wyajlen Jesúza' legake'. Na' ka ba zoa yillingake' lille'na', xan soldadka' bselee bal ben' nllaguile' kwenche jellgake' Jesúza' dill'ki:

—Xan', bi sio' wneyi yido', la' bi chido_laa shoo loo lillii. ⁷ Daan bi biyaxjid' yid' kwini' yidtil' li'. La'ch' to chop cho'a dill' shel' ino' na' yiyakile'. ⁸ La' zoa no chnabia' nad', na' lezkka' chnabi'a soldad cha'ka'. Na' kat' chep' toe': “Wyaj ni”, na' chaje'. Na' kat' chep' stoe': “Da ni”, na' chide'. Na' kat' chep' xmosaa: “Ben dga”, na' chone'n.

⁹ Na' ka beni Jesúza' xtill' beena' na' bibanile', na' biyechje' bwie' ben'ka' zjanogake'ne', na' chi'e legake':

—Dii li, ni to ben' Israel bin' illag' ben' gonlilall'likze' nad' ka chonlilall' beeni nad'.

¹⁰ Na'ch ziyaj ben'ka' bsel' xan soldadka', na' ka billingake' lille'na' ble'gakile' ba biyaki xmosena'.

Bisban Jesúza' xiin to nool wizeb bi' ba wit

¹¹ Ka wde, na' wyaj Jesúza' sto yell dii le Naín kon ben'ka' nakgake'ne' txen na' lench zan ben' yoblə. ¹² Na' ka bllingake' cho'a yella', ble'gakile' zjakwash' ben'ka' to bi' wet. Na' bi'na' wit nakb' bi' tlish', na' xna'baa nake' noolə wizeb. Na' ben' zan ben' yellka' zjakwash'gake'b'. ¹³ Na' ka ble'i Xancho Jesúza' noola', na' biyeshile'ne', chi'ene':

—Bi kwello'.

¹⁴ Na'ch jabigüee bexee gana' xoa bi' weta', na' wlez ben'ka' nllengake'b'. Na' golle' bi' weta':

—Bi' xkwid', nia' li', jbiyas!

¹⁵ Na' bi' weta' lii bibanteb' na' bibe'b' na' wzolo chineb', na' biyon Jesúza'b' lo na' xna'baa. ¹⁶ Na' ka ble'i ben'ka' daa bene', yog'lolze' blleb na' wzologake' choe'la'ogake' Chioza', nagake':

—Ladjchoni ba bla' to ben' zakii ben' chyixjee daa che' Chioza'ne'.

Na'lekzka' nagake':

—Chiozan' ba blee kwenche gaklene' cho' nakcho yell che'.

¹⁷ Na' doxen gana' mbani Judeana' na' yellka' lia gaozə wnezgakile' daa ben Jesúsza'.

Ben'ka' bsel' Juanna' lao Jesúsza'

(Mt. 11:2-19)

¹⁸ Na' ben'ka' nongake' Juanna' txen jayell-gake'ne' yog' diika' chon Jesúsza'. Na'ch Juanna' wnie' chope' ¹⁹ na' bselee legake' gana' zoa Jesúsza' kwenche janabgakile'ne' shi leyen'en' beena' lia bia' yid wa shi chiyal' kwezgake' sto ben' yoblə. ²⁰ Na' ka bllin ben'ka' bsel' Juanna' kwit Jesúsza', che'gake'ne':

—Juanna', beena' chchoa ben' nisa', bselee neto' kwenche zidnabinto' li' shi li'yen'kzan nako' Crístona', beena' chbeznto' wsel' Chioza' kwenche inabi'e, wa shi chiyal' kweznto' stoe'.

²¹ Na' shlak zegake' na', biyon Jesúsza' ben' zan ben' chak yillwe', na' lekzka' bibeje' dii xiw'ka' yoo ben', na' bene' ka ble'i ben' zan ben' lcholka'.

²² Na'ch che' Jesúsza' ben'ka' bsel' Juanna':

—Li yiyaj na' li lljayell Juanna' daa ba ben ble'ile. Li lljayelle' ben' lcholka' chle'gakile', na' ben'ka' bi chak sa' chza'gake', na' ben'ka' chak yillwe'na' daa le lepra chiyakgakile', na' ben' kwellka' chengakile', na' chiban ben' wetka', na' chyixje'id' ben' yesh'ka' dill' wen dill' kob che Chioza'. ²³ Chakomba beena' chajle' cha' na' bi chakchoplallee.

24 Na' ka biza' ben'ka' bsel' Juanna', Jesúza' bi'e xtill' Juanna' lao ben'ka' lle' na', chi'e:

—¿Nakra nak beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e? 25 Na' shi bi nake' ka', ¿nakran nak beena' jawiale, shka'? ¿Ato ben' nakwe' lech' dii zakii? La' nezkzile ben'ka' nakw lech' dii zakii, na' naptergake' bittezə dii chzelall'gake', zoagake' lill ben' wñabia'ka', aga zoagake' latja' gana' bibi chashj chleb. 26 Na' ¿nakran nak beena' jawiale, shka'? ¿Ato ben' chyixjee daa che' Chioza'ne'? Dii li kan' chone', na' chontechle' ka to ben' chyixjee daa che' Chioza'ne'. 27 La' che beenin cho'e Cho'a Xtill' Chioza' dill' gana' nan:

Wselaa beena' kwialo lawo'na',
na' chixji'e xtilloona' kwenche soa ben' wzenag-
gake' cho' kat' illino'.

28 Na' nia' le', lao yog'lolte ben' yell-lioni, ni to konon' ichej ben' zak'teche' ka Juanna'. Per nottezə beena' choe' latj inabia' Chioza' loo yichjlall'do'ena', zak'teche' ka Juanna'.

29 Na' yog'lol ben'ka' bchoa Juanna' nisa', no ben' wichixjka' na' zan ben' yoblə, ka bengakile' daa wna Jesúza', gokbe'gakile' dill' li dill' shao' nak cho'a xtill' Chioza'. 30 Na' fariseoka' na' ben'ka' chli' chsedi leya' bi goongakile' wchoa Juanna' legake' nisa', ni bi goklall'gake' gon Chioza' dii wenna' cheenile' gone' chegake'. 31 Na'ch goll Xancho Jesúza' legake':

—¿Bi ka wsaklebid' le' mbanle naa? ¿No ka inia' nakle? 32 Nakle ka bi'do'ka' chbe' gana' chak yaana' na' chosyaagakb' che' ljwellb': “Bkwellnto' blleja' na' bi byaale, na' belnto' dii chon nyesh',

na' ni bi wchell-le.” ³³ La' bid Juan wichoa nisa', na' bi chawe' yetxtil ni bi cheeje' vino, na' nale che': “Dii xiwaan yo'e.” ³⁴ Na'ch bid' nad', Ben' Bsel' Chioza' Yell-lioni, na' chle'ile cheej chaw', na' nale cha': “Le ben' waoxat nak beeni na' cheejtie', na' nllagteile' ben' saaxyaka' na' ben' wichixjka'.” ³⁵ Per yel' sin' che Chioza' chli'lawin ka nsa' che ben'ka' chzenaggake' cheyin.

Jesúza' wyaje' lill Simónna', beena' nak fariseo

³⁶ To fariseo wnie' Jesúza' kwenche gaogake' lille'na'. Ka blline' na' wchi'e cho'a mesa'. ³⁷ Na' to noolə wda zoa yella', ka wnezile' zjtao Jesúza' lill farisewa', na'ch wyaje' noxee to lmet de yaj xochi na' yollan set zix. ³⁸ De chbellzile' jabiguee xni'a Jesúza' na' bisbisile' ni'ena' nis xchell che'na'. Na' bisbillile'n yish' yichje'na', na' bnopē'n na' bwazje'n set zixa'. ³⁹ Na' farisewa', beena' wnie' Jesúza' lille'na', ka ble'ile' ka chon noola', na' gok-ile': “Shel'ka' dii li nak beeni to ben' chyixjee daa che' Chioza'ne', wakbe'ile' nan nooli chox' ni'ena' nake' ben' saaxya.” ⁴⁰ Na'ch che' Jesúza' farisewa':

—Simón, de to dii cheenid' inia' li'.

Na' che' Simónna':

—Wna, Maestro.

⁴¹ Na'ch che' Jesúza':

—Chop ben' chbag'gake' mech che to ben' chon yichjin. Toe' chbaguee gay' guiyoa mech plat*, na' stoe' chbaguee shiyonan. ⁴² Na' ni toe' bi bllelgak-ile'n yiyixjgake'n. Na'ch xan mecha' benxenlallee

* **7:41** Mech plat: dill' griegona' nan denario, na' nakan to mech dii zak' che shlla llin.

daa chal'gake' che'. Wnashki nad', ¿no ben'ka' chop
gakchile'ne'?

⁴³ Na'ch che' Simónna':

—Chakid' beena' chbag' dii xench.

Na' che' Jesúza'ne':

—Lekzilo', kan' nakan.

⁴⁴ Na'ch bwia Jesúza' noola' na' chi'e Simónna':

—Bwiakachi nooli. Ka wyo'a loo lillo'ni bi beno'
nisa' kwenche chib ni'ani, per nooli ba wdibile' nis
xchell che'na' ni'ani na' bisbillile'n yish' yichje'na'.

⁴⁵ Bi bnopo' nad', per nooli kon ka wyo'a chnoptezi
chnope' ni'ani. ⁴⁶ Bi wdebo' yichjii set, per nooli
ba bwazje' set zixa' ni'ani. ⁴⁷ Daan nia' li', la'kzi dii
zan saaxya ba ben nooli, ba biyakxengakan daa le
chakchgaile' nad'. Na' beena' lat'zə biyakxen che',
lekzka' lat'chga chakile' nad'.

⁴⁸ Na'ch golle' noola':

—Ba biyakxen saaxya cho'ka'.

⁴⁹ Na' ben'ka' chi'lengake' Jesúza' txen wzolo-
gake' che' ljwellgake':

—¿Nora beeni, lla, axt saaxyaka' chizi'xene'?

⁵⁰ Na' Jesúza' chi'e noola':

—Daa chonlilalloo nad', ba bilo' lao yel'
zak'zi'na'. Biyaj mbalaz.

8

Noolka' goklengake' Jesúza'

¹ Ka wde dga, wda Jesúza' zan yell xen na' zan
yelldo', chyixji'e dill' koba' nan Chioza' chnabi'e
loo yichjlall'do' ben'ka' chzenag che'. Na' postl
che'ka' shllin chdalengake'ne' txen. ² Na' lekzka'
len bal' noolka' ba biyone'. Bale' bibeje' dii xiw'ka'
wyoogake', na' zi bale' gokgake' yillwe' na' biyone'

legake'. Na' ladje'ka' len Maríana', noola' nsi'gake' Magdalena, beena' bibej Jesúza' gall dii xiw'ka'.
 3 Na' lekzka' len noola' le Juana, xool Chúzana', beena' ngoo lo nee chap chwie' lill Heródeza'. Na' len Susánana', na' zanch noolka' ben'ka' jano Jesúza' na' bchingake' dii de chegake' kwenche goklengake'ne'.

Jempl che to ben' goz goon

(Mt. 13:1-9; Mr. 4:1-9)

4 Ben' zan bllesh to to yell jawiagake' Jesúza', na' ka bdop ben' zan wal na'ch bseesile' legake' to jempl, chi'e:

5 —To ben' goz goon wzee zeje' goza'. Na' ka zej chzalee binna', balan bxop cho'a neza' na' blej bshoshj ben' len, na' bllin byinka' wdaogakban.

6 Na' zi balan bxop ladj yajka' gana' bitek chi' yona', na' ka bla'gakan to wbillzgakan, la' aga bi gop' de gana' bxopan. 7 Na' zi balan bxop ladj yag yesh'ka', na' ka bla'gakan aga be' yag yesh'ka' latj igolgakan.

8 Na' zi balan bxop lo yo wenna', na' le bgolgakan na' ax̄t do to guiyoa wej wllia to ton.

Na' ka biyoll bseesee jempla', na'ch wñie' zilljə chi'e:

—Le' chenile dga nia', li sen wñeyi.

Bzajni Jesúza' biče chzoe' jemplka'

(Mt. 13:10-17; Mr. 4:10-12)

9 Na'ch wñab ben'ka' nakgake'ne' txen bi zejin jempla' daa bseesee. 10 Na' che' Jesúza' legake':

—Chioza' cho'e latj inezile daa kono nezkzi, ka chñabi'e loo yichjlall'do' ben'ka' chzenaggake' che'. Na' ben'ka' sto chseesid' legake' shgal' jempl, la' la'kzi chle'gakile' bin chon', kon chongake' ka ben'

bi chle'i. Na' la'kzi chengakile' bin nia', aga chajni'gakile'n.

Bzajonii Jesúza' bi zeji jempl che ben' goz goona'
(Mt. 13:18-23; Mr. 4:13-20)

¹¹ 'Kin zeji jempl che ben' goz goona': cho'a xtill' Chioza' nakan ka binna' daa goze'. ¹² Na' zoa ben' chzenaggake' cho'a xtill' Chioza', na' lii ze'te dii xiwaa chikwasan daa kwenche bi shajle'gake' na' kwiayi'gake'. Chak chegake' ka gok che binna' daa bxop cho'a neza'. ¹³ Na' zoa ben' chibagakile' chzenaggake' cho'a xtill' Chioza' na' chlebgake'n, per kat' chak bi chak chegake' na' chbej yichjgake'n. Chak chegake' ka gok che binna' bi bde loinna' daa bxopan lo yaja'. ¹⁴ Na' zoa ben' chzenague' cho'a xtill' Chioza', per chi'ch yichjgake' daa chak chegake' na' che yel' wni'ana', na' che bichlə dii chzelall'gake', na' bi chakchagake' lo xnez Chioza'. Chak chegake' ka gok che binna' bxop ladj yag yesh'ka'. ¹⁵ Na' zoa ben' chzenaggake' cho'a xtill' Chioza' do yichj do lall'gake' na' chongake' ka nan, na' chzo chzakgake' bittezə dii chak chegake'. Ben'kin chak chegake' ka gok che binna' bxop lo yo wenna' daa le wllia.

Jempl che to kandil
(Mr. 4:21-25)

¹⁶ 'Biga zoa to ben' chxene' kandila' na' chdose'n to dii wkwashaan daa wa chzoe'n xan xlague'na', san chzoe'n sibə kwenche ile'i ben'ka' sho' loo yoonā'. ¹⁷ Na' lekzka' yog'lolte dii ngash' naa, wllin lla yila' lawin, na' daa kono nezi naa, wllin lla inezi beṇaan.

18 'Li wzenag dga nia' le' naa. Beena' chzenag zizikchli shajni'chile', na' beena' bi chzenag, daa ba bzenague' lat', yog'lolan yiyal-lallee.

Xna' Jesúza' len ben' bisheeka'

(Mt. 12:46-50; Mr. 3:31-35)

19 Na'ch bllin xna' Jesúza' len ben' bisheeka' gana' zoe', na' bi gok ibig'gake' kwite'na' daa lle' ben' zan. 20 Na' wbig' to ben' golle' Jesúza':

—Xnoona' len ben' bishooka' lle'gake' lesh' chy-
oona' na' cheengakile' wshaljlengake' li'.

21 Na' goll Jesúza':

—Ben'ka' chzenaggake' cho'a xtil' Chioza' na' chongake' ka nan, legaken' nakgake' xna' na' ben' bishaa.

Jesúza' bkweze' to be' wal lo nido'na'

(Mt. 8:23-27; Mr. 4:35-41)

22 To lla wyoo Jesúza' to loo barkw len ben'ka' nakgake'ne' txen na' golle' legake':

—Techo shlaalə nido'ni.

Na'ch wza'gake'. 23 Na' shlak ngoo barkwa' nez, wtes Jesúza'. Na'ch wze to be' wal lo nido'na' na' wzolo chas chat' nisa' na' biyollan loo barkwa', na' zi lat'zə nan kwe'n yel. 24 Na' jasangake' Jesúza', che'gake'ne':

—¡Maestro! ¡Maestro! ¡Ba chbe'cho yel!

Na' wyas Jesúza' na' bsheshlene' be'na' len nido'na'. Na' wlezgakan, bich bi gok. 25 Na'ch golle' legake':

—¿Abi chon'ilall'kzle nad'?

Na' legake' le chllebgake' na' le chibangakile' na' che' ljwellgake':

—¿Nora beeni lla?, axt be'na' na' niso'da'na' chzenaggakan che'.

*Bibej Jesúza' dii xiwaa yoo to beñ' Gadara
(Mt. 8:28-34; Mr. 5:1-20)*

²⁶ Na'ch bllingake' yell-lio che beñ' Gadáraka', daa llia shlaa niso'da'na' ndil yell-lio che Galileana'.

²⁷ Ka bichej Jesúza' loo barkwa' jabig' to beñ' Gadara kwite'na'. Ba wlla yo'e dii xiw'ka', na' bich bi xalaane' nakw, ni bich zoe' lille', san kapsanta' noni lille'. ²⁸ Na' ka ble'ile' Jesúza', besyee na' jachek' xibe' lawe'na', na' zillj inlleb chi'e:

—Jwayiz nad', Jesús Xiin Chios, beñ' nak liizelozi beñ' choo beñ' xen. Ben goklen bi wsak'zi'o nad'.

²⁹ Gollan ka' daa ba chon Jesúza' byen yiche-jan. Ba wlla chñabi'an le' na' la'kzi chchejgake' ni'a neena' gdenna', lobe' chchogue'n. Na' dii xiwaa chtadon le' na' chjsoe' ga kono beñ' lle'. ³⁰ Na' che' Jesúza':

—¿Bin lio'?

Na' chi'e:

—Legiónan lia'.

Golle' ka', la' zanannan' yo'e. ³¹ Na' got'yogakin Jesúza' bi wseleegakan gana' kwiayi'gakan. ³² Na' gaozə zoa to yaa gana' lle' kush zan chaogakb. Na' dii xiw'ka' wzeyidgakan wñabgakin Jesúza' wi'e latj yiyoogakan kushka', na' bi'e latj. ³³ Na'ch bichej dii xiw'ka' yoo beena' na' biyoogakan kushka'. Na' lii goklleshtegakib na' jabixgakb to cho'a bdiñj na' jshoogakb loo nisa' na' witgakb.

³⁴ Na' beñ'ka' chap kushka' ka ble'gakile' daa gok, biyajdogake' jazengakile'n beñ'ka' lle' yella'

na' beṇ'ka' lle' lyiṅaa. ³⁵ Na'ch bllesh beṇ'ka' jaw-iagake' daa gok. Na' ka bllingake' kwit Jesúza', na' chi' beena' wyoo dii xiw'ka' kwite'na'. Ba biyakw xalaane'na' na' ba biyeen biyeeniile'. Na' blleb-gake'. ³⁶ Na' beṇ'ka' ble'gakile' daa gok, gollgake' beṇ'ka' zi' bllin nakan gok biyaki beena' wyoo dii xiw'ka'. ³⁷ Na' yog'lol beṇ' Gadáraka' got'yogakile' Jesúza' yizee lalle'ka' daa le chllibgake' ka bene'. Na' biyo'e loo barkwa' ziyaje'. ³⁸ Na' beena' bichej dii xiw'ka' got'yoile' Jesúza' wi'e latj shajlene'ne'. Per Jesúza' chi'ene':

³⁹—Biyaj lillo'na' na' jaye' dill' ka nak dii wen dii shawaa daa ba ben Chioza' cho'.

Na'ch biyaj beena' jayee dill' doxen yella' ka nak dii wen dii shawaa daa ben Jesúza' che'.

Biyon Jesúza' noola' bexee xe'na' na' lekzka' xiin Jairona'

(Mt. 9:18-26; Mr. 5:21-43)

⁴⁰ Ka billin Jesúza' shlaa nido'na', le chiba chizaki beṇ'ka' lle' na', la' yog'zgake'n chbezgake' le'. ⁴¹ Na'ch bllin to beṇ' le Jairo, nake' to beṇ'ka' chgoo xnezi cheyi diika' chon beṇ' Israelka' gana' chdop chllaggake' choe'lwillgake' Chioza'. Na' bchek' xibe'na' lao Jesúza' na' got'yoile'ne' shaje' lille'na', ⁴² daa ba chakshwet bi' nool che'na'. Nakb' to bi' tlish' tyaj, na' ka do shllin yizib'. Na' shlak zej Jesúza' beṇ' zan janogake'ne' ax̄t bdak-wyillgake'ne'.

⁴³ Na' ladj beṇ'ka' zjano Jesúza' len to noolə ba gok shllin yiz chzoe' wbaana'. Na' ba blliyee yog' dii de che' daa chajtezi chaje' lao beṇ' wen rmechka', na' ni to kono gok yiyon le'. ⁴⁴ Na'ch

wbiguee koll' Jesúza' be_xee xe'na', na' katena' lii biyakteile'.

⁴⁵ Na'ch goll Jesúza' be_n'ka' zjano le':

—¿No beena' ba be_x' nad'?

Na' ni to kono b_cheb. Na'ch goll Pédrone'ne':

—Maestro, be_n'kin chdakwyillgake' li' na' chllig'gake' li' to ki to ka'lə. ¿Bi_che nazo': "Non ba be_x' nad'?"

⁴⁶ Na' che' Jesúza' le_gake':

—Nochodan' ba be_x' nad', la' gokbe'teid' bchej yel' wak cha'na'.

⁴⁷ Na' noola', ka gokbe'ile' aga wak wkwashee, do chllebze' jachek' xibe'na' lao Jesúza'. Na' lao yog'lo_l be_n'ka' lle' na', golle' bi_che be_x'ze' xe'na' na' daa be_xeen lii biyakteile'. ⁴⁸ Na'ch goll Jesúza'ne':

—Xiin', daa chon_lilalloo nadaan biyakilo'. Biyaj mbalaz.

⁴⁹ Ni choe'telə Jesúza' dill' ka bllin to be_n' wzee lill Jairona', na' jelle'ne':

—Ba wit bi' cho'na'. Bich gonilo' Maestroni zed.

⁵⁰ Na' ka beni Jesúza', na' golle' Jairona':

—Bi illebo'. Wyaj_le' cha', na' wiyakkzi bi' cho'na'.

⁵¹ Na' ka bllingake' lille'na', aga be' Jesúza' latj sho' be_n' yoblə, lete Pédrone', Jacóbona', Juanna' na' xaxna' bi' weta'zə. ⁵² Yog'lo_l be_n'ka' lle' lill Jairona' chbellgake' daa ba wit bi'do'na'. Na' goll Jesúza' le_gake':

—Bi kwell-le, aga witbaan, cheszbaan.

⁵³ Na' bxill-ləgake' che', la' ne_zgakile' ba witbaan.

⁵⁴ Na'ch be_x' Jesúza' na' bi' wetdo'na' na' w_nie' zilljə, chi'e:

—Biyas, bi'do'.

⁵⁵ Na'ch bibam' na' lii biyasteb'. Na' goll Jesúza' legake' we'gake' dii gaob'. ⁵⁶ Na' xaxna'baa le biban-gakile', na' che' Jesúza' legake' ni to kono ye'gake' daa gok.

9

Ben'ka' shllin jtixje'gake' cho'a xtill' Chioza' (Mt. 10:5-15; Mr. 6:7-13)

¹ Na' bitop Jesúza' ben'ka' shllin, na' bi'e legake' yel' wak na' yel' wñabia' kwenche yibejgake' yog'lol dii xiw'ka' yoo ben' na' yiyongake' ben' che'i yillwe'. ² Na' bselee legake' kwenche lje'gake' dill' ka nak yel' wñabia' che Chioza', na' yiyongake' ben'ka' bi shao'. ³ Na' chi'e legake':

—To ka chazlen li shaj. Bi gox'le yag bar, bi wa'zle yixj ga koo xshinlazole, bi wa'le dii gaole, ni mech, na' ni zi shkwe' xale. ⁴ Na' yoona' gana' illinle, na'tezə soale ax̄t ka illinch lla yiza'le. ⁵ Na' yella' gana' bi wlebgake' le', kat' yiza'le, yishible bishtena' llia ni'aleka' kwenche gakbe'gakile' aga wenan chongake' bi chlebgake' cho'a xtill' Chioza'.

⁶ Na'ch wza' ben'ka' nakgake'ne' txen na' wyaj-gake' to to yell wdixje'gake' dill' wen dill' kob che Chioza' na' biyongake' ben'ka' bi shao'.

Wit Juanna', beena' bchoa ben' nisa' (Mt. 14:1-12; Mr. 6:14-29)

⁷ Heródeza', beena' wñabia' gana' mbani Galileana', benile' yog' daa chon Jesúza'. Na' chakile' nora beena', la' bal ben' nagake' dii Juan wichoa nisan' ba bibane' dii yoblə. ⁸ Na' zi bale' nagake' Elíazan' ba bila' dii yoblə. Na' zi bale' nagake' nochod' dii ben'ka' wdixjee daa goll

Chioza' legake' kani'yin ba biban ladj ben' wetka'.
 9 Na' Heródeza' wne':

—Nad' ben' mandad wchog yen dii Juanna'. ¿No-raz beena' chenzid' nagake' chiya dii chone', lla?

Na' le goklall' Heródeza' ile'ile' Jesúza'.

Jesúza' bwawe' gayaa mil ben'

(Mt. 14:13-21; Mr. 6:30-44; Jn. 6:1-14)

10 Na' ka billin postlka' shllin, na' gollgake' Jesúza' yog'lol diika' jengake'. Na'ch bchi'e to lezgake' yella' le Betsaida. 11 Na' ka wnezi ben'ka' ba zej Jesúza', na'ch wloogake' nez zjanogake'ne' na' ka bllingake' lawe'na', blebe' legake' na' bzajniile' legake' ka nak yel' wñabia' che Chioza', na' biyone' ben'ka' bi shao'.

12 Na' ka ba wlle', ben'ka' shllin jabig'gake' kwit Jesúza' na' gollgake'ne':

—Goll ben'ki yiyajgake' yellka' wa no ran-shdo'ka' llia gaozə lljadiljgake' dii gaogake' na' ga guesgake', la' ga ni zoacho bikzə bi de.

13 Na' che' Jesúza' legake':

—Len', li we' dii gaogake'.

Na'ch che'gake'ne':

—Gay'lish'tgui yetxtilki napcho na' zi chopchga bel, lechozə shi willjxi'chnto' che yoguee.

14 Gollgake'ne' ka' la' ka do gayaa mil ben' byoka' lle' na'. Na'ch che' Jesúza' ben'ka' shllin:

—Li ye'gake' kwe' shiyon wejgake'.

15 Na' bzoagake' xtillee na' wlekgake' ben'ka'.

16 Na'ch beḡ' Jesúza' yetxtilka' gay' na' belka' chop. Na' blis jalawe'na' yabana' bi'e Chioza' yel' choḡken, na' bxoxje'n na' bi'en ben'ka' nakgake'ne' txen na'ch be'gake' che che ben'ka'. 17 Na' yog'gake'

wdao ka belgakile', na' diika' bichoonan bitop-gake'n biyakten shllin xet'.

Pédrona' bi'e dill' nan Jesúsza'n beena' wlej Chioza' inabi'e

(Mt. 16:13-19; Mr. 8:27-29)

¹⁸ To shii ka choe'lwill Jesúsza' Chioza', na' lle' beñ'ka' nakgake'ne' txen, na' wñabile' legake':

—¿Non na beñ'ka' nak'?

¹⁹ Na' che'gake'ne':

—Baļe' nagake' nako' dii Juan wichoa nisa', na' zi baļe' nagake' nako' Elíaza', na' zi baļe' nagake' nako' to beñ' wdixjee daa goll Chioza'ne' kani'yi, na' ba bibane' ladj beñ' wetka'.

²⁰ Na'ch chi'e legake':

—Shera le', ¿nora nale nak'?

Na'ch che' Pédróna'ne':

—Lin' Crístóna', beena' ncheb Chioza' wselee.

²¹ Na'ch goll Jesúsza' legake' ni to kono ye'gake'ka'.

Goll Jesúsza' postl che'ka' wit beñ' le'

(Mt. 16:20-28; Mr. 8:30–9:1)

²² Na' chi'e legake':

—Kon ka nchogbia' cha', nad', Beñ' Bsel' Chioza' Yell-lioni, biya dii wchi' wsak'gake' nad'. Na' beñ' golka' chñabia' wzoagake' nad' ka'lə na' ka'kzə bχozka' chñabia' na' beñ'ka' chli' chsedi leya'. Na' chonan byen witgake' nad', na' ka gak shon lla yiban' ladj beñ' wetka'.

²³ Na'ch golle' yog'lole':

—Shi no cheeni gon nad' txen, chiyaļ' wsanlall' kwine' na' izanile' yeļ' mban che'na' yen ile'ile' bittez ni cha', na' gone' ka chazlallaa. ²⁴ La' beena' bi chzani yeļ' mban che'na' yen ile'ile' bittez ni

cha', beenan' kwiayi'. San beena' chzani yel' mban che'na' ni cha', beenan' gat' to yel' mban che' zejli kani. ²⁵ Bibi zjanayin gap ben' yog'lol daa de yellioni, shi le' kwiayee. ²⁶ Nottezə ben' chiyii chido'i nad' na' che cho'a xtilaana', ka'kz nad', Ben' Bsel' Chioza' Yell-lioni, yiyii yido'id' le' kat' yiyed' kon balaan xen cha'na', na' che Xa' Chioza' na' che anjl che'ka'. ²⁷ Na' dii li nia' le', bal-le lle'le ni, ni mbanle kat' wli' Chioza' yel' wñabia' che'na'.

Jesúza' biyake' nlla'lə

(Mt. 17:1-8; Mr. 9:2-8)

²⁸ Ka gok do to xman wna Jesúza' ka', na'ch wyaje' to lo yaa kwenche jelwille' Chioza' na' bchi'e Pédrona', Juanna' na' Jacóbona'. ²⁹ Na' shlak choe'lwille' Chioza', biyak cho'alawe'na' nlla'lə, na' biyak xe'na' xtil axt chey cheeni'n. ³⁰ Na' gokxe chop ben' bshaljlengake'ne', toe' dii Moiséza' na' beena' sto Elíaza'. ³¹ Na' yel' chey cheeni'na' nechjan legake'. Na' chshaljlengake'ne' che ka nak yel' wita' ile'ile' Jerusalénna'. ³² Na' Pédrona' len Juanna' na' Jacóbona' le chakxwesgake', per bendiplall'gake' bi wtesgake', na'ch ble'gakile' yel' chey cheeni' che Jesúza' na' che ben'ka' zi chop bllin kwite'na'. ³³ Na' ka ba chikwas dii Moiséza' na' Elíaza' kwit Jesúza', Pédrona' golle' Jesúza':

—Maestro, ¡le wen zoacho nizə! Gonnto' shonə ransh, to cho', to che dii Moiséza' na' sto che Elíaza'.

Na' ni bi gokbe'i Pédrona' bin golle'. ³⁴ Na' ni choe'tie' dill', ka wze to bej gana' lle'gake' na' bkwashaan legake'. Na' le bllebgake' ka gokbe'gakile' ba yoogake' loo beja'. ³⁵ Na' loo beja' bengakile' shii Chioza', chi'e legake':

—Beenin xiinaa, na' le chakidee. Li wzenag che'.

³⁶ Na' ka wde goll Chioza' legake' ka', na' ble'gakile' stozə Jesúza' ze. Na' ni to kono gollgake' daa ben ble'gakile'.

*Biyon Jesúza' to bi' wew' yoo dii xiwaa
(Mt. 17:14-21; Mr. 9:14-29)*

³⁷ Betiyo, ka biyetjgake' lo yaana', ben' zan wal jatilgake' legake'. ³⁸ Na'ch ladj ben'ka' wne to ben' byo zillj, chi'e Jesúza':

—Maestro, ben goklen bwiagach bi' cha'ni, la' tlis' tyajchgabaan zoa. ³⁹ Dii xiwaa choxa'n leb' na' tokonganz chosyaab', na' chonan ka chazb' shon axt chbia bllin' cho'abaa. Na' chiya dii chonin leb', na' aga cheenin wसानan leb'. ⁴⁰ Ba got'yoid' ben'ki nakgake' li' txen yibejgachgake' dii xiwaa yoob', na' bi gokgake' yibejgake'n.

⁴¹ Na'ch che' Jesúza':

—¿Zi'tegalə chelena', le' ben' mal na' ben' bi chajle'! ¿Zi ka'k'tek chiyal' soalen' le'? Na' ¿zi ka'k'tek chiyal' soid' le'? Da diwa' bi' cho'na' ni.

⁴² Na' ka zej bi'na' kwit Jesúza' na' wchoon dii xiwaa leb' lo yona' na' wyazb' shona' sto shii. Na'ch bsheshlen Jesúza' dii xiwaa na' bichejan, na' biyakib'. Na' biyone'b' lall' na' xabaa. ⁴³ Na' yog' ben'ka' lle' na' bibangakile' daa ble'gakile' yel' wak xen che Chioza'.

*Sto shii wdixjee Jesúza' witgake'ne'
(Mt. 17:22-23; Mr. 9:30-32)*

Na' shlak chibani yog' ben'ka' ble'i daa ben Jesúza', na' golle' ben'ka' nakgake'ne' txen:

44 —Li wzeyen' nagle dga inia' le': gongake' nad', Ben' Bsel' Chioza' Yell-lioni, lall' na' ben'ka' chakzi' chakzbani nad'.

45 Na' bi wyajni'gakile' bin golle', la' ni ngashaan lawe'ka' kwenche bi shajni'gakile'n. Na' bllerb-gake' inabgakile'ne' bi zejin daa golle' legake'.

¿Noran zak'chi?

(Mt. 18:1-5; Mr. 9:33-37)

46 Na' wzolo chakdil-len ljwellgake' nogaken' nak ben' zak'chi. 47 Ka gokbe'i Jesúza' daa chza'lall'gake', na'ch wdooyoe' to bi'do' na' bzie'b' kwite'na'. 48 Na' chi'e legake':

—Nottezə ben' wlebe' laa to bi'do'zə ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'. Na' beena' chaki bibi zakee lao yog'le, len' nake' ben' zak'chi ladjlena'.

Beena' bi chakile' cho' zi', txenkzan nake' cho'

(Mr. 9:38-40)

49 Na'ch goll Juanna'ne':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben'. Na' bllon-nto' gone' ka', la' bi nake' cho' txen.

50 Na' che' Jesúza' legake':

—Bi wllonle gone' ka', la' beena' bi chakile' cho' zi', txenkzan nake' cho'.

Jesúza' bsheshlene' Jacóbona' len Juanna'

51 Na' ka ba zoa yiyaj Jesúza' yabana', na'ch btoblallee yiyaje' Jerusalénna'. 52 Na' bselee ben' wllialozegagake' na' wyajgake' to yell daa mbani Samáriana' jtiljgake' gana' yigaane'. 53 Na' ben' Samáriaka' bi blebgake'ne' daa nezgakile'

Jerusalénna'lan yiyaje'. ⁵⁴ Na' chop ben'ka' nakgake'ne' txen, Jacóbona' len Juanna', ka ble'gakile' ka ben ben' Samáriaka', na' che'gake' Jesúza':

—Xan', ¿acheenilo' inabinto' Chioza' wselee yi'na' kwenche sheytega ben'ki?

⁵⁵ Na' biyechj Jesúza' bsheshlene' legake', chi'e:

—Aga nezile non chñabia' yichjllall'do'lena' nazle ka'. ⁵⁶ Nad', Ben' Bsel' Chioza' Yell-lioni, aga zaa kwenche wliayaa yel' mban che ben', san zaa kwenche yisla' yel' mban che'kan'.

Na'ch biyajgake' yell yoblə.

Ben'ka' goklall' lljano Jesúza'

(Mt. 8:19-22)

⁵⁷ Na' ka zejgake' tneza', to ben' chi'e Jesúza':

—Xan', cheenid' sa'len' li' gattezə shajo'.

⁵⁸ Na' che' Jesúza'ne':

—Zoa yech ga chiyoo bez'ka', na' byiñdo'ka' non lilldo'gakb, san nad', Ben' Bsel' Chioza' Yell-lioni, biga de yigaan'.

⁵⁹ Na'ch che' Jesúza' sto ben':

—Da dino nad'.

Na' beena' chi'ene':

—Xan', ben goklen be' latj zigaate lljakwashaa xa'na'.

⁶⁰ Na'ch che' Jesúza'ne':

—Bibi gakilo', wikwash'kzə ljwell ben' wetka'. San li', jtixje'i ben' ka nak yel' wñabia' che Chioza'.

⁶¹ Na'ch sto ben' yoblə chizi'e Jesúza':

—Xan', cheenid' sa'len' li' per zigaate be' latj lljalaach' dill' bish' ljwell'ka'.

⁶² Na' che' Jesúza'ne':

—To ben' chwaane' goon, aga wak wwie' gozkoll'la. Na' ka'kzan nakan che beena' noe' nad', shi bi nchoglallee aga wak gone' ka cheeni Chioza'.

10

Jesúza' bselee guiyon shllin ben' jtixje'gake' cho'a xtilleena'

¹ Na' ka wde dga, Jesúza' wleje' zi guiyon shi ben'^{*} na' bselee chop weje' wllialogake' lawe'na' kwenche llje'gake' cho'a xtilleena' yellka' gana' lia bia' shaje'. ² Na' golle' legake':

—Dii li nia' le', dii xen wal daa yizi' yilaple de, na' to choptgui wen llinka' zoa. Na' li inabi Chioza', beena' nak xan llinna' wsel'stoe' wen llinka' kwenche yizi' yilapgake'n. ³ Li shajshki naa, nad' chselaa le' ka xil'do' ba zej ladj ba znia. ⁴ Bi wa'le ga koo xshinlazole, ni mech, ni zi shkwe' xel-le; na' bi shazile wwaple ben' chiox tneza'. ⁵ Na' ka sho'le to lill ben', zigaate wwaplene' chiox, ye'lene': “Soashgale mbalaz, le' zoale yooni.” ⁶ Na' shi zoa ben' cheenile' soe' mbalaz, na' yel' mbalaza' yigaanlenan le'. Na' shi bi cheenile', na' yibiilenan le'. ⁷ Na' yoonaa' gana' illinle na'tezə yigaanle na' yeej gaole kon bi gongake' le', la' to wen llin chiyal' ikaa laxje'. Na' bi lljsoale to to yoo. ⁸ Kat' illinle to yell ga wlebgake' le', yeej gaotezle bittezə dii gongake' le'. ⁹ Na' yiyonle ben'ka' bi shao' yella', na' ye'le legake': “Yel' wnabia' che Chioza' ba bla'n laoleni.” ¹⁰ Na' shi illinle to yell ga bi wlebgake' le', li yide lyell, li ye'gake': ¹¹ “Axt bishte che yell cheleni wllia ni'anto'ni chibibnto'n kwenche

* 10:1

gakbe'ile aga wenan chonle bi chleble cho'a xtil' Chioza'. Na' li koosha yichjle dga inanto' le', yel' wñabia' che Chioza'n ba bla'n laoleni.” ¹² Na' nia' le', beñ'ka' lle' yellka' gana' bi wlebgake' le', dii xench nak yel' zak'zi'na' ile'gakile' aga ka beñ' yell Sodómaka' llana' wchoglo Chioza' che beñ'.

Beñ'ka' bi bzenag xtil' Jesúza'

(Mt. 11:20-24)

¹³ 'iNyesh'laz gak chele, le' beñ' yell Corazín na' le' beñ' yell Betsaida! La' shel' gok yel' wakka' yell Tírona' na' Sidónna' ka diika' ba gok ladjlana', kana'telja biyaj bilengakile' saaxya che'ka', na' ba wche'gake' bwazjgake' dena' yichjlaogake' na' gokwgake' lech' zeshaa, kwenche wli'gake' nan ba biyaj bilengakile' daa chongake', shel'ka'. ¹⁴ Kat' illin lla wchoglo Chioza' che beñ', yel' zi' xench ile'ile aga ka beñ' yell Tíroka' na' beñ' yell Sidonka'. ¹⁵ Na' le' beñ' yell Capernaúm, bi gonle lez yillinle yabana', la' Chioza' wzalee le' gana' sak'zi'le.

¹⁶ Na'ch che' Jesúza' beñ'ka' bselee:

—Beñ'ka' chzenaggake' chele, cha'kzan chzenaggake'. Na' beñ'ka' bi chlebgake' le', nad'kzan bi chlebgake'. Na' beena' bi chlebe' nad', lezkka' bi chlebe' Chioza', beena' bsel' nad'.

Billin beñ'ka' guiyon shi

¹⁷ Na' beñ'ka' guiyon shi† le chibagakile' ka billingake' kwit Jesúza', na' che'gake'ne':

—Xan', axt dii xiw'ka' chilleshgakan ka chzetjnto' lio'na'.

¹⁸ Na'ch che' Jesúza' legake':

† 10:17

—Ble'id' Satanáza' daa chñabia' dii xiw'ka' bxopan yabana' ka chxop to yi' wziw'. ¹⁹ Nad' ba ben' le' yel' waka' kwenche la'kzi gad' no bel' zña wa no bexjoni' le' aga bi gakile', na' wlej wshoshjtele yog' daa chon dii xiwaa. ²⁰ Per bi yibaile daa chisheshle dii xiw'ka', san li yibayi daa ba da' lelana' lee libra' de yabana'.

Jesúza' bibaile'

(Mt. 11:25-27; 13:16-17)

²¹ Na' katena' Espíritu Sántona' bene' ka bibachgayi Jesúza', na' wne':

— Xa, li' nako' Xan yabana' na' yell-lioni, na' choe'lawaa li' daa ba bliilo' ben'ka' bibi chajni' daa bi bliilo' ben' sin'ka' na' ben'ka' nteyi. Kan' ba wyazlalloo gono', Xa.

²² 'Xa'na' ba none' lall' na' yog'te dii de. Na' ni to kono nezi noyen'an' nak' nad' Xiine'; toz Xa'na' nezile'n. Na' ni to kono nezi noyen'an' nak' Xa'na'; toz nad' Xiine' nezid', na' chon' ka inezi ben'ka' cheenid' inezgakile'n.

²³ Na'ch biyechje' bwie' ben'ka' nakgake'ne' txen, chi'e legake':

—Chakomba ben'ka' chle'gakile' diika' chle'ile naa. ²⁴ Nia' le' ka', la' zan ben'ka' wdixjee daa goll Chioza' legake' na' zan ben' wñabia'ka' goklall'gake' ile'gakile' diiki chle'ile naa, na' bi ble'gakile'n. Goklall'gake' yengakile' dga chenile naa, na' bi bengakile'n.

To ben' Samaria bene' to dii wen

²⁵ Na'ch wbig' to ben' chli' chsedi leya' wñabile' Jesúza' kwenchezə inezi' shi wak yillii Jesúza' xtilleena', na' wñabile'ne':

—Maestro, ¿bin chiyal' gon' kwenche gat' to yel' mban cha' zejli kani?

26 Na'ch che' Jesúza'ne':

—¿Bin na leya' chiyal' goncho? ¿Bi na daa chlabo'?

27 Na'ch beena' chli' chsedi leya' chi'e:

—“Chiyal' gakicho Xancho Chioza' do yichj do lall'cho, do ka nak fuerz chechona', na' axt ga zeelo chajniicho; na' gaki bish' ljwellcho ka chaki kwincho.”

28 Na'ch che' Jesúza'ne':

—Kayen'nan nakan ka ba wno'. Shi gono' ka nan, na' gat' to yel' mban cho' zejli kani.

29 Na' beena' bi goklall' wnit kwine', na'ch chi'ene':

—¿Noran bish' ljwell'?

30 Na'ch che' Jesúza'ne':

—To ben' ziyo'e nez daa ziza' Jerusalénna' daa ziyaj Jericólá, na' bchej wbanka' tneza' wlangake' yog'te diika' zino'e axt len xe'na' daa nakwe' golj-gake', na' bet wdingake'ne', sto chdoaze' bengake', na' bixonjgake'. 31 Na' shintk gok ka' ka wde to bxo'z lo neza'. Na' ka ble'ile' beena' de na', to wdeze' ka'lá. 32 Na' lekzka' wde to ben' nake' xiin dia che dii Levína'. Na' ka ble'ile' chtol beena' na', lekzka' to wdeze' ka'lá. 33 Na' sto ben' Samaria lekzka' zeje' tneza' ka ble'ile' beena' chtol na', na' biyeshile'ne'. 34 Na' jabiguee kwite'na', na'ch blie' lo we'na' set na'ch vino, na' bcheje'n. Na' bilepe'ne' koll' bayix' che'na', bichi'ene' to yoo gana' wdape'ne'. 35 Na' betiyo, ka ba zoa yiza' ben' Samáriana', wleje' chop

mech plat[‡], na' bi'en xan yoona' kwenche gap wwie'ne' zan lla, na' chi'ene': "Wdap bwiagach beeni, na' shi bi gaki mechi chkwaan', na' yiyixja'n kat' zizaa dii yoblə." ³⁶ Na' ħnora beñ'ki shon chakilo' beni bish' ljuwell beena' wlan beñ' wbanka'?

³⁷ Na' beena' chli' chsedi leya' chi'ene':

—Beena' biyeshile'ne'.

Na' che' Jesúza'ne':

—Lekzka' li', kan' chiyal' gono'.

Jesúza' jawie' Mártana' na' Maríana'

³⁸ Na' shlak ngoo Jesúza' nez, blline' to yelldo' na' to noolə le Marta blebe'ne' lille'na'. ³⁹ Na' zoa to beñ' bil Mártana' lie' María, na' Maríana' wchi'e lao Jesúza' chzenague' dillaa cho'e. ⁴⁰ Na' Mártana', dechga daa gone' na' wzeche' wneyi cheyin, na'ch wyaje' kwit Jesúza', chi'ene':

—Xan, goll-lat' beñ' bila'ni gaklene' nad'. Toz' ndakw' yog' mandadka'.

⁴¹ Na' che' Jesúza'ne':

—Marta, Marta, chi'chga yichjo' na' zechgo' wneyi cheyi diika' gono'. ⁴² Per toz daa de nakan dii llialoch na' Maríani ba wleje'n, na' kono gak yikaan lawe'na'.

11

Bli' Jesúza' nak we'lwillgake' Chioza'

(Mt. 6:9-15; 7:7-11)

¹ Shlin choe'lwill Jesúza' Chioza' to latj, na' ka biyoll be'lwille'ne', to beena' nake'ne' txen golle'ne':

[‡] **10:35** Mech plat: dill' griegona' nan denario, na' nakan to mech dii zak' che shlla llin.

—Xan', bli'yi neto' nakan chiyal' we'lwillnto' Chioza', ka ben Juanna' bli' bsedile' beŋ'ka' ben-gake'ne' txen.

² Na'ch che' Jesúza' legake':

—Kat' we'lwill-le Chioza' kin inale:

Xanto' Chios, beŋ' zoa yaba,

we'la'oshga yog'lol beŋ' li'.

Na' inabia'gacho' loo yichjlall'do' yog'lol beŋ'

kwenche gak lo yell-lioni ka chazlalloo, kon ka chak yabana'.

³ Ka nak daa chono' cheej chaonto' yog' lla, beŋgachan ŋaanlla.

⁴ Wxi'xen chento', ka chon neto' chzi'xennto' bit-tezə dii choni beŋ' neto'.

Bi we'gacho' latj ibixnto' gonnto' daa bi nak wen, san bislagach neto' lo ŋi'a na' dii mala'.

⁵ Na'ch che' Jesúza' legake':

—Inatezcho shi zoa to beŋ' nllaguile na' do chel shajle lille'na' na' ye'lene': “Beŋ' bish'dawaa, beŋ shloll nad' shon yetxtil, ⁶ la' ba bla' lilla'na' to beŋ' nllaguid', zee zit', na' bikzə bi de cha' wshabidee.” ⁷ Na'ch beena' yoo loolə lii inatie' le': “Bi gonzilo' nad' zed, ba nsejl' lillii na' ba delen' bi' cha'ki. Aga wak chas' gon' daa chyalljilo'.”

⁸ Na' nia' le', la'kzi nllagteile'ne', bi chase' wi'ene' daa chŋabile'ne'. San shi seyide' inabe'n, chen ki cheenile' chase' wi'e yog' daa chyalljile. ⁹ Daan nia' le': Li inabi Chioza' bin cheenile na' gone'n. Li yiyiljan na' willelkzilen. Li wtankw lee puerta', na' wsaljke'n. ¹⁰ La' beena' chŋabile' to bi chŋabile' beŋ', cho'ene'n; na' beena' chiyilje' bi chiyilje', chillelkzile'n; na' beena' chtankwe' to lee puert, na' chsaljkzgabe'n.

¹¹ 'Ka chak chele le' nakle beŋ' chisgol chischoo bi'do', ka inabi xiinlena' le' yetxtila', aga we'leb' to yaj. Wa shi inabib' le' to beŋ gaob', aga we'leb' to beŋ zña. ¹² Wa shi inabib' le' to llit gaob', aga we'leb' to beŋjoni'. ¹³ Le' naktele beŋ' mal, chak we'le xiinleka' daa nak dii wen. ¡Na' Xacho Chioza' zoa yabana' nakteche' beŋ' wench! Na' wi'e Espíritu Santo che'na' soe' loo yichjall'do' yog' beŋ' inabe'ne'.

Nagake' Jesúza' chibeje' dii xiw'ka' kon yel' wak che Bezlona'

(Mt. 12:22-30; Mr. 3:19-27)

¹⁴ Jesúza' chibeje' to dii xiw' yoo to beŋ' bi chak inie', na' ka bichejan na'ch gok binie'. Na' beŋ'ka' lle' na', bibangakile' daa bene'. ¹⁵ Na' bale' che'gake':

—Kon yel' wak che Bezlona', daa chñabia' dii xiw'kan', chibeji beeni dii xiw'ka'.

¹⁶ Na' zi bale' wñabgakile'ne' gone' to yel' wak dii ile'gakile' kwenche wli'n shi Chioza'kzan bseleene'.

¹⁷ Na' ba ñezli Jesúza' daa chza'lall'gake', na'ch chi'e legake':

—Shi beŋ'ka' lle' to yell gakgake' choplə na' til-len ljwellgake', na' kwiayi' yella', shi ñaa. Na' lekzka' shi beŋ'ka' lle' toz yoo til-len ljwellgake', aga ssha soagake' toz. ¹⁸ Na' ka'kzə Satanáza' na' dii xiw'ka' yoo lo na'yin, shi gakgakan choplə na' kwiayi' yel' wñabia' cheyinna'. Nia' le' ka' daa nale yel' wak che Bezlonan* chibejid' dii xiw'ka' yoo beŋ'. ¹⁹ Shi chibej' dii xiwaa yoo beŋ' kon yel' wak che

* **11:18** Bezlonan': lekzannan' Beelzebú de xtil na' nakan sto le Satanáza'.

Bezloná,† ¿sheralə ben'ka' nakle txen? ¿Alezká lənnan' chibejlengake' dii xiwaa yoo ben'? Daa bi nakan ka', chli'n nakllejilen. ²⁰ Na' daa chibej' dii xiwaa yoo ben' kon yel' wak che Chioza', lənnan' chli'n ba bla' yel' wñabia' che Chioza' ladjleni.

²¹ 'Kat' to ben' wal nape' dii gonile' zñia na' chape' lille'na', aga no gak lljtoyo dii de che'. ²² Per shi illin sto ben' walch til-lene'ne', na' gone'ne' gan, na'ch yigoyoe' yog' daa none' lez wñiaile', na' kwantie' yog' daa yoo loo lille'na' na' wi'e lat' wej che ben'ka' nakgake'ne' txen.

²³ 'Beena' bi nake' nad' txen, chakzbanile' nad'. Na' beena' bi chaklen kwenche wzenag ben' cho'a xtill' Chioza', len' chsej chlone' wzenaggake'n.

*Chillin dii xiwaa sto shii gana' bichejan
(Mt. 12:43-45)*

²⁴ 'Kat' chichej to dii xiw' dii yoo ben', na' ch-jadan ga bibi de kzə na' chyiljan gana' yizi'lalliin. Na' shi bi chllelin gana' yizi'lalliin na'ch chakin: "Yiyaachkz' dii yoblə gana' bichejkz'." ²⁵ Na' ka chillinan gana' bichejan, nakan ka to loo yoo dii nxi nloa na' nakan xochi. ²⁶ Na'ch chza'n chjxi'n zi gall dii xiw'ka' daa nakch dii malch aga ka len, na' yogaan choogakan beena'. Na' chaktechlə mal che beena' aga ka gok che' dii nech.

Chakomba beena' chzenag cho'a xtill' Chioza'

²⁷ Na' shlak che' Jesúsá' ka', to noolə zie' ladj ben'ka' lle' na' wñie' zilljə, chi'e:

—¿Chakomba noola' wxane' li' na' bwall bxope' li'!

²⁸ Na' che' Jesúsá'ne':

† **11:19** Bezloná : ləkzannan' Beelzebú de xtil na' nakan sto le Satanáza'.

—jMbalazch beṅ'ka' chzenaggake' cho'a xtil' Chioza' na' chongake' ka nan!

Beṅ'ka' bi chajle' che Jesúza' wṅabgake' wli'e to ye' wak

(Mt. 12:38-42; Mr. 8:12)

²⁹ Na' bdi'a bllagch beṅ'ka' kwit Jesúza' na' golle' legake':

—Le' zoale ṅaa, nxinj yichjlall'do'leka'. Chṅable wliid' le' to ye' wak, na' aga wliid' le' daa chee-nile. Lete ile'ile to dii nak ka ye' wak' daa ben Chioza' che dii Jonáza'. ³⁰ Daa gok che Jonáza' bli'n ye' wak che Chioza' lao beṅ' Níniveka'. Kakzə nad', Beṅ' Bse' Chioza' Yell-lioni, wli'a ye' wak che Chioza' laolena', le' zoale ṅaa. ³¹ Na' llana' wṅhoglo Chioza' che beṅ', na' yiban noola' wṅabia' do lli'lə, na' gawe' xya chele lao Chioza', le' zoale ṅaa, ine' chiyal' sak'zi'le. La' noola', zit' wal wzee bidzenague' dill' sin'na' daa be' dii Salomónna', na' nad' zoa' ni, nak' beṅ' zak'chi ka dii Salomónna', na' bi chzenagle cha'. ³² Na' lekzka' llana' wṅhoglo Chioza' che beṅ', na' yiban beṅ' Níniveka' na' gaogake' xya chele lao Chioza', le' zoale ṅaa, inagake' chiyal' sak'zi'le. La' legake' biyaj bileni saaxya che'ka' ka be'len Jonáza' legake' cho'a xtil' Chioza', na' nad' zoa' ni, nak' beṅ' zak'chi ka dii Jonáza', na' bi chzenagle cha'.

Jalaochona' nakan ka to yi' che kwerp chechona'
(Mt. 5:15; 6:22-23)

³³ Na' lekzka' chi'e legake':

—Biga zoa beṅ' chxene' to kandil na' chzoe'n to ga ngash' wa wdoseen to dii wkwashaan len, san chzoe'n sibə kwenche ile'i beṅ'ka' sho' loo yooná'.

³⁴ Jalawo'ka' nakan ka to yi' che kwerp cho'na'. Shi jalawo'na' nakan wen, doxen kwerp cho'na' zoan lo beeni'na'. San shi bi chle'i jalawo'na', kwerp cho'na' zoan lo yel chola'. ³⁵ Na' bsak' wze wneyi kwenche ki lwaa to' lo beeni'na', tazo' lo yel cholal'a. ³⁶ Shi doxen kwerp cho'na' yoon beeni', na' ni to dii shgasj shchol bi yoon, na' ile'ilo' kwaslōl ka chle'ilo' kat' ze to yi' chzeeni'n doxen.

Jesúza' chsheshlene' fariseoka' na' ben'ka' chli' chsedi leya'

(Mt. 23:1-36; Mr. 12:38-40; Lc. 20:45-47)

³⁷ Na' ka biyoll be' Jesúza' dillaa, na' bche' to fariseo le' lljtawe' lille'na'. Na' wyoo Jesúza' lille'na' na' wchi'e cho'a mesa'. ³⁸ Na' farisewa' bibanile' ka ble'ile' bi bina' Jesúza' ka yoologake' chongake' ka zi' gaogake'. ³⁹ Na'ch che' Xancho Jesúza'ne':

—Le' fariseo nakle ka xig' yeen dii nyib xise' tcho'a tlawin na' lo'inna' besjan. Chaki ben' le ben' wen nakle, len le' chibaile chkaale bi de che ben' na' chibaile chonle bichlō dii mal. ⁴⁰ ¡Le' ben' bi nteyi! ¿Abi chakbe'ile Chioza', beena' ben kwerp chechoni, lekze'n bene' yichjlall'do'choni? ⁴¹ Li izani bi de chele, li we'n ben' bibi de che', na'ch yixi' yiyech yichjlall'do'lena'.

⁴² ¡Nyesh'laz gak chele, le' fariseo! Choe'le Chioza' lat' wej† no yixwej, no kwanirod na' bichlō yix' kwan dii mbekle. Na' bi chonle daa nak shlichā na' bi chakteile' Chioza'. La' daayen'an llialach gonle per lekzka' bi wsanle kwejle daa chṇab Chioza'.

† 11:42 Lat' wej: literalmente la décima parte.

⁴³ 'iNyesh'laz gak chele, le' fariseo! Le chibaile kwe'le gana' chbe' ben'ka' zakii gana' chdop chllagcho choe'lwillcho Chioza', na' cheenile yog' ben' kwee le' balaan ga lle' lla' ben'.

⁴⁴ 'iNyesh'laz gak chele, daa nakle ben' wxiye! Nakle ka to ba che ben' wet dii bi nla' lawinna' dii bi chle'i ben' na' chaj chdegake' lawinna', ni bi chakbe'gakile' bin naki loola.

⁴⁵ Na'ch to beena' chli' chsedi leya' golle' Jesúza':
—Maestro, daa no' ka' len neto' chzoazi'yoo.

⁴⁶ Na' goll Jesúza':

—iLekzka' nyesh'laz gak chele, le' chli' chsedile leya'! Dii zan dii che'le ben' chiyal' gongake', na' nakan ka to yoa' xen dii chwa'le legake' dii kono soyi, na' le' bikz bi chda na'le kwenche gaklenle legake'.

⁴⁷ 'iNyesh'laz gak chele! Le' chonshao'zle cho'a ba che dii ben'ka' wdixjee daa goll Chioza' legake', ben'ka' bet dii xozxto'leka'. ⁴⁸ Na' daa chonle ka' zejín chonle txen dii xozxto'leka' ka nak daa bengake'. La' legaken' betgake' ben'ka', na' le' chonshao'le cho'a ba che'ka'.

⁴⁹ 'Na' daan, lo yel' sin' che Chioza' wne': “Wselaa ben' chixjee daa yepee na' len ben' wi'e cho'a xtillaana', na' bale' witgake' na' zi bale' biya dii gongakile'ne'.” ⁵⁰ Na' le' zoale naa, lenle ile'ile ka yel' zi'na' ile'i ben'ka' blalj xchen dii ben'ka' wdixjee daa goll Chioza' legake', wzolozan ka wxw wzil yell-lioni. ⁵¹ Le' zoale naa, lenle chido'lle sak'zi'le ni che yel' wit che dii Abela' axt dii Zacaríaza', beena' betgake' cho'a yoodo'na' kwit gana' chzeygake' bayix'ka'.

⁵² 'iNyesh'laz gak che, le' chli' chsedile leya'! La' nazle chsedile ben' che Chioza', per ni le' bi cheenile wzenagle daa nan, na' chllontele shajni ben'ka' chzenagan.

⁵³ Na' ka goll Jesúza' ka', ben'ka' chli' chsedi leya' na' fariseoka' zizikli blaaagake' na' wzologake' chongakile'ne' zed wal wñabgakile'ne' chiya dii nak lallj, ⁵⁴goklall'gake' we' Jesúza' dill' dii wchix'a'n le'.

12

Dill' wxiye' che fariseoka' zaklebin levadúrana'

¹ Na'ch bdop bllag ben' zan inleeb gana' zoa Jesúza' axt chdakw ljwellgake', na' wzoloe' zigaate be'lene' ben'ka' nakgake'ne' txen dill', chi'e:

—Wsak'gale bi shajle'le dill' wxiye' che fariseoka' daa zaklebi levadúrana'. ² La' daa kono nezi naa, wllin lla inezi benaan, na' yog'lol daa ngash' naa, wllin lla ila' lawin. ³ Na' yog' daa chakile kono beni daa wnale, wllin lla inezgakile'n. Na' daa wnale ka yoole loolə nsejshoshle yoona', axt gosya'i ben' wzie'n dill'.

Beena' chiyal' illebcho

(Mt. 10:26-31)

⁴ 'Le' nllaguid', nia' le' bi illeble ben'ka' witgake' le', la' kachokzan zeelo gak gongakile' le'. ⁵ Per ni inia' le' non chiyal' illeble: li illeb Chioza', la' ka yiyoll yikee yel' mban chelena' lekzka' nape' yel' wñabia' wzalee le' lo yi' gabila'. Len', li illeb.

⁶ 'Nezicho wak si'cho gay' byindo' kon chop sintabdo'. La'kzi aga bitek zak'gakb, ni tob bi mbej yichj Chioza'. ⁷ Na' ka'kzə le', axt to to yish'

yichjlēna' mbab. Na' bi illeble, la' zak'chle aga ka zan byindo'ka'.

*Ben'ka' chchebgake' nakgake' Crístona' txen
(Mt. 10:32-33; 12:32; 10:19-20)*

⁸ 'Na' nia' le', beena' wchēb lao ben' nake' nad' txen, lekzka' nad', Ben' Bsel' Chioza' Yell-lioni, wi'a dill' lao yog'lol' anjl che Chioza', yepgakee beeni nake' nad' txen. ⁹ San beena' bi wchēb nake' nad' txen, lekzka' nad', wi'a dill' lao yog'lol' anjl che Chioza', yepgakee beeni bi nake' nad' txen.

¹⁰ 'Na' beena' biz gon ina cha', nad', Ben' Bsel' Chioza' Yell-lioni, wizi'xen Chioza' che', san beena' ine zban che Espíritu Sántona', aga wizi'xen Chioza' che'.

¹¹ 'Kat' lljwa'gake' le' lao ben'ka' chnabia' gana' chdop chllagcho choe'lwill-cho Chioza', wa lao ben' chchogbia' che ben' wa lao joschis, bi sele wneyi naklə yilliile cho'a xtill' ben'ka' wa bin inale. ¹² La' kat' inele, Espíritu Sántona'kzan wzajniile' le' daa chiyal' inale.

Dii nxolla' nsa' yel' wni'ana'

¹³ Na' ladj ben'ka' ndop nllag wne to ben', golle' Jesúza':

—Maestro, gollgach ben' bishaana' gone' daa chidol' ikaa che dii xanto'na'.

¹⁴ Na' che' Jesúza'ne':

—¿Nora bzoa nad' ladjleni ka to ben' chon yel' joschis che ben' wa ben' chlāa bi dii de che ben'?

¹⁵ Na' lekzka' chi'e:

—Li wsak' kwenche bi selall'le gat'ch bi gat' chele, la' aga dii kan' llialo lo yel' mban chelena'.

¹⁶ Na'ch bzoe' to jempl, chi'e legake':

—Wzoa to beṅ' wni'a na' dii zan bizi' bilape' lo yell-lío che'na'. ¹⁷ Na'ch chakile': “¿Nakra ka gona'n ṅaa? Biga de kooshawaa dga bizi' bilap'.” ¹⁸ Na'ch wne': “Ba ṅezid' bi gon'. Yiçhiṅj' yoona' gana' chgooshawaa daa chizi' chilap' na' yiyona'n dii xench, na' kooshawaa daa bizi' bilap' na' bichlə dii de çha'. ¹⁹ Na'ch zan yiz yizia' banez che daa ngooshawaa, na' yizi'lallaa na' yeej gaw', na' soa' mbalaz.” ²⁰ Na' goll Chioza'ne': “Li', beṅ' bi nteyi, ṅaanlle' gueto' na' daa ngooshawoo, nola cheyi gakan.” ²¹ Kan' gak che beena' chtop chshag yel' wni'ana', na' bibi zakee lao Chioza'.

Chioza' chap chwie' beṅ'ka' nak xiṅe'

(Mt. 6:25-34)

²² Ka wde dga, Jesúza' golle' beṅ'ka' nakgake'ne' t xen:

—ṅaa nia' le': Bi sele wṅeyi che daa yeej gaole, ni bi sele wṅeyi che xalaanlena'. ²³ La' zak'techlə yel' mban çhelena' aga ka daa yeej gaole, na' zak'tech xkwerplena' aga ka xalaanlena'. ²⁴ Li wwiakachi beçhjka', la'kzi bi chaz chaṅgakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Chioza' legakb. Na' le', ṅaa, zak'techle aga ka bado'ka' ze lo llazə. ²⁵ Ni tole bi gak yisçhoochle yel' mban çhelena' ni zi tgor la'kzi nall inleeb selen wṅeyi. ²⁶ Shi dga nak diido'zə bi chak gonlen, ¿beraçhe zezle wṅeyi che bichlə dii yoblə?

²⁷ Li wwiakachi ka chgol yejdo'ka', len aga bi llin chongakan ni bi cholgakan do. Na' nia' le', ni Salomónna', beena' wdapchga yel' shao'ka', bi bllin gak xe'na' xochi ka yejdo'ka'. ²⁸ Shi Chioza'

none' xochi yejdo'ka' ze lyixaa, la'kzi xtitchgan mbanan na'ch wtop ben' len wlli'en lo yi'na', ¿alechlin ki gone' chele, la'kzi bitek chajle'le gaklene' le'? ²⁹ Na' daan bi setekle wneyi ga sa' daa yeej gaole. ³⁰ La' ben'ka' bi nonlilall'gake' Chioza' to daazə chinogake'. Per le', Chioza' nake' Xale, na' nezile' chyalljilen. ³¹ Li se wneyi wzenagle che Chioza' kwenche inabi'e le', na' gonkze' yog' daa chyalljile.

Yel' shao' daa de yabana'

(Mt. 6:19-21)

³² Bi illeble. La'kzi bi nyanle, Xacho Chioza', yel' ben' wen che'na', chaklallee yillinle inabia'lenlene' gana' chnabi'e. ³³ Li wit' wde bi de chele, na' li gaklen ben' bibi de cheyin. Shi ka' gonle, na' gat' yel' shao' chele dii bi te cheyin yabana' gana' bi gak kwan wbanna'n, ni bi iteban. ³⁴ Na' gana' de yel' shao' chelena', na'kzan se yichjlall'do'lena' wneyi.

Chiyal' se kwascho ka yiyed Jesúza'

³⁵⁻³⁶ Na' lekzka' chi'e legake':

—Li gacto ka wen linka', ben'ka' chbezgake' xane'ka' yilline' daa zeje' to ga chak wishagna'. Na' toshiizi chi'gake' chbezgake'ne' na' nox'tegake' yi' che'ka' kwenche kate wtankwe' lee puerta' lii wsaljtegake'n. ³⁷ Chakomba wen linka' chbezgake' kat' yillin xane'ka', la' dii li nia' le', kwine' kweke' legake' cho'a mesa' na' wi'e dii gaogake'. ³⁸ Chakomba ben'ka' chbezgake' yillin xane'ka' la'kzi yilline' do chel wa do zbalzə. ³⁹ Na' chiyal' shajniile dga, shel'ka' to xan yoo inezile' bi gor illin wbanna' lille'na', wbe'noe'ne' na' bi wi'e latj sho'e lille'na' kwane'. ⁴⁰ Ka'kzan le' chiyal' sele wneyi

toshiizi kwezle nad', Ben' Bsel' Chioza' Yell-lioni,
la' tokonganzə yiyed'.

*Wen llinna' chon wen na' beena' bi chon wen
(Mt. 24:45-51)*

⁴¹ Na'ch wṇabi Pédróna' Jesúza', chi'ene':

—Xan', ¿ato neto'zan no'ka', anti che yog' beṇaan
no'ka'?

⁴² Na'ch goll Xancho Jesúza':

—¿Nakra chakile chon to wen llin wen, ben'
ṇezi nak gone' llinna', shi xane'na' gone' lall' nee
yog'te beṇ'ka' zoa loo yoo lille'na' kwenche wweej
wwawe' legake' gor cheyin? ⁴³ Chakomba wen
llinna' chilalile' chone' daa nak lall' nee ka yillin
xane'na'. ⁴⁴ Dii li nia' le', xane'na' gone' lall' nee
yog'lol dii de che'. ⁴⁵ Na' shi wen llinna' gakile':
“Akza naa yila' xan'na'”, na'ch soloe' gonile' zban
wen llinka' sto, ka nool ka ben' byo, na' soloe' yeej
gawe' na' sollile'. ⁴⁶ Na' tokonganzi yillin xane'na'
llana' bi none' lez, na' wdie'ne' to yel' zi' wal kon
ka ba nchogloe' gak che beṇ'ka' bi chongake' daa
chiyal' gongake'.

⁴⁷ 'Ben' wen llinna' ṇezi bin cheeni xane'na'
gone', na' bi chone'n ni bi zie'n wṇeyi, na' wit
chinchga xane'na' le'. ⁴⁸ Per beena' bi ṇezi bin
cheeni xane'na' gone', na' chone' dii chonan ka
wsak'zi' xane'na'ne', agalə wsak'zi'teke'ne'. La'
beena' be'lenyenee dill' nakan gone', chonan byen
gonyenee ka bzajniile'ne'. Na' beena' ba bene' lall'
nee gone' dii zan dii cheenile' gone', chonan byen
gone' yog'lolte diika' bene' lall' nee.

*Gak ben' choplə ni che Jesúza'
(Mt. 10:34-36)*

49 'Daa bid' yell-lioni nakan ka in_acho yin' bidxen'. Na' cheenchgaid' shel' naate ba chal'ninan. 50 Biya dii yen ile'id', na' le ba chakyeshid' axt ni illini llana'. 51 ¿Achakile bid' yell-lioni kwenche gon' ka soalen ljwell ben' mbalaz? Aga kan', san daa bid' illaa ljwellgake' na' gakgake' choplə. 52 La' naa, shi to yoo lle' gayee, na' gakgake' choplə, shonə' til-lengake' ben'ka' chop, na' ben'ka' zi chop til-lengake' ben'ka' zi shonə. 53 Xa bi' byona' til-lene'b', na' leb' til-lem' xabaa. Na' xna' bi' noola' til-lene'b', na' leb' til-lem' xna'baa. Na' noola' til-lene' xoolille'na', na' xoolille'na' til-lene' le'.

Bi chajni'gakile' bi zejin daa chon Jesúza'
(Mt. 16:1-4; Mr. 8:11-13)

54 Na' lekzka' che' Jesúza' ben'ka' lle' na':

—Kat' chle'ile ziza' beja' gana' chxoalə wbillə, lii natele: “Wakə yeja”, na' kayen' chak. 55 Na' kat' chde be'na' daa za' lli'lə, na' nale: “Le zey'chga yizak”, na' kayen' chak. 56 ¡Le' ben' wxiye! Kat' chle'ile bin chak xan yabana' na' lo yell-lioni nezile beran gak. ¿Biche bi chakbe'ile bin zeji daa chon Chioza' llaki zoacho naa?

Chiyal' yiyoe'xencho ben'ka' chao xya checho
(Mt. 5:25-26)

57 ¿Biche ki chiyiljle to kwinzle daa nak dii li dii shao'? 58 Shi no chao xya chele na' wchi'e le' lao joschiska', li gon byen yiyoe'xenlene' tneza'. La' shi lljwee le' lao beena' chchogbia' che ben', na' le' gone' le' lo na' beena' wseje' le' lillyana'. 59 Na' nia' le', aga wichejle lillyana' axt ki chixjle doxen daa chiyal' chixjle.

13

Chiyal' yiyaj yilenicho dii malka' choncho

¹ Na' lo llana'tezə bllin bał ben' lao Jesúza' gollgake'ne' ka ben Pilátona' bene' mandad betgake' bał ben' Galiléaka' ka chitgake' bayix'ka' choe'la'ogake' Chioza'. Na' xchene'ka' biyakan toz kon xchen bayix'ka' betgake'. ² Na' che' Jesúza' legake':

—¿Achakile ben' Galiléaka' betgake' nakchgake' ben' malch aga ka nochlə ben' wlall che'ka'? ³ Nia' le' bi nakan ka'. Shi le' bi yiyaj yilenile dii malka' chonle, lezkza' yog'le kwiayi'. ⁴ Shera ben' Jerusalénka' shin'shonə, ben'ka' wit daa bdakwgake' yoo siba' daa zoa Siloéna', ¿achakile' napchgake' dol' aga ka ben' wlall che'ka'? ⁵ Nia' le' bi nakan ka'. Na' shi le' bi yiyaj yilenile dii malka' chonle, lezkza' yog'le kwiayi'.

Jempl che yag yixwewa' daa bi wllia

⁶ Na'ch bzoa Jesúza' to jempl, chi'e ben'ka':

—To ben' zoa to yag yixwew lo yell-lío che'na' gana' naze' yag uvaka', na' wyaje' jawie' shi llian yixwewa', na' ka blline' ni tlish' bi llian. ⁷ Na'ch chi'e beena' chap yell-lío che'na': “Ba gok shon yiz chidwia' shi llian yixwewa', na' ni to bibi chbian. Bchogchoklan, la' nlanchokzan yell-lioni.” ⁸ Na' beena' chape' yell-lío che'na' chi'e: “Xan', zi zoashkin zi twiz na' wcheen' xaninna' na' wlla'n ben'na'. ⁹ Shera shicholə wbian. Na' shi bi wlliakzan, na' wchogo'n.”

Biyon Jesúza' to noolə llana' chombaan ben' Israelka'

10 Na' to lla sabd, llana' chombaan̄ ben' Israelka', chli' chsedi Jesúza' ben'ka' chdop chllag gana' choe'lwillgake' Chioza'. 11 Na' len to noolə ba gok shin'shon̄ yiz nlew dii xiwaa le', na' bichkzə gok yizie' shli. 12 Na' ka ble'i Jesúza'ne' wñie'ne' na' golle'ne':

—Noolə, ba bikwas yillwe' cho'na'.

13 Na'ch b̄xoa neena' koll' noola' na' katena' lii bizetie' shlich̄a, na' wzoloe' choe'lawee Chioza'. 14 Na' beena' chgoo x̄nezi cheyi diika' chongake' gana' chdop chllaggake' bllee daa biyon Jesúza' noola' llana' chombaan̄gake', na'ch chi'e ben'ka' lle' na':

—De x̄op lla goncho llinna', na' bittezə llaka' yidle kwenche yiyakile, na' bi gonle lez yiyakile' llani chombaan̄cho.

15 Na'ch che' X̄ancho Jesúza' legake':

—Le' ben' wxiye', ¿abi wsell-le goon̄ cheleka' wa burr cheleka' lljaweejlegakb nisa' llani chombaan̄cho? 16 Nooli nake' xiin̄ dia che dii Abraham̄a', na' ba gok shin'shon̄ yiz Satanáza' daa chñabia' dii xiw'ka' nonan le' ka ben' ncheje'. ¿Ana' chakile bi nakan wen biyonee llani chombaan̄cho?

17 Na' ka goll Jesúza' ka', yog' ben'ka' chakzban-gakile'ne' biyii bido'gakile', na' yog' ben'ka' sto bibagakile' daa ble'gakile' yel' wakka' chone'.

Jempl̄ che sa mostásana'

(Mt. 13:31-32; Mr. 4:30-32)

18 Na'ch wna Jesúza':

—¿Nakra ka nak yel' wñabia' che Chioza', lla? Na' ¿bera ka wsaklebida'n? 19 Zaklebin sa mostásana' daa goz to ben' lo yell-lío che'na', na' ka bla'n na'

bgolan gokan to yag xen na' axt byindo'ka' ben lillbka' lo xoziinna'.

Jempl che levadúrana'

(Mt. 13:33)

²⁰ Na' lekzka' chize' Jesúza':

—Dga sto wsaklebida'n yel' wñabia' che Chioza'.

²¹ Zaklebin levadúrana' daa chchix to noolə shoña rob yezj kwenche yisgolan kwa che yetxtila'.

Chiyal' sho'cho puertdo'naz

(Mt. 7:13-14, 21-23)

²² Shlak ziyaj Jesúza' Jerusalénna', bidie' yell yelka' na' yelldo'ka' na' bli' bsdile' ben'. ²³ Na' bchej to ben' wñabile'ne', chi'ene':

—Maestro, ¿ato chopchga ben' yila bi kwiayi'gake'?

Na'ch che' Jesúza'ne':

²⁴ —Li gon byen sho'le cho'a puert daa nak diido'zə kwenche soalenle Chioza'. La' ben' zan gaklall'gake' sho'gake'n, na' bi gak sho'gake'.

²⁵ Na' ka solla' xan yoona' wseje' puerta', na' le', igaanle cho'a puerta'wtankwle le'inna' na' ye'lene': “Ben'do', bsaljgach kwenche sho'nto'.” Na' xan yoona' ine' le': “Bi nombi'a le' ni bi nezid' ga ben' le'.”

²⁶ Na'ch ye'lene': “Weej wdaolennto' li' txen, na' bli' bsdilo' neto' yell chento'na'.” ²⁷ Na'ch ine' le': “Bi nombi'a le', ni bi nezid' ga ben' le'. Li lljayaak do na'lə yog'lol-le le' ben' wen dii mal.”

²⁸ Na' kwellchgale axt gaoxaxj leylena' daa le gak-shejlall'le ka ile'ile dii Abrahama', dii Isaaca', dii Jacoba' na' yog' dii ben'ka' wdixjee daa goll Chioza' legake' lle'gake' yabana' gana' chñabia' Chioza', na' le', bi gok yiyoole. ²⁹ Na' wde wdeli ben' lle' zbii

zkaan yell-lioni yillingake' yabana' gana' chñabia' Chioza' na' kwe'gake' gaogake'. ³⁰ Na' bal beñ' bi nak beñ' zakii naa gakgake' beñ' zakii, na' beñ'ka' nak beñ' zakii naa bich gakgake' beñ' zakii.

Wchell Jesúza' ni che beñ' Jerusalénka'
(Mt. 23:37-39)

³¹ Na' lo llana'tezə bllin bal fariseoka' kwit Jesúza' na' che'gake'ne':

—Biyaj gan yoblə. Cheeni Heródeza' wite' li'.

³² Na' che' Jesúza' legake':

—Li yiyaj na' li lljayell beñ' wxiye'na': “Nin soa' to chop shon lla kwenche yibej' dii xiw'ka' yoo beñ' na' yiyon' beñ' bi shao', na' sheelo diika' chon'.” ³³ Chonan byen kooch' nez naa, wxə len willj kwenche yiyaa Jerusalénna' gana' chitgake' beñ'ka' chyixjee daa che' Chioza', la' agagan' witgake' legake' gan yoblə.

³⁴ 'iLe' beñ' Jerusalén, chitle beñ'ka' chidtxjee daa che' Chioza' legake', na' yaja' chitile beñ'ka' chselee choe'gake' cho'a xtilleena'! Dii zan shii goklallaa yitop' le' ka chon jeda' chiyellb xiindobka' xan xilba', na' le' bi goonile'. ³⁵ Li koo yichjele dga inia' le', Chioza' kwej yichje' gani zoale. Na' nia' le', aga wle'chile nad' axt kat'ch illin lla inale: “iGaklenshga Xancho Chioza' beeni ba bselee!”

14

Jesúza' biyone' to beñ' yo'e yi

¹ To lla sabd, llana' chombaan beñ' Israelka', wyaj Jesúza' jtawe' lill to fariseo, beñ' chñabia', na' fariseoka' sto chinal' chinogake'ne'. ² Na' lawe'na'

ze to beṇ' yo'e yi. ³ Na'ch Jesúza' wṇabile' fariseoka' na' beṇ'ka' chli' chsedi leya', chi'e legake':

—¿Ade lsens yiyoncho to beṇ' bi shao' llani chombaañcho, anti bi den?

⁴ Na' legake' bikzə bi gollgake'ne'. Na'ch Jesúza' beṇee beena' yoo yina' na' biyone'ne', na' golle'ne':

—Wak yiyajo'.

⁵ Na'ch chi'e fariseoka':

—Shi to burr chele wa to goon chele ixopb to loo yech to lla chombaañcho, ¿abi yiibejleb katena' la'kzi nakan llana' chombaañcho?

⁶ Na' bikz bi billet-lall'gake' ye'gake'ne'.

Ben'ka' chaxgake' to ga chak wishagna'

⁷ Na' ble'i Jesúza' ka chon beṇ'ka' wdaolene' lill farisewa', wche'gake' gana' chbe' beṇ'ka' zakii. Na'ch bseese to jempl, chi'e legake':

⁸ —Kat' no gax le' to ga chak wishagna', bi kwe'le gana' chbe' beṇ'ka' zakii. La' shera shi ila' beṇ' zak'chi ka le', ⁹ na' beena' goxe' le' ine': “Wzolla' kwenche kwe' beeni gani chi'o.” Na'ch do chido'zile yizolla'le na' lljache'le xanteyin. ¹⁰ Na' bi gonle ka'. San kat' no gax le', chiyal' lljche'le xanteyin kwenche kat' ila' beena' goxe' le' na' ine': “Bish'dawaa, nilə wda kwi'o gani zak'chi.” Na' ka' sho'le balaan lao beṇ'ka' chi'lenle cho'a mesa'.

¹¹ La' beena' chon kwine' beṇ' choo beṇ' xen, Chioza' gone'ne' beṇ' bibi zakii; na' beena' chakile' bibi zakee, Chioza' gone'ne' beṇ' choo beṇ' xen.

¹² Na' lekzka' che' Jesúza' beena' goxe'ne' lille'na':

—Kat' cheenilo' wwawo' beṇ', bi gaxo' beṇ' zoalanzo' wen, no beṇ' bishoo, no beṇ' dialla cho', ni no beṇ' wlill cho', beṇ' nake' beṇ' wni'a, la' legake' lekzka' wak yigoogake' wzonna' yiwaogake'

li' ka beno' chegake'. ¹³ Aga kan' gono', san byi ben' yesh', ben' net ni'a nee, ben' bi chak sa' wen na' ben' lchol. Ben'kan' chiya' gaxo', ¹⁴ na'ch so' mbalaz. La' ben'kan' aga wak yigoogake' wzon cho', san Chiozan' yigwee wzon cho'na' llana' kat' yisbane' ben' wenka' ladj ben' wetka'.

Jempl che to ben' ben to lni xen

¹⁵ Na' to beena' chi'lene' Jesúza' cho'a mesa', ka benile' wne' ka', na' chi'ene':

—¡Chakomba ben'ka' lljadaogake' gana' chñabia' Chioza!

¹⁶ Na'ch che' Jesúza'ne':

—Wzoa to ben' bene' to lni xen, na' goxe' ben' zan kwenche shajgake' lille'na' lljtaogake'. ¹⁷ Na' ka gol' gaogake', bselee to wen llin che'na' jelle' ben'ka' ba bye': “Li dagach, la' ba gok daa gaocho.”

¹⁸ Na' yog' ben'ka' janie' wzologake' chche'gake' dill'. Toe' golle'ne': “Zi' bizi'a lat' yell-lio na' chonan byen lljawia'n. Ye'gacho'ne' si'xene' bi gak yid'.” ¹⁹ Na' beena' sto chi'ene': “Zi' bizi'a gay' kwe' goon na' chonan byen wwia' shi wak gaangakb. Ye'gacho'ne' si'xene' bi gak yid'.”

²⁰ Na' beena' sto chi'ene': “Zi' bshagna', na' bi gak yid'.”

²¹ Na'ch biza' wen llinna' jayelle' xane'na' yog' daa goll ben'ka' le'. Na'ch blaa xane'na' na' chi'e wen llin che'na': “Lobe' jta lyell na' bche' kon no ben' yillago', no ben' yesh', no ben' net ni'a nee, no ben' lchol, na' no ben' bi chak sa' wen.” ²² Na' ka jasane' ben'ka' jatope', na'ch chi'e xane'na': “Xan', ba ben' ka wno', na' ni dech latj sho' ben'.”

²³ Na'ch che' xane'na': “Wyaj do yawi nezka' na' ben byen yid ben'ka' yillago' kwenche yilla' loo lilla'ni. ²⁴ Na' nia'

le', ka nak beṅ'ka' bya' dii nech, ni toe' bi gaogake' daa ba bsini'a.”

Yel' zak'zi'na'yen ile'icho ni che Jesucristona'

²⁵ Beṅ' zan zjanogake' Jesúza', na'ch biyeçhje' chi'e legake':

²⁶ —Shi nole cheeni gake nad' txen, chiyaḷ' gakechile nad' aga ka xaxna'le, xool-le, xiṅle, beṅ' bish'le, beṅ' zanle, na' axt yel' mban çhelena'. Shi bi gake' nad', aga wak gake nad' txen. ²⁷ Na' lekzka' beena' bi chzanile' yel' mban çhe'na', gake' bittezə dii gake' che', kwençe gone' daa chazlallaa, aga wak gake' nad' txen. ²⁸ Shi nole cheenile gonle to yoo sib wal, zigaate chiyaḷ' wwiale ka'k' gake' na' shi waki xmeçhena' sheeloin. ²⁹ La' shi ba wlekwle leninna' na' tena' bich bi de wzeeloin, na' yog' beṅ'ka' ile'gake' bi biyollan wxillgake' le'. ³⁰ Na' inagake': “Kon wdishj beena' len yoonaa' na' bi gake' xmeche'na' wzeeloe'n.” ³¹ Na' ka'kz to beṅ' wṅabia', shi cheenile' tiḷ-lene' sto wṅabia' yoblə, na' lekzka' chiyaḷ' wsakee shi wzo' shi mil beṅ'ka' nape' tiḷ-lengake' beena' nap galja mil beṅ'. ³² Na' shi gake'be'ile' bi soi beṅ'ka' nape', na' zi' illinlə beṅ' wṅabia'na' sto, wselee to çhop beṅ' lljellgake'ne': “Bizə tiḷcho.” ³³ Na' ka' le', shi bi çhoonlall'le yog' dii de çhele, aga wakə gake nad' txen.

Kat' bich zxi' zedaa
(Mt. 5:13; Mr. 9:50)

³⁴ 'Zedaa nakan dii wen, na' shi bich zxi'n aga wakch yiyonchon zxi' dii yoblə kwençe wçhinchon. ³⁵ Ni bi gake' wçhinchon lwaa beṅ', san çhoonchon. Na' le' chenile dga nia', li sen wṅeyi.

15

Jempl che xilaa wnit (Mt. 18:10-14)

¹ Yog' beṅ' wichixjka' na' beṅ' saaxyaka' jabig'gake' kwit Jesúza' kwenche bzenaggake' dillaa cho'e. ² Na' fariseoka' na' beṅ'ka' chli' chsedi leya' wzologake' biz chon chnagake' che Jesúza', che'gake':

—Chlebtezə beeni beṅ' saaxyaka' na' chaolenteze' legake'.

³ Na'ch bzoa Jesúza' to jempl, golle' legake':

⁴ —Shi tole napple to guiyoa xil' na' nit tob, na' wkwaanle baka' taplalj twalj lyixaa na' lljadiljle bana' wnit, na' axt kon ka yillelb gonle. ⁵ Na' ka yillelb, yibaile yixoaleb yaaxizlena'. ⁶ Na' ka yillinle lill-lena' wtope beṅ'ka' nllaguile na' beṅ' wlill cheleka', na' ye'le legake': “Li yibaleni nad', la' ba billem xil' cha'na' bana' wnit.” ⁷ Na' nia' le', ka'kzan chibayi Chioza' len anjl che'ka' yabana' kat' to beṅ' wen dii mal chiyajile' saaxya che'na' aga ka taplalj twalj beṅ'ka' bi chonan byen yiyaj-gakile'.

Jempl che mecha' wnit

⁸ 'Wa shi to noolə de shi mech plat che' na' nit ton, na' wxene' yi' che'na' na' wloe' loo lille'na' na' yiyilje'n axt ki yillelile'n. ⁹ Na' ka yillelile'n na' wtope' noolka' nllaguile' na' beṅ' wlill che'ka', na' yee legake': “Li yibaleni nad', la' ba billem mech cha'na' daa wnit.” ¹⁰ Na' nia' le', ka'kzan chibayi Chioza' len anjl che'ka' kat' chiyaj chileni to beṅ' saaxya.

Jempl che bi'na' benditj xmech xabaa

11 Na' lekzka' che' Jesúza' legake':

—To ben' wzoa chop xiine', 12 na' bi' neshaa gollb' xabaa: “Xa, bla daa de cho' na' ben nad' daa chiyal' ikaa.” Na'ch bla xabaa daa de che' na' bi'en legakb'. 13 Na' aga wlla, biyit' bide bi' neshaa daa bi'eb', na' mecha' daa bex'b' cheyin wyajlema'n to yell zit' na' jenditjba'n na' jem' kon daa nazan cheb'. 14 Na' ka biyoll benditj xmech-baa wche' to wbin xen yella' gana' chdab', na'ch wzolo chdeb' wbinna'. 15 Na' wyajb' janabb' llinna' gom' lao to ben' yella' gana' chdab', na' beena' bseleeb' lyixaa gana' nlee kushka' kwenche jtapb' legakb'. 16 Na' daa le chdom' goklall'b' gaob' daa chao kushka', na' ni len bi be'gake'b'. 17 Na' gokib': “Ben' zan wen llin che xa'na' lle' na' chichoonzan dii cheej chaogake', na' nad', ba chetid' wbinni. 18 Ba ziyaachoklæ kwit xa'na' na' yepee: Xadawaa, ba bxinj' blen' lao Chioza' na' lawo'na'. 19 Bich chidolaa gak' xiino', san beni nad' ka nottezə wen llin cho'ki.” 20 Na'ch biza'b' ziyajb' lill xabaa.

'Na' zi dii xench yillim' lillbaa ble'i xabaa leb' na' biyesh'lallile'b'. Na'ch zejdoe' jatile'b' na' wdele'b' na' bnop'e'b'. 21 Na'ch che'b' xabaa: “Xadawaa, ba bxinj' blen' lao Chioza' na' lawo'na', bich chidolaa gak' xiino'.” 22 Na' xabaa chi'e wen llin che'ka': “Lobe'zə li lljlej tgot lech' daa liizelozzi nakch na' li wwakwba'n, na' lekzka' li wllin to niy xbemaa na' li wllin yel ni'abaa. 23 Na' li lljxi' me'do'na' mbejch-lawin, li witb kwenche gaochob na' goncho to lni, 24 la' xiindawaani gok cheb' ka bi' ba wit, na' naa ba bila'b' mbam'. Gok cheb' ka bi' wnit, na' naa ba billelb'.” Na'ch wzologake' bengake' lina'.

25 'Na' ka wzolo l̄nina', xiine' bi' necha' chdab' lyixaa. Na' ka billim' gaozə lillbaa, benib' chkwell wikwellka' na' chakte wiyaana'. 26 Na'ch w̄neb' to wen llinka' na' w̄nabibee bin chak lillbaa. 27 Na' wen llinna' chi'e: "Bi' bishoonan' ba bila', na' ben x̄o'na' mandad betgake' me'do'na' mbejch-lawin daa bila'b' shi'a shao'." 28 Na' xiine' bi' necha' bllaab' na' bi goonib' yiyoob'. Na'ch bchej x̄abaa got'yoile'b' kwenche yiyoob'. 29 Na'ch che'b' x̄abaa: "Nezkzilo' ba gok zan yiz chon' yog' daa no', na' ni shlin bin' chishj' cho'a xtilloona'. Na' bigan' gono' nad' la'ch' to shibdo' kwenche wit'b yeej gaolem' bi'ka' nllaguid'. 30 Na' naa bila' xiino'ni biyit' bideb' yog' daa bi'ob' na' benditjb' xmecho'na' kon noolə wdaka', na' ba betzo' me'do'na', bana' le nak, ni cheb'." 31 Na'ch che' x̄abaa: "Xiindawaa, li' zoaleno' nad' toshiizi, na' yog' bi de cha' chekzo' daa. 32 Per chonan byen naa yibaicho na' goncho l̄nini, la' ba bila' bi' bishooni. Ba gok cheb' ka bi' ba wit, na' naa ba bila'b' mbam'; gok cheb' ka bi' wnit, na' naa ba billelb'."

16

Jempl che wen llinna', beena' benditj daa de che x̄ane'na'

1 Na' lekzka' goll Jesúza' ben'ka' nakgake'ne' txen: —Wzoa to ben' wni'a nape' to wen llin che', na' bene' lo nee yog' dii de che'. Na' wyaj bal' ben' jellgake'ne': "Le chonditj beena' daa beno' lo nee." 2 Na'ch w̄ne x̄ane'na' le', chi'ene': "Ba benid' ka nagake' chono', na' chiyal' yidio' kwent diika' ngoo lo no', la' bich gon' xshino'na'." 3 Na'ch chaki wen llinna': "¿Nakra gona'n naa, bich gon' x̄an'na' llinna'

gon'? Bi soid' gon' llin wal, na' chido'id' yep' ben' yiyesh'gakile' nad' gon'gake' lat' wej xmech'. ⁴ Ba nezid' nak gon' kwenche wleb ben' nad' lille'ka' kat' bich gat' llin cha'na'." ⁵ Na'ch goxe' to to ben'ka' chal'gake' che xane'na', na' ben' necha' wnable'ne', chi'ene': "¿Ka'k' chaloo che xan'na'?" ⁶ Na' beena' chi'e: "Chalaa to guiyoa medid* set." Na'ch chi'ene': "Ni de yisha', lobe'zə wche' na' bda'n shiy-onzannan' chaloo." ⁷ Na' ka wde, wnable' beena' sto, chi'ene': "¿Shera li? ¿Ka'k' chaloo?" Na' beena' chi'ene': "Chalaa to guiyoa gush trigo." Na'ch chi'ene': "Ni de yisha' na' bda'n taplalj gushzannan' chaloo." ⁸ Na' xan wen llinna' be'lawee wen llin mal che'na' daa biyiljallee naklan gone'n. La' ben'ka' zech wneyi che daa chak lo yell-lioni, chiy-iljlall'chgake' nak soalen ljwellgake' wen kwenche ile'shii ljwellgake', aga ka ben'ka' ba yoo beeni' che Chioza' loo yichjlall'do'eka'.

⁹ Na' nia' le', li wchin yel' shawaa de chele yell-lioni kwenche gaklenle ben', na' kat' ba wde che yel' shawaa, Chioza' wlebe' le' soalenlene' zejli kani.

¹⁰ Na' beena' chon ka chiya'l' kon lat' daa nak lall' nee, ka'kzan gone' shi bichlə dii xench koo lall' nee. Na' beena' bi chon ka chiya'l' kon daa nak lall' nee, ka'kzə gone' shi bitekchlə dii xench koo lall' nee.

¹¹ Shi bi chonle ka chiya'l' kon yel' shawaa de yell-lioni, bi gonzle lez ikaale yel' shawaa de yabana'.

¹² Na' shi bi chonle ka chiya'l' kon yel' shawaa nak lall' na'le yell-lioni, ¿nakra gon Chioza' gone' le' yel' shawaa daa gaki chele?

* **16:6** Medid: to to medidki gokan ka do 37 litr.

13 'Aga ga zoa to beṅ' wḷane' xshin chop beṅ', la' wakzbanile' beena' to, na' gakhile' beena' sto, wa gone' xshin beena' to do lallee na' xshin beena' sto gone'n nakzi. Aga wak gonle ka cheeni Chioza' shi le chzelall'le yel' wni'ana'.

14 Na' fariseoka' le chzelall'gake' mecha', na' ka bengakile' dillaa choe' Jesúza', bxillgakile'ne'.

15 Na'ch che' Jesúza' legake':

—La'kzi nale nakle beṅ' wen, Chioza' nezile' nakan nak yichjall'do'lena'. La' daa chaki beṅ' yell-lioni nakan dii lliarote, leyeṅ'lannan' chakzbani Chioza'.

Leya' na' yel' wṅabia' che Chioza'

16 Na' lekzka' che' Jesúza':

—Leya' na' daa bli' bsemi dii beṅ'ka' wdixjee daa goll Chioza' legake', legakannan' wṅabia'gakan axt ka bllin lla bid Juanna'. Na' ka bid Juanna', wzolo chzenag beṅ' dill' wen dill' kob che yel' wṅabia' che Chioza', na' chongake' to dii byen kwenche inabi'e loo yichjall'do'eka'.

17 'Dii li nia' le', lobe'ch te che yabana' len yell-lioni, aga ka daa tegonz shcho'a daa na leya'.

Bi chiyal' yilaa beṅ'ka' nshagna'

(Mt. 19:1-12; Mr. 10:1-12)

18 'Shi to beṅ' byo yilee xoolena' na' yikee noolə yoblə, chone' ka chon beena' zoate nool che'na' na' chdalene' noolə yoblə. Na' beena' yikee noola' bilaa beṅ' che'na' le', lekzka' chone' ka chon beena' zoalente nool che'na' na' chdalene' noolə yoblə.

Beṅ' wni'ana' na' Lázarona'

19 Na' chize' Jesúza' beṅ'ka':

—Wzoa to beṇ' wni'a na' chakwe' shgal' lech' dii wen na' yog' lla chaoshawe'. ²⁰ Na' lekzka' wzoa to beṇ' yesh' wlie' Lázaro, na' llia we'na' doxen kwerp che'na'. Na' tlizi chjchi'e cho'a yoo che beṇ' wni'ana', ²¹ gokile' gawe' la'ch' blaaka' chxop xan mes che'na', na' axt bekw'ka' chleegakb we'na' llie'. ²² Na' bllin lla wit beṇ' yeshaa, na' biche' anjl che Chioza'ne' kwenche jazoalene' dii Abrahama'. Na' lekzka' wit beṇ' wni'ana' na' bkwash'gake'ne'. ²³ Na' dii beṇ' wni'ana' chdezi'chgue' gana' lle' beṇ' wetka', na' blis jalawe'na' na' zit'lə ble'ile' dii Lázaroni' chi'e kwit dii Abrahama'. ²⁴ Na'ch wnie' zilljə chi'e: “Xadawaa Abraham, biyesh'gachi nād' na' bsel' Lázaroni' kwenche wleejlat' xbene'na' loo nisa' na' yidshone'n lo lollaani, la' le chllaglochgan' lo yi'ni.” ²⁵ Na' Abrahama' chi'ene': “Xiin, jadinini ka mbalaz gok cho' shlak wbano' yell-liona', na' Lázaroni' aga bi dii wen gok che'. Na' naa chizi'e banez ni, na' li' chzak'zi'o. ²⁶ Na' ziznakan sto, ze to bdiñj xen gholi, na' aga wak te beṇ'ki yidgake' gana' lle'le, na' beṇ'ka' lle' na' aga wak tegake' yidgake' gani zoanto'.” ²⁷ Na'ch che' beṇ' wni'ana'ne': “Chnabid' li' shka, xadawaa Abraham, ben goklen bsel'gach Lázaroni' lill xa'na' ²⁸ gana' zoa zi gay' beṇ' bishaaka', llje'lene' legake' dill' kwenche bi lengake' yiyedgake' gani de yel' zak'zi'ni.” ²⁹ Na' Abrahama' chi'ene': “Napkz-gake' daa bzej dii Moiséza' na' daa bzej dii beṇ'ka' wdixjee daa goll Chioza'. iNa' chiyal' wzenag-gake'n!” ³⁰ Na' che' beṇ' wni'ana'ne': “Aga wakan, xadawaa Abraham, san shel' to beṇ' ba wit yibane' na' yiyaje' lljaye'lene' legake' dill', na' wiyaj wilengakile' saaxya che'ka'.” ³¹ Na' che' Abrahama'ne':

“Shi bi chzenaggake' daa bzej dii Moiséza' na' daa bzej dii ben'ka' wdixjee daa goll Chioza', lekzka' aga wyajle'gake' la'kzi yiban to ben' wet.”

17

Bi goncho ka ixop ben' yoblə gone' dii mala'
(Mt. 18:6-7, 21-22; Mr. 9:42)

¹ Na'ch che' Jesúza' ben'ka' nakgake'ne' txen:

—Bia'kzə de dii gon ka ixop ben' gone' dii mala', per jnyesh'laz gak che beena' wchixe' ben' yoblə gone' dii mala'! ² Wenlan shel' wwal'gake' yene'na' to yaj che molin na' lljazal'gake'ne' loo nisdona' aga ka daa wchixe' to ben'ki chajle'gake' cha'. ³ Daan, li wsak'.

'Shi to bish' ljwell-le gone' mal chele, li wshesh-lene', na' shi yiyajile' daa bene' chele, li yizi'xen che'. ⁴ La'kzi ax̄t gall shii shlla gone' bi gone' chele, na' gall shiite in̄e' le': “Chiyajid' daa ben' cho'”, chiyal' yizi'xenle che'.

Daa gak gon to ben' chajle'

⁵ Na'ch goll postlka' X̄ancho Jesúza':

—Goklen neto' gonlilall'chnto' Chioza'.

⁶ Na'ch che' X̄ancho Jesúza' legake':

—Shel' yel' chajle' chelena' nakan la'ch' ka nak sa mostásana', daa nak diido'zə, wak ye'le yag xen wala': “Blall'shki, na' jsoa loo nisdona'la'”, na' gon yaga' daa ye'len, shel'ka'.

Daa chiyal' gon to wen llin

⁷ Shi nole zoa to wen llin chele na' zizee lyixaa jawaane' goonna' wa jtapeeb, aga we'lene': “Biyoo, na' wche' kwenche gawo'.” ⁸ Aga we'lene' ka', san ye'l-lene': “Bsini'a daa gaw' xshe'na', na' wze

wneyi kwenche wdio' daa yeej gaw', na'techlə yeej gawo'." 9 Na' ni bi we'lene' yel' choxken daa ba bene' daa che'lene' gone'. 10 Lekzka' le', kat' ba biyoll benle yog' daa non Chioza' mandad gonle, chiyal' inale: "Neto' bi chizo chizakinto' gonnto' yog'lolten, shinchga bizointo' ba bennto' daa chonan byen gonnto'."

Biyon Jesúsza' shi ben' chak yillwe' daa le lepra

11 Na' shlak zjada Jesúsza' Jerusalenna', wdie' gana' ndil yell-lioka' mbani Samariana' na' Galileana'. 12 Na' ka blline' to cho'a yelldo', bllesh shi ben' chakgake' yillwe' daa le lepra kwenche lljatilgake'ne', na' de zit'lə wzegake' 13 besyaagake' zilljə, che'gake'ne':

—¡Jesús, Maestro, biyesh'lall'gachi neto'!

14 Na' ka ble'i Jesúsza' legake', na' golle':

—Li shaj lao bxoza' kwenche ile'gakile' le'.

Na' shlak zejgake' bigaa yillwe' che'ka'. 15 Na'ch toe' bibi'e ka gokbe'ile' ba biyakile', na'ch axt chosya'ile' choe'lawee Chioza'. 16 Na' bchek' xibe'na' lao Jesúsza' na' bdose' lo yona' kwenche bi'ene' yel' choxken. Na' beena' ben ka' nake' ben' Samaria. 17 Na'ch che' Jesúsza':

—¿Aaga shigaken' biyaki? ¿Garan ben'ka' zi ga?

18 ¿Atochga ben' zitiin bibi'e choe'lawee Chioza'?

19 Na'ch che' Jesúsza' beena':

—Bizolla' na' biyaj. Ba biyakilo' daa wyajli'o cha'.

Yel' wnabia' che Chioza'

(Mt. 24:23-28, 36-41)

20 Na'ch wnabi fariseoka' Jesúsza' batran solo inabia' Chioza' lo yell-lioni. Na' chi'e legake':

—Ka nak yel' wñabia' che Chioza', aga nakan ka to dii ile'tekzicho. ²¹ Aga no ina: “Ni chñabia' Chioza'”, wa “Na' chñabi'e”, la' ladjlenikzan ba bla' yel' wñabia' che'na'.

²² Na'ch chi'e beñ'ka' nakgake'ne' txen:

—Wllin lla kat' gaklall'le la'ch' zi shlla ile'chile inabi'a, nad', Beñ' Bsel' Chioza' Yell-lioni, na' aga wle'chile nad'. ²³ Na' ichej beñ' ine': “Ni zoe’”, wa “Na' zoe'.” Na' bi shajle, ni bi gonle beñ'ka' txen. ²⁴ La' ka chak kat' chep yes, chzeeni'n doxen xan yabana', ka'kzan gak llana' kat' zizaa, nad', Beñ' Bsel' Chioza' Yell-lioni. ²⁵ Na' chonan byen zigaate biya daa yen ile'id', na' beñ'ki zoa ñaa wzoagake' nad' ka'lə. ²⁶ Kon ka gok kana' wzoa dii Noéna', ka'kzan gak kat' ba zoa illin lla yiyed' dii yoblə, nad', Beñ' Bsel' Chioza' Yell-lioni. ²⁷ Kana' wzoa dii Noéna', beñ' yell-lioka' cheej chaogake', chshagna'gake', na' choe'gake' yel' wishagna' che xiine'ka' bllinte llana' wyoo dii Noéna' loo barkwa'. Na' wzolo chak yejsi-waa yell-lioni axt billa'cha lawinna' nisa', na' blliyi'n yog'lole'. ²⁸ Na' lekzka' wizak kana' wzoa dii Lota'. Cheej chaogake', chiya'o chidegake' bi de chegake', na' chaz chaangake', na' chon lillgake'. ²⁹ Per ka bchej dii Lota' yell Sodómana', Chioza' bletje' yi'na' xan yabana' nchixan daa ne' azufre na' betan yog' beñ' yell Sodómaka'. ³⁰ Na' ka'kzan gak llana' kat' yiyed', nad', Beñ' Bsel' Chioza' Yell-lioni.

³¹ 'Llana' zizaa, shi to beñ' llie' yichj lille'na' na' xshinlaze'na' den loo yoo che'na', bi yiyetjze' kwenche lljaleje'n. Na' shi to beñ' zeje' lyixaa, bi yiyajze' lille'na'. ³² Li lljadini ka gok che dii xool

Lota'. ³³ Beena' bi chsanlall' yel' mban che'na', beenan' kwiayi'; san beena' chsanlall' yel' mban che'na', beenan' gat' to yel' mban che' zejli kani.

³⁴ Na' nia' le', lle'na' kat' zizaa, chop ben' die' toz blag, toe' yichi'a na' stoe' yigaan. ³⁵ Na' gana' lle' chop noolə chotgake', toe' yichi'a na' stoe' yigaan.

³⁶ Na' chop ben' byo chongake' llin lyixaa, toe' yichi'a na' beena' sto yigaane'.

³⁷ Na'ch wɲabgakile'ne':

—¿Garan gak dga, Xan'?

Na' chi'e legake':

—Gana' de ba weta', nan' chdop chllag llodka'.

18

Jempl che to nool wizeb na' to ben' wen yel' joschis

¹ Na' bzoa Jesúza' to jempl kwenche bli' bsedile' legake' bi lljshyagakile' we'llwillgake' Chioza'. ² Chi'e legake':

—Wzoa to ben' wen yel' joschis to yell, na' bi chall chllebe' Chioza', ni bibi chakile' shi bi chiyoolallii ben' ka chone'. ³ Na' yella' wzoa to noolə wizeb na' chajtezi chaje' lawe'na', chi'ene': “Bensha yel' joschis cha'ni.” ⁴ Na' ssha ba gok chaje' lawe'na' na' bikzə chone' bin chi'ene', na' bllin lla kat' chakile': “La'kzi bi chall chlleb' Chioza' na' ni bibi chakid' shi bi chiyoolallii ben' ka chon', ⁵ gonch' yel' joschis che nooli kwenche bich yidyembeguile' nad'.”

⁶ Na' Xancho Jesúza' chi'e legake':

—Li wzenag ka ben ben' wen yel' joschisa', beena' bi chall chlleb Chioza'. ⁷ ¿Achakile Chioza' bi gaklene' ben'ka' ba wleje' nakgake' lall' nee,

ben'ka' choe'lwillgake'ne' ka wal ka tella? ¿Awllail'e' gaklene' legake'? ⁸ Bi nakan ka', san nia' le' katena' gaklene' legake'. Per kat' zizaa, nad', Ben' Bsel' Chioza' Yell-lioni, ¿alle'ch ben' nonlilall' nad' yell-lioni, lla?

Jempl che to fariseo na' to ben' wichixj

⁹ Na' bzoa Jesúza' sto jempl che ben'ka' chakgake' ile' nakgake' ben' wen lao Chioza' na' chongakile' ben' yoblə nakzi. Na' wne':

¹⁰ —Chop ben' wyajgake' yoodo'na' kwenche je'lwillgake' Chioza'. Toe' nake' fariseo na' beena' sto nake' ben' wichixj. ¹¹ Na' farisewa' zie' chshalj chshon che kwine', chi'e: “Chios cha', choxkeno' bi chon' ka chon ben' yoblə, bi chzi' chban', bi nak' ben' wen dii mal, agagan' kwej yichj' nool cha'na' kwenche soalen' nool yoblə, na' ni bi chon' ka chon ben' wichixji. ¹² Chop shii to xman chzoa' wbas', na' lawi yog' daa chon' gan chbej' daa chidołoo ikoo.”* ¹³ Na' ben' wichixja', zit'lə wzie' na' ni bi biyaxjile' wlis lawe'na' wwie' yabana', san chballee cho'a lcho'ena' chi'e: “¡Chios cha', biyesh'gachi nad' daa nak' ben' saaxya!” ¹⁴ Na' nia' le', Chioza' bzenague' che ben' wichixja' na' bizee biyaje' lille'na' ba biyakxen saaxya che'na'. San bi bzenague' che farisewa'. La' beena' chon kwine' ben' choo ben' xen, Chioza' gone'ne' ben' bibi zakii. Na' beena' chakile' bibi zakee, Chioza' gone'ne' ben' choo ben' xen.

Benleey Jesúza' bi'do'ka'
(Mt. 19:13-15; Mr. 10:13-16)

* **18:12** Daa chidołoo ikoo: literalmente la décima parte.

15 Na' lekzka' beṅ' zan jwa' bi'do' che'ka' lao Jesúza' kwenche bxōa neena' yichjb'ka' na' wṅabile' Chioza' gaklene'gakb'. Na' ka ble'i beṅ'ka' nakgake'ne' txen, bsheshlengake' legake'. 16 Na' Jesúza' goxe' bi'do'ka', na' chi'e beṅ'ka' nakgake'ne' txen:

—Li we' latj yid bi'do'ki lawa'ni, bi wllonle, la' Chioza' chṅabi'e loo yichjlall'do' beṅ'ka' nak ka legakb'. 17 Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

To beṅ' zakii beṅ' nak beṅ' wni'a be'lene' Jesúza' dill'

(Mt. 19:16-30; Mr. 10:17-31)

18 To beṅ' zakii wṅabile' Jesúza', chi'ene':

—Maestro, li' nako' beṅ' wen. Wna nad' beran chiyal' gon' kwenche gat' to yel' mban cha' zejli kani.

19 Na'ch che' Jesúza'ne':

—¿Berache nazo' nad' beṅ' wen? Toz Chioza' nake' beṅ' wen. 20 Ba nezkzilo' daa nllia Chioza' bia' goncho: “Bi soaleno' nool bi nak nool cho', bi wito' beṅ', bi kwano', bi chiljlalloo bizə gon ino' che beṅ', na' wdap balaan xaxṅoo.”

21 Na'ch che' beena'ne':

—Kana' naktia' bi' xkwid' chon' yog' diika'.

22 Na'ch ka beni Jesúza' ka goll beena'ne', na' chi'ene':

—Stozə daa chyallj gono': jayet' jade yog' daa de cho' na' be'n beṅ' yesh'ka'. Na' shi gono'ka', na' gat' to yel' shao' cho' yabana'. Na' da, dino' nad'.

23 Na' ka beni beena' ka goll Jesúza'ne', le gokyeshile', la' ben' wni'a nleban'. 24 Na' ka ble'i Jesúza' le gokyeshile', na' chi'e:

—iLallj inleeb chonan che ben' wni'aka' we'gake' latj inabia' Chioza' legake'! 25 Lobe'ch te to kamey xan yeshaa aga ka to ben' wni'a yiyo'e yabana'.

26 Na' ben'ka' beni, gollgake'ne':

—¿Noran yila shka'?

27 Na'ch che' Jesúza' legake':

—Daa bi chak gon benecha', Chioza' chak gone'n.

28 Na'ch che' Pédróna' Jesúza':

—Xan', ba wlej yichjnto' yog' dii de chento' kwenche naknto' li' txen.

29 Na'ch che' Jesúza' legake':

—Dii li nia' le', nottezə ben' ba bzanile' no lille', no xaxnee, no ben' bishee, no ben' zane', no xiin xoole' kwenche cho'e latj chnabia' Chioza'ne', 30 Chioza'kzə wi'e dii zak'chi che' yell-lioni aga ka diika' wlej yichje', na' ka yilline' yabana' wi'ene' to yel' mban zejli kani.

De wyon shii wdixjee Jesúza' guete'

(Mt. 20:17-19; Mr. 10:32-34)

31 Na'ch wlej Jesúza' ben'ka' shllin ka'lə, ben'ka' nakgake'ne' txen, chi'e legake':

—Dga ziyajcho Jerusalénna' naa, yillinin daa bzej dii ben'ka' wdixjee daa goll Chioza' kani'yi daa gak cha', nad', Ben' Bsel' Chioza' Yell-lioni.

32 La' gongake' nad' lo na' ben'ka' bi nombia' Chioza', na' gonlegake' cha', biya dii inagake' nad', na' wlla' xeneeka' nad'. 33 Na' wit chingake' nad'

na'tech witgake' nad', na' yiyon̄ lla yiban' ladj ben' wetka'.

³⁴ Na' ben'ka' nakgake'ne' txen ni lat' bi wya-jni'gakile' daa golle' legake', na' ni bi wnezgakile' berache chi'e legake' ka', la' daa golle' legake' nakan dii bi gak shajni'gakile'.

Biyon Jesús'a to ben' lchol̄ yell Jericóna'

(Mt. 20:29-34; Mr. 10:46-52)

³⁵ Na' ka ba chllin Jesús'a yell Jericóna', na' chi' to ben' lchol̄ cho'a neza' chnabile' ben' yiyesh'lall'gakile'ne' we'gake' lat' wej xmeche'.

³⁶ Na' ka benile' chde ben' zan na'ch wñabe' bin chak. ³⁷ Na' gollgake'ne':

—Jesús, ben' Nazaretan', chda ni.

³⁸ Na'ch besyee, chi'e:

—¡Jesús, Xiin̄ dia che dii Daví, biyesh'lall'gachi nad'!

³⁹ Na' ben'ka' llialo lao Jesús'a chsheshlengake'ne' kwenche kwi'e llizə, na' zizikchlə chosyee, chi'e:

—¡Xiin̄ dia che dii Daví, biyesh'lall'gachi nad'!

⁴⁰ Na'ch wlez Jesús'a na' bene' mandad lljxi'gake'ne'. Na' ka bllin ben' lchol̄a' lawe'na' na'ch wñabile'ne':

⁴¹ —¿Beran cheenilo' gon' cho'?

Na'ch che' ben' lchol̄a'ne':

—Xan', cheenid' ile'id'.

⁴² Na'ch che' Jesús'a'ne':

—Daa ba chon̄lilalloo nad' na' ile'ilo'.

⁴³ Na' katena' lii bile'teile', na'ch janoe' Jesús'a' choe'lawee Chioza'. Na' yog' ben'ka' ble'i daa ben Jesús'a' be'la'ogake' Chioza'.

19

Jesúza' na' Zaquewa'

¹ Na'ch bllin Jesúza' yell Jericóna' na' wdie' gchoł yella'. ² Na' yella' zoa to beñ' wni'a lie' Zaqueo, na' ngoo lall' nee xonj wıchixjka'. ³ Na' gok-lallee ile'ile' Jesúza', per bi gok ile'ile'ne' daa nake' beñ' bçhekwdó' na' daa zejlen Jesúza' beñ' zan. ⁴ Na'ch wllialodoe' lawe'ka' na' wyepe' to lo yag xen kwençhe ile'ile'ne' ka tie'. ⁵ Na' ka bllin Jesúza' xan yaga', na' blis lawe'na' chi'ene':

—Zaqueo, btalaloo biyetj, la' lillo'nana' yigaana' naa.

⁶ Na'ch biyetjdo Zaquewa' chibaile' bichi'e Jesúza' lille'na'. ⁷ Na' ka ble'i beñ'ka' lle' na' ka gok, yog'ze' wzolo biz chon chnagake' che', che'gake':

—Yigaanxgale' lill beñ' saaxyani, na.

⁸ Na'ch wzolla Zaquewa' na' chi'e Xancho Jesúza':

—Xan', cheenid' wi'a gashjə daa de çha' beñ' yesh'ka', na' yog' beñ'ka' ba bçhixj' dii xench, yiyoe'gakee taplə ka daa ba wlan' çhegake'.

⁹ Na'ch che' Jesúza'ne':

—Naañla ba bisla Chioza' beñ'ki zoa loo yooni kwençhe bi kwiayi'gake', daa len Zaquewi nake' xiin dia che dii Abrahama'. ¹⁰ La' ka nak' nad', Beñ' Bsel' Chioza' Yell-lioni, bid' kwençhe yiyilj' na' yisla' beñ'ka' yoo nez daa wlliyi'n legake'.

Jempl che beena' bkwaanlen wen llin che'ka' mech

¹¹ Shlak chzenag beñ'ka' daa che' Jesúza', bseesile' legake' to jempl, daa ba zoa illine' Jerusalenna' na' legake' gokgakile' daa nake' beñ' bsel' Chioza' lii solotie' inabi'e. ¹² Na'ch chi'e legake':

—To beṇ' zakii bcheje' wyaje' to yell zit' wal kwenḅhe lljalane' yel' wṇabia' ḅhe lalle'na', na' ka yilline' inabi'e. ¹³ Na' ka zi' see, wṇie' shi wen llin ḅhe'ka' na' bi'e legake' twej mech dii zak' dii xen na' chi'e legake': "Ni de mechi, li gonle-nan delgens shlak bi soa'." ¹⁴ Na' beṇ' wllall ḅhe'ka' le chakzbangakile'ne', na' ka wde wzee bsel'gake' xonj beṇ' wyajgake' lao beena' we' lsens inabi'e kwenḅhe jellgake'ne': "Bi cheeninto' inabia' beeni neto'." ¹⁵ Per bia'kzə gok lo nee inabi'e, na' biyaje' lalle'na'. Na' ka billine' goxe' beṇ'ka' bkwaanlene' mecha' kwenḅhe inezile' ka'k' wej ben mecha' gan daa bkwaanlene' to toe'. ¹⁶ Na' ka bllin beṇ' necha' lawe'na' na' chi'ene': "Xan', xmecho'na' bkwaan'leno' nad' bena'n gan shin." ¹⁷ Na'ch beṇ' wṇabia'na' chi'ene': "Wenkzan beno'. Daa beno' ka chiyal' kon lat' mecha' bkwaanlen' li', wzoa' li' inabi'o shi yell." ¹⁸ Na' ka bllin beena' sto lawe'na' na' chi'ene': "Xan', xmecho'na' bkwaan'leno' nad' bena'n gan gayaan." ¹⁹ Na' lekzka' chi'e beena': "Wzoa' li' inabi'o gay' yell." ²⁰ Na'ch bllin stoe' lawe'na' na' chi'ene': "Xan', ni de xmecho'na' bkwaan'leno' nad'. Blall'tipteza'n to lech' na' wlooshawaan ²¹ daa bllib' li', la' le beṇ' znia nako'. Chkaatezo' dii bi naki ḅho', na' chizi' chilaptezo' dii goz goon beṇ' yoblə." ²² Na'ch che' beṇ' wṇabia'na' le': "Bikzbi yejni'alallii beno'. Kon ka ba wno' ka'kzan gak ḅho'. Nezilo' nak' beṇ' znia, na' chkaatez' dii bi naki ḅha' na' chizi' chilap' dii goz goon beṇ' yoblə. ²³ Na' daa nezilo' ka' chon', ḅberaḅhe ki bi'o xmechaa gon yichjin kwenḅhe yikaan naa ba biyed?" ²⁴ Na'ch chi'e beṇ'ka' lle' na': "Li yikaa mecha' daa bi'ane' na' li we'n beena'

bene' gan shin.” ²⁵ Na'ch che' beṇ'ka'ne': “Xan', ba napkzə beena' shin.” ²⁶ Na' che' beṇ' wṇabia'na' legake': “Nia' le', beena' chonlene' llin daa yoo lo nee, wakch lall' nee dii xench; san beena' bi chonlene' llin daa yoo lo nee, axt daa ngoo lo nee lat' yidoyo. ²⁷ Na' ka nak beṇ'ka' chakzbangakile' nad', beṇ'ka' bi cheengakile' inabi'a, li lljxi'gake' ni na' li witgake' ile'teid'.”

Billin Jesúza' Jerusalénna'

(Mt. 21:1-11; Mr. 11:1-11; Jn 12:12-19)

²⁸ Na' ka wde wna Jesúza' ka', na'ch bigoolene' nez beṇ'ka' nakgake'ne' txen ziyajgake' Jerusalénna'. ²⁹ Na' ka billingake' xni'a yaa daa le Yaa Olivos, gaozə yellka' le Betfagé na' Betania, na'ch bselee chop beṇ'ka' nakgake'ne' txen, ³⁰ na' chi'e legake':

—Li shaj yella' llia na', na' ka illinle ile'ile to burr chbando', ba konoṇ' kwia, da'b yag. Na' wsell-leb wche'leb nilə. ³¹ Na' shi no inaz le': “¿Berache chsell-lzleb?”, na' ye'lene': “Xanchonan' chyalljile'b.”

³² Na'ch wyaj beṇ'ka' bselee, na' ka bllingake' ble'gakile' to burr chbando' da'b yag, kon kayeṇ' goll Jesúza' legake'. ³³ Na' ka chsellgake' burra' na'ch che' xama' legake':

—¿Berache chsell-leb?

³⁴ Na'ch che'gake'ne':

—Xanchonan' chyalljile'b.

³⁵ Na'ch bche'gake'b jwa'gake'b lao Jesúza' na' bxoagake' xe'ka' koll'ba' na' blliangake' Jesúza' koll'ba'. ³⁶ Na' shlak zej Jesúza' llie' burra', chshilj xa beṇ'ka' tlo neza'. ³⁷ Na' ka ba chillingake' gaozə gana' chiyetj nez daa ziza' Yaa Olívoza', yog'lol

ben'ka' nakgake'ne' txen chosyaagake' daa chibagakile' na' choe'la'ogake' Chioza' daa ble'gakile' yog' yel' wakka' bene'. ³⁸ Na'ch nagake':

—jGaklenshga Xancho Chioza' beeni ba bselee inabi'e! jLi da, we'la'ocho Chioza' zoa yabana' daa bene' ka zoalenchone' mbalaz!

³⁹ Na' bal' fariseoka' len ladj ben'ka' no Jesúza', che'gake'ne':

—Maestro, goll ben'ki nakgake' li' txen soagake' llizə.

⁴⁰ Na' che' Jesúza' legake':

—Nia' le', shi ben'ki soagake' llizə, na' yaj kilə solo gosyaagakan we'la'ogakan nad'.

⁴¹ Na' ka billine' gaozə yell Jerusalénna', gokyeshile' ka ble'ile'n na' wchelle' che ben'ka' zoa na'. ⁴² Na' chi'e:

—jShel'ka' naanlla gakbe'ile nakan gonle kwenche soale mbalaz! Per ngashaan laolena' na' aga wakbe'kzile. ⁴³ Wllin lla ila' ben'ka' chakzbangakile' le' na' wzechjgake' yelli leej na' kono gak sho' ichej. ⁴⁴ Na' ni sto yaj che lill-leka' bich yikwaan'gake' koll' ljwellin, na' witgake' le' len xiinleka', la' bi gokbe'ile ka bla' Chioza' ladjleni.

Bishesh Jesúza' ben'ka' chit' chde lesh' chyoodo'na'

(Mt. 21:12-17; Mr. 11:15-19; Jn 2:13-22)

⁴⁵ Na'ch ka bllin Jesúza' cho'a yoodo'na' na' bisheshe' ben'ka' chit' chde. ⁴⁶ Na' chi'e legake':

—Cho'a Xtill' Chioza' nan: “Lilla'na' nakan ga choe'lwill ben' nad'”, na' le' naa ba nonzlen ka to ga chdop chllag wban.

⁴⁷ Na' yog' lla bli' bsedi Jesúza' ben' gana' zoa yoodo'na', na' bxozka' chnabia' na' ben'ka'

chli' chsedi leya' na' nochlā ben' wṇabia' che
ben' Israelka' la'kzi biyiljlall'gake' naklā gongake'
kwenche witgake'ne' ⁴⁸ bikzə bi gok gongake',
la' yog'zə ben' chibagakile' chzenaggake' dill'ka'
cho'e.

20

Yel' wṇabia' che Jesúza'

(Mt. 21:23-27; Mr. 11:27-33)

¹ Na' bllin to lla, shlak chli' chsedi Jesúza' ben'ka'
lesh' chyoodo'na' na' chyixje'ile' legake' dill' wen
dill' kob che Chioza', bllin bṁozka' chṇabia' na'
ben'ka' chli' chsedi leya' len ben' golka' chṇabia'.

² Na' che'gake'ne':

—Wnashki neto', ¿bi yel' wṇabia' napo' chono'
diiki? Na' ¿nora ben' li' yel' wṇabia'ni?

³ Na'ch che' Jesúza' legake':

—Lekzka' nad' de to dii inabid' le', li inashki
nad': ⁴ ¿Noran bsel' Juanna' kwenche bidchoe'
ben' nisa'? ¿AChiozan' bseleene'? ¿Anti ben' yell-
liona'zan bseleene', lla?

⁵ Na'ch wzologake' choe'len ljwellgake' dill',
che'gake':

—¿Nakra ka ye'chone', lla? Shi ye'chone' Chioza'
bseleene', lobe' ine' cho': “¿Berache ki wyajle'le che',
shka'?” ⁶ Na' shi yize'chone' nozə ben' bseleene',
yog' ben'ki wlligake' cho' yaj witgake' cho', la'
yog'gake' chajle'gake' Juanna' bi'e dill' daa goll
Chioza'ne'.

⁷ Na'ch gollgake' Jesúza':

—Bi nezinto' no bsel' beena'.

⁸ Na'ch che' Jesúza' legake':

—Lekzka' nad' aga wnia' le' noran ben nad' yel' wñabia'na' kwenche chon' diiki.

Jempl che wen llin malka'
(Mt. 21:33-44; Mr. 12:1-11)

⁹ Na' Jesúza' bseese to jempl lao ben'ka' lle' na':

—To ben' billee yag uva, na' bene'n lall' na' ben'ka' gap wwian, na' wzee wyaje' ssha gan yoblə.

¹⁰ Na' ka bizi' bilap ben'ka' uvana', xaninna' bselee to wen llin che' kwenche lljelle' ben'ka' nak lall' na'gake' yag uvaka' we'gake'ne' daa chidolee yi-kee. Na' ben'ka' chapgake' yag uvaka' bex'gake'ne' bet wdingake'ne', na'tech bilaggake'ne' to ka' che'.

¹¹ Na'ch bselee sto wen llin che'na'. Na' lekzka' bet wdingake'ne', na' biya dii bengakile'ne', na' bizlaggake'ne' to ka' che'. ¹² Na'ch de wyon shii, bizselee wen llin yoblə, na' lekzka' bengake'ne' bido we'zi, na' bizlaggake'ne'.

¹³ 'Na'ch chaki xan yag uvaka': “¿Nakra ka gona'n? Wsel'shkid' bi' cha'ni, bi'ni le chakid'. Shera shicholə wzenaggake' cheb'.” ¹⁴ Na' ka ble'i ben'ka' chap yag uvaka' xiine'na', na'ch che' ljwelle': “Bi'nin yigaañlem' yell-lioni. Li da witchob' kwenche yigaañlenchon.” ¹⁵ Na' wlej-gake'b' gana' lle' yag uvaka' na' betgake'b'.

Na'ch wñabi Jesúza' ben'ka' chzenag:

—¿Nakra ka chakile goni xan yag uvaka' ben'ka', lla? ¹⁶ Ba nakten shaje' na' lljete' ben'ka' chap yag uva che'na' na' yiyone' yell-lio che'na' lall' na' ben' yoblə.

Na' ka beni ben'ka' wne' ka', na' wntagake':

—¿Bat we' Chioza' latj gak ka'!

¹⁷ Na' bwia Jesúza' legake', chi'e:

—¿Beran zejin Cho'a Xtill' Chioza' gana' na:
 Yaja' daa bi wyoolall' wen yooka',
 leyen'lannan' yaja' daa ba nchejcha yoonaa?
 18 Nottezə ben' lljchaze' lawinna' kwiayee, na' shi
 idakwan ben', axt wshoshjan le'.

*Janabgakile' Jesúza' shi chiyal' chixjgake' daa
 chñab beena' chñabia' Rómana'*
 (Mt. 21:45-46; 22:15-22; Mr. 12:12-17)

19 Na' bxozka' chñabia' na' ben'ka' chli' chsedi
 leya' goklall'gake' gox'gake' Jesúza' ka biyoll golle'
 ka', la' gokbe'gakile' chezgaken' wnie' daa bi
 chajle'gake' che'. Per bllebgake' ben'ka' ndop nllag
 na'. 20 Na'ch bsel'gake' to chop ben' wiwia wiyi,
 na' bentezgake' ka ben' cheenchgayi wzenag che'.
 Per aga do lall'gaken' wyajgake', san kwenchezə
 kwejyelgakile' Jesúzan' na' lljadaogake' xya che'
 lao beena' chñabia' gana' mbani Judeana'. 21 Na'
 wñabgakile'ne':

—Maestro, nezinto' daa no' na' daa chli'o nakan
 dii li, na' aga chwio' nak nak ben', shi nake' ben'
 zakii wa shi bi nake'. Nezinto' chli'o nez li che
 Chioza' kon ka nakan. 22 Wnashki neto': ¿Achiyal'
 chixjcho daa chñab Césara', beena' chñabia', anti bi
 chiyal' chixjchon?

23 Na' gokbe'i Jesúza' aga do lall'gaken'
 wñabgakile'ne', na'ch chi'e:

24—Li wli'shkayi nad' to mech. ¿Nora cho'alawin
 na' no leyin da'n?

Na' che'gake'ne':

—Che Césaran', beena' chñabia' Rómana'.

25 Na'ch chi'e:

—Na'len, li we' Césara' daa naki che', na' lekzka' li
 we' Chioza' daa naki che'.

²⁶ Na' ni shcho'a dill' daa bi'e lao ben'ka' bi gok wchingake'n kwenche gaogake' xya che'. Na' bibangakile' ka golle' legake' na' bibe'gake' llizə.

Wnabgakile' Jesúza' nak gak kat'yiban ben' wetka' (Mt. 22:23-33; Mr. 12:18-27)

²⁷ Ka wde dga, bllin bal saduceoka' lao Jesúza', ben'ka' bi chajle' daa yiban ben' wetka'. Na'ch che'gake' Jesúza':

²⁸ —Maestro, leya' bzej dii Moiséza' nan: shi to ben' byo guete' na' igaan xoolena' wizeb na' kono xiingake' wzoa, ben' bish' ben' weta' chiyal' yikee nool wizeba' kwenche soa xiin dia che dii ben' bisheena'. ²⁹ Ki gok to shii, wzoa gall bish' ben', na' ben' necha' bshagnee, na' wite' na' kono xiine' wzoa. ³⁰ Na' ben' wchopina' bikee noola', na' lekzka' wite' na' kono xiine' wzoa. ³¹ Na' ben' wyonina', lekzka' bizkee noola', na' wizete' na' kono xiine' wzoa. Na' lekzka' ben'ka' zi tap bizkaagake' noola' na' witgake', na' ni to ben'ka' gall bi wzoa xiingake' kon noola'. ³² Na' ka bllin lla lekzka' wit noola'. ³³ Na' kat' yiban ben' wetka', ¿norayen'en' gak ben' che', lla?, la' galltien' wzoalene'.

³⁴ Na'ch che' Jesúza' legake':

—Ben'ka' lle' yell-lioni naa chkaa ljwellgake', na' lekzka' choe' yel' wishagna' che xiine'ka'. ³⁵ San ben'ka' ina Chioza' zak'gake' yiyajgake' gana' zoe' ka yibangake' ladj ben' wetka', aga ka'chan gongake'. La' koch no wshagna' gana' zoa Chioza', ³⁶ ni koch no guet, san soagake' ka zoa anjlka'. Na' gagkake' xiin Chios daa ba bisbane' legake' ladj ben' wetka'. ³⁷ Kwin dii Moiséza' bzeje' kwenche inezicho yiban ben' wetka' kana' bzeje' che yag

yeshaa daa ble'ile' chal'nin. Na' wne' Xancho Chioza' nake' Chios che Abrahama', Isaaca' na' Jacoba'. ³⁸ Na' Chioza' aga nake' Chios che ben' wet, san nake' Chios che ben' de yel' mban cheyin. La' yog'lol' ben' nxenilalii Chioza', dekzə yel' mban chegake'.

³⁹ Na' ch bal' ben'ka' chli' chsedi leya' gollgake'ne': —Maestro, ka ba wneyenoon nakan.

⁴⁰ Na' bich bi biyaxjchgakile' inabchgakile'ne'.

Crístona' nake' xiin dia che dii Davina'
(Mt. 22:41-46; Mr. 12:35-37)

⁴¹ Na' che' Jesúsza' legake':

—¿Berache nazə ben' Crístona' nake' xiin dia che dii Davina'?, ⁴² len kwin dii Davinan' bzeje' lee libr che Sálmoka' gana' na:

Xancho Chioza' golle' Xan'na':

“Wche' kwit' de shli ni

⁴³ shlak wzoa' xni'ona' ben'ka' chakzbani li'.”

⁴⁴ ¿Berache chakzile Crístona' nake' xiin dia che dii Davina', len kwin Davina' golle'ne': “Xan”?”

Jesúza' wne' nan ben'ka' chli' chsedi leya' chongake' mal

(Mt. 23:1-36; Mr. 12:38-40; Lc. 11:37-54)

⁴⁵ Na' shlak chzenag yog' ben'ka' lle' na', Jesúsza' golle' ben'ka' nakgake'ne' txen:

⁴⁶ —Li wsak' bi gonle ka chon ben'ki chli' chsedi leya'. Le chibagakile' gon xe'ka' dii ton, na' cheen-gakile' yog'zə ben' gapgake' legake' balaan ladj lkwe' ben'. Na' gana' chdop chllagcho choe'lwillcho Chioza' chbagakile' kwe'gake' gana' chbe' ben'ka' zakii, na' ka'kzə chongake' ga de yel' waw. ⁴⁷ Na'

lekzka' chkaatezgake' lill nool wizebka', na' chongake' ka chshaljlen Chioza' ssha nlib kwenche gaki beṅ' le wen chongake'. Na' daa chongake' ka', ba nakten ile'gakile' yel' zak'zi' wala'.

21

Daa bzani to nool wizeb, bi'en Chioza'
(Mr. 12:41-44)

¹ Na' ble'i Jesúza' ka chgoo beṅ' wni'aka' mecha' gana' chgoo beṅ' mech che yoodo'na'. ² Na' lekzka' ble'ile' to nool yesh', beṅ' wizeb, wlo'e chop sintabdo'. ³ Na' goll Jesúza' legake':

—Dii li nia' le', la'kzi nool wizebi nake' beṅ' yesh', ba be'che' dii xench aga ka yog'te beṅ'ka'. ⁴ La' yog'gake' choe'gake' daa chichoonan che'ka', na' le', naktie' beṅ' yesh', wlo'e doxen daa nape', la'kzi chyalljile'n.

Jesúza' chi'e wllin to lla kwiayi' yoodo'na'
(Mt. 24:1-2; Mr. 13:1-2)

⁵ Na' bal beṅ'ka' choe'gake' xtil' yoodo'na' ka xochi nak yajka' nongakile'n na' diika' bzani beṅ' be'gake'n yoodo'na'. Na'ch che' Jesúza' legake':

⁶ —Ka nak diiki chwiale naa, wllin lla kwiayi' yogaan, ni sto yaj bich kwia koll' ljwellin.

Diika' gak kat' ba zoa te che yell-lioni
(Mt. 24:3-28; Mr. 13:3-23)

⁷ Na'ch wṅabgakile' Jesúza', che'gake'ne':

—Maestro, ¿batran gak dga ba wno'? ¿Bera ka ile'into' gak kwenche inezinto' nan ba zoa gaoshosh gakan?

⁸ Na'ch che' Jesúza' legake':

—Li wsak' bi we'le latj no siye' le'. La' ben' zan zi ichej gonzgake' ka nad', na' inazgake': “Nadaan Crístona”, na' lezkka' inazgake': “Ba bllin lla kwiayi' yell-lioni.” Bi gonle legake' txen. ⁹ Na' ka yenile chak no wdil wa chtop chshag ljwell ben' kwenche soshiyigake' ben' wnabia'ka', bi illeble. Chonan byen zigaate gak diiki, per aga lii tete che yell-lioni kat' ba chagakan.

¹⁰ Na'ch golle' legake':

—Ganga kwe' wdila' na' til yell kon yell. ¹¹ Na' gak no bedxo' wal, na' gat' wbin, na' biya yillwe' kwe' lo yell-lioni, na' biya dii gak xan yabana' dii wwall wsheban ben'.

¹² 'Na' ka zi gak diiki, gox'gake' le' na' biya dii gongakile' le'. Na' lljwa'gake' le' gana' chdop chllagcho choe'lwil-cho Chioza' na' yiya yiyiljgake' le' na' koogake' le' lillya, na' lljwa'gake' le' lao ben' wnabia' xenka' na' lao ben' wnabia'ka' sto ni cha'. ¹³ Na' kat' gak chele ka', na'chlə gat' latj we'le cho'a xtillaana' lawe'ka'. ¹⁴ Na' bi sezle wneyi naklə inale kat' lljsele lao ben' wnabia'ka', ¹⁵ la' nad'kzan wzajniid' le' nakan inale na' gon' le' yel' sin'na' kwenche ni to ben'ka' chakzbangakile' le' bi sogakile' inagake' bi nakan ka nale. ¹⁶ Na' no xaxna'tezle, no ben' bish'le, no dialla chele, na' no ben' zoalenle wen gongake' le' lo na' ben' wnabia'ka', na' witgake' bal-le. ¹⁷ Na' ax't yog'zə ben' gakzbangakile' le' daa nonlilall'le nad'. ¹⁸ Per li koo yichjle, Chioza' gaklene' le' na' ni tlis'h' yish' yichjlēna' bi kwiayi'. ¹⁹ Na' shi sechale lawi daa yen ile'ile na' bi gakchoplall'le, na'chan gat' to yel' mban chele dii bi te cheyin.

20 'Na' kat' ile'ile nechj soldadka' Jerusalénni, kanan' inezile nan ba zoa kwiayi'n. 21 Na'ch ben'ka' lle' gani mbani Judeani, chiyal' wxonjgake' lljak-wash'gake' do yaa yaoka', na' ben'ka' lle' yelli, chiyal' wxonjgake', na' ben'ka' zej lyixaa, bichoklə yiyedgake' yelli. 22 La' kanan' gon Chioza' yel' zi' che yog'ze' kwenche yillinin doxen ka na Cho'a Xtilleena'. 23 iNyesh'laz wal gak che noolka' noa' na' noolka' chwall' chxop llana' gak diiki! La' dii xen daa yen ile'i ben' Israelki. 24 Balgake' guet lo wdila' na' zi bale' wche'gake' pres yell zit'ka'. Na' ben' zit'ka' wlej wshoshjgake' yell Jerusalénni axt kat'ch illin lla yiyoll yido ka llia bia' gongake'.

Kat'ka' yiyed Jesúza'

(Mt. 24:29-35, 42-44; Mr. 13:24-37)

25 'Na' lo wbillá', lo bewaa na'ch lo beljka' gak dii gonan ka yibani ben'. Na' ben'ka' lle' yell-lioni gakshejlall'gake' na' illebgake' kat' gon niso'dna' sshag wal daa so' kwe'n. 26 Na' axt ichol'-lall' ben' daa chllebgake' kwiayi'lengake' yell-lioni, la' axt yog' diika' llia xan yabana' inibgakan. 27 Na'ch ile'gakile' nad', Ben' Bsel' Chioza' Yell-lioni, zizaa to lo bej kon yel' wak xen na' balaan xen. 28 Na' kat' solo gak diiki, li wtipch lall'le, la' ba zoa gaoshosh yidsla' len'.

29 Na' lekzka' bsees' Jesúza' to jempl chi'e:

—Li wwiakachi yag yixwewa' wa bichlə yag.

30 Kat' chle'ile ba chibia xlaguiinka', chakbe'ile ba zoa yiyoo la'o linna'. 31 Ka'kzə, kat' ile'ile ba chak diiki ba wnia', chiyal' inezile ba zoa gao wli' Chioza' yel' wñabia' che'na'.

³² 'Dii li nia' le', aga ba wit ben'ka' zoa naa kat' gak yog' diiki. ³³ 'Yabana' na' yell-lioni te chegakin, san cho'a xtilaana' aga wde bi gak ka nan.

³⁴ 'Li wsak' bi we'le latj sho' diika' wxinjan yichjlall'do'lena'. Bi wlanzle yel' weezo, na' bi sezle wneyi bi chak chele. Li wsak' kwenche aga sha chel-le chon llana' zizaa. ³⁵ La' tokonganzan gak diiki yen ile'i yog'te ben'ka' lle' doxen yell-lioni. ³⁶ Na' le', li se wneyi, li inabi Chioza' toshiizi gaklene' le' kwenche yilale lao yog' diiki lia bia' gak, na' kwenche bi gall illeble sele lawa'na', nad', Ben' Bsel' Chioza' Yell-lioni.

³⁷ Na' Jesúza' bli' bsedile' ben' yog' lla yoodo'na', na' ka chal, chjagaane' lo Yaa Olivoza'. ³⁸ Na' yog' zil yog' ben' chajgake' yoodo'na' chjazenaggake' daa chli' chsedile'.

22

Wloogake' xnezin witgake' Jesúza'

(Mt. 26:1-5, 14-16; Mr. 14:1-2, 10-11; Jn. 11:45-

53)

¹ Ba zoa gaozə lni Paskwa' kat' chaogake' yetxtil daa bi nchix levadúrana'. ² Na' bxoza' chnabia' len ben'ka' chli' chsedi leya' chiyiljall'gake' naklə gongake' witgake' Jesúza' ka kono gakbe'i, la' bllebgake' shi bi goni ben' wlall che'ka' legake'.

³ Na'ch xan dii xiw'ka' daa le Satanás wyoon loo yichjlall'do' Jud Scariota', beena' nak txen ben'ka' shllin. ⁴ Na' wyaje' lao bxoza' chnabia' len lao ben'ka' ngoo lall' na' ben'ka' chap yoodo'na', na' bi'e dill' nakan gone' Jesúza' lall' na'gake'. ⁵ Na' le bibagakile' na' bchebgake' we'gake'ne' mech.

⁶ Na'ch bchebe' gone'ne' lall' na'gake'. Na' wzolo

chinoe' batan gat' latj kat' kono beṅ' lle' gone' Jesúza' lall' na'gake'.

Lle'na' zeelo wdaolengake' Jesúza'

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Na' bllin llana' chsini'agake' che lṅina', llana' chzolo chaogake' yetxtil daa bi' nchix lewadúrana' na' chitgake' to xil'do', bana' gaogake' lle' Paskwa'.

⁸ Na'ch wlej Jesúza' Pédrona' len Juanna' na' chi'e legake':

—Li lljasini'a daa gaocho lṅi Paskwi.

⁹ Na'ch che'gake'ne':

—¿Garan cheenilo' lljasini'anto'n?

¹⁰ Na' che' Jesúza' legake':

—Ka sho'le Jerusalénna', na' ile'ile to beṅ' byo zino'e to chee nis, na' li lljanoe' axt yoona' gana' yilline'. ¹¹ Na' ye'le xan yoona': “Maestrona' chṅabile' li': ¿Garan zoa yoona' wyoone' gana' gaolene' beṅ'ka' nakgake'ne' txen lle' Paskwi?” ¹² Na' wliile' le' to yoo xen dii llia shkwiana' cha'lə ga ba nonshao'tie'. Nan' wsini'ale daa gaocho xshe'na'.

¹³ Na' wloogake' nez zejgake', na' kon kayeṅ' golle' legake' gok. Na' bsini'agake' daa wdaogake' lle' lṅi Paskwa'.

¹⁴ Na' ka gol' gaogake' xshe'na', Jesúza' wche'lene' postl che'ka' cho'a mesa'. ¹⁵ Na'ch chi'e legake':

—Ba goklall'chga' yeej gaolen' le' lṅi Paskwi naa biṅ' witgake' nad'. ¹⁶ Na' ba nia' le', zeelo naa cheej chaw' dga. Bichga yeej gawa'n axt ki illin llana' wli' Chioza' yeṅ' wṅabia' xen che'na', kana'ch yeej gawa'n dii yoblə.

17 Na' be_xee kopa' na' bi'e Chioza' yel' cho_xken, na' chi'e:

—Li go_x' dga, li yeejan lat' wej. 18 Na' nia' le', bichga yeej' nis uvani a_xt ki illin lla wli' Chioza' yel' w_nabia' xen che'na'.

19 Na'ch be_xee yetxtila' na' bi'e yel' cho_xken Chioza'. Na' b_xoxje'n bi'en le_gake' kwenche wdaogake'n, na' chi'e:

—Dgan kwerp cha'ni, chzanlallidaan ni chele. Kin gonle kwenche lljadinile nad'.

20 Na' le_kzka' bene' ka wde wdaogake' xshe'na', be_xee kopa' sto shii, na'ch chi'e:

—Dga yoll loo kopi zejín xchen'na' daa laljə ni chele daa gonan ka gaki dii koba' b_{ch}eb Chioza' gone'.

21 'Na' naa, beena' gone' nad' lo na' be_n'ka' chakzi'gakile' nad' chi'lene' nad' cho'a mesi. 22 La' ba bllin lla gak ka nak daa llia bia' gak cha', nad', Be_n' Bsel' Chioza' Yell-lioni, per jnyesh'laz gak che beena' gone' nad' lo na' be_n' malka'!

23 Na'ch be_n'ka' nakgake'ne' txen wzologake' ch_nabi ljwellgake' noen' gone'ne' lo na' be_n'ka'.

Gokgued be_n'ka' nak Jesúza' txen nogaken' zak'chi

24 Na' le_kzka' chakdil-len ljwellgake' nogaken' nak be_n' zak'chi. 25 Na' che' Jesúza' le_gake':

—Zoa be_n' w_nabia' to to nación, na' chongake' byen chzenag be_n' che_gake', na' nagake' che kwingake' le chaklengake' be_n'. 26 San le', bi chiyal' gonle ka'. Shi nole nakle be_n' zakii, chiyal' w_{ch}ek' yichjle ka to bi' xkwid', na' shi nole ch_nabia', chiyal' gonle ka nottezə be_n' wen mandad. 27 ¿Noran nak be_n' zak'chi?, ¿abeena'

chbe' cho'a mesa' chawe'?, ¿anti beena' chon mandadan', lla? Beena' chi' cho'a mesan' nake' ben' zak'chi. San nad', la'kzi naktia' xanle, zoa' ladjleni ka to ben' wen mandad chele.

²⁸ 'Le' ba wzoalenle nad' lao yog'te daa ba gok cha'. ²⁹ Na' daan, gon' le' ye'l' wñabia'na' ka daa ben Xa'na' nad'. ³⁰ Na' yeej gaolenle nad' gana' inabi'a. Na' kwe'le gana' inabia'le yizi'le kwent che shllin kwen ben'ka' nak xiin dia che dii Israela'.

Jesúza' wne' bi wcheb Pédróna' shi nombi'ene'
(Mt. 26:31-35; Mr. 14:27-31; Jn. 13:36-38)

³¹ Na' lezkza' golle' Simón Pédróna':

—Simón, Simón, Satanáza', daa chñabia' dii xiw'ka', ba wñaban le' gagle lo na'yin kwenche gondinj gonganin le'. ³² Na' nad' ba wñabid' Chioza' gaklene' li', Simón, kwenche gonlilall'cho nad'. Na' kat' ba biyajilo' cheyi daa gono', na' gakleno' ben'ki nako' txen kwenche soachehgake' gonlilall'gake' nad'.

³³ Na' che' Simónna':

—Xan', ba nchoglallaa laa lillyana' sa'len' li' wa axt guetlen' li' txen.

³⁴ Na' che' Jesúza':

—Pedro, nia' li', naanlle' shon shii bi wchebo' shi nombi'o nad' ka zi' kwell shikwteza'.

Ba zoa gaoz wtil Jesúza' daa gak che'

³⁵ Na'ch che' Jesúza' legake':

—¿Azyalljile bi byalljile kana' bselaa le' na' bibi bex'le, ni ga koo xalaanle, ni mech na' ni xel-le?

Na' che'gake':

—Bibi byalljinto'.

³⁶ Na'ch golle':

—Per naach nia' le', shi de ga chgoo xalaanle, li goxaan, na' shi de xmechle, li wa'n; na' shi nole bi de spad chele, li lljayet' xalena' na' li si' tlisha'n. ³⁷ Nia' le', chonan byen gak cha' kon ka na Cho'a Xtill' Chioza' gana' na: “Gongakile'ne' ka chongakile' to ben' wen dii mal.”

³⁸ Na' che'gake':

—Xan', ni napnto' chop spad.

Na' chi'e:

—Lliz li soachoklə.

Be'lwill Jesúza' Chioza' gana' le Getsemani'

(Mt. 26:36-46; Mr. 14:32-42)

³⁹ Na'ch biza' Jesúza', na' kon ka yooloe' chone' biyaje' lo Yaa Olívoza', na' zjano ben'ka' nakgake'ne' txen. ⁴⁰ Na' ka bllingake' latja', na' chi'e legake':

—Li we'lwill Chioza' kwenche bi we'zle latj gon beli chenna' le' gan.

⁴¹ Na' bkwase' kwite'ka', ka to ga zeelo chllin to yaj dii chzal'cho, na'ch bchek' xibe'na' be'lwille' Chioza'. ⁴² Na' golle':

—Xa, shi li' cheenilo', bislagach nad' lawi dga ba zoa idil illag'; per aga gak ka cheenid', san gak ka cheenilo'.

⁴³ Na'ch bli'lao to anjl ben' za' yabana' le', na' biyo'ene' fuerz. ⁴⁴ Na' daa le chakyesh'chgaile', zizikli be'lwillche' Chioza' axt biyaklolje'. Na' nis yes che'na' daa chxop lo yona' nakan ka to bllon wej chen.

⁴⁵ Biyoll be'lwille' Chioza', na' bizollee biyaje' gana' lle' ben'ka' nakgake'ne' txen, na' ka billine' kwite'ka' ba chesgake' daa chakyesh'gakile'. ⁴⁶ Na' chi'e legake':

—¿Berache cheszle? Li chas na' li we'lwill Chioza' kwenche bi we'zle latj gon beli chenna' le' gan.

Bex'gake' Jesúza'

(Mt. 26:47-56; Mr. 14:43-50; Jn. 18:2-11)

⁴⁷ Ni choe'te Jesúza' dill', ka bllin ben' zan, na' beena' le Jud, beena' nak txen ben'ka' shllin, nchi'e legake'. Na' ka blline' jabiguee kwit Jesúza' na' bnopo' xagueena'. ⁴⁸ Na'ch che' Jesúza'ne':

—Jud, ¿akon dga bnopo' nad' chono' nad', Ben' Bsel' Chioza' Yell-lioni, lo na' ben'ki?

⁴⁹ Na' ben'ka' lle'len Jesúza', ka ble'gakile' ka ba chak che', na'ch gollgake'ne':

—Xan', ¿awniayinto' spadki?

⁵⁰ Na' toe' lii wdintie'n to mos che bxo'z choo bxo'z xenna' bchogtie' nague' de shlina'. ⁵¹ Na' che' Jesúza':

—Bich bi gonile ben'ka'.

Na'ch bida' Jesúza' nag beena'. ⁵² Na' daa bllin bxo'zka' chnabia' len ben'ka' chap yoodo'na', na' ben' golka' chnabia', kwenche gox'gake'ne', chi'e legake':

—¿Berache za'zle nox'le yag na' spad kwenche zidnizle nad' ka to no ben' wban? ⁵³ Yog' lla wzoa' ladjlena' yoodo'na' na' bi bex'le nad'. Per naach bllin lla gonle ka cheenile na' naayen' chnabia' dii mala' daa chnabia' gana' shgasj shchol.

Bi bcheb Pédrona' shi nombi'e Jesúza'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Na'ch bnizgake' Jesúza' na' bche'gake'ne' lill bxo'z choo bxo'z xenna', na' zit' zit'lə zjano Pédrona'ne'. ⁵⁵ Na' bxengake' yi'na' lesh' chyoo

che b̄xoz choo b̄xoz xenna' na' wche'gake' cho'a yi'na', na' wlen Pédrona' legake'. ⁵⁶ Na' to noolə wen mandad, ka ble'ile' chi' Pédrona' cho'a yi'na', lii wzetie' chwie'ne', na' chi'e:

—Lekzka' len beenin nake' Jesúza' txen.

⁵⁷ Na' Pédrona' aga b̄chebe', na' chi'ene':

—Noolə, aga nombi'a beena'.

⁵⁸ Na' gokzə xtit bizle'i ben' yoblə Pédrona' na' chizi'ene':

—Lekzka' lenon' nako' ben'ka' txen.

Na' Pédrona' chi'ene':

—Bi len' nak' ben'ka' txen.

⁵⁹ Na' wizak ka do zi' tgor na' wize' sto ben' yoblə:

—Dii likzan len beeni nake' txen Jesúza' la' lekzka' ben' Galilean.

⁶⁰ Na'ch che' Pédrona'ne':

—iNi bi nezid' bi dillaan choo!

Na' ni che'telə Pédrona' ka', ka wchell to shikwtez. ⁶¹ Na'ch biyechj Xancho Jesúza' bwie' Pédrona', na' Pédrona' jadinile' daa golle'ne', kana' chi'e: “Naanlle' shon shii bi wchebo' shi nombi'o nad' ka zi' kwell shikwteza'.” ⁶² Na' bichej Pédrona' gana' lle' ben'ka' na' wchellyeshee.

Btitgakile' Jesúza'

(Mt. 26:67-68; Mr. 14:65)

⁶³ Na'ch ben'ka' chapgake' Jesúza' btitgakile'ne' na' wdap' wlall'gake'ne'. ⁶⁴ Na' bsejgake' jalawe'na', na'ch wlall'gake'ne', che'gake'ne':

—iWnashki non wlall' li'!

⁶⁵ Na' biya dii gollgake'ne' kwenche'gakile' zi'.

Wde Jesúza' lao ben'ka' ch̄n̄n̄abia'gake' ben' Israelka'
(Mt. 26:59-66; Mr. 14:55-64; Jn. 18:19-24)

66 Na' ka wyeeni', bidop ben'ka' chñabia' ben' Israelka', len bñozka' chñabia' na' ben'ka' chli' chsedi leya'. Na' bdegake' Jesúza' lawe'ka'. Na'ch wñabgakile'ne', che'gake':

67 —Wnashki neto' shi li'kzan Crístona', beena' chbeznto'.

Na' che' Jesúza':

—Shi inia' le': “Awe, nadaan”, aga wyajle'le cha'.

68 Na' shi inabid' le' bi dii inabid' le', aga williilen na' ni bi yisanle nad', shi naa. 69 Na' ñaate, nad', Ben' Bsel' Chioza' Yell-lioni, kwi'a kwit de shli che Chioza', beena' nap yel' wak xenna'.

70 Na'ch yog'ze' wñabgakile'ne':

—¿Ana' lin' nako' Xiin Chioza'?

Na'ch che' Jesúza':

—Awe, shlikzan ba wnale.

71 Na'ch che' ljwellgake':

—Kochno chyalljicho gawe' xya che beeni. Kwintekzcho ba benicho ka ba wne'.

23

Wde Jesúza' lao Pilátona'

(Mt. 27:1-2, 11-14; Mr. 15:1-5; Jn. 18:28-38)

1 Na'ch yog'loł ben'ka' bizolla'gake' na' jwa'gake' Jesúza' lao Pilátona'. 2 Na'ch wzologake' chaogake' xya che Jesúza', che'gake':

—Ba bidolinto' beeni chta chnie' ben' wlall chento'ka'. Chi'e bi chiyal' chixjcho daa chñab Césara', beena' chñabia', na' lezkza' naze' nake' Crístona', na' daa ne' ka' zejín nake' to ben' wñabia'.

3 Na'ch wñabi Pilátona' Jesúza', chi'ene':

—¿Alin' nako' ben' wñabia' che ben' Israelki?

Na'ch che' Jesúza'ne':

—Kan' nakan.

⁴ Na'ch che' Pilátona' b̄xozka' ch̄nabia' na' yog' beñ'ka' lle' na':

—Ni to dii mal bi chillelid' chon beeni.

⁵ Na' zizikchli che'gake':

—Diika' chli' chsedile' chta ch̄nen yog'lol beñ' lle' doxen lallnto'ni. Wzoloze' Galileana', na' axt Judeani ba bide'.

Bde Pilátona' Jesúza' lao Heródeza'

⁶ Ka gollgake' Pilátona' ka', na'ch w̄nabile' legake' shi nak Jesúza' beñ' Galilea. ⁷ Na' ka w̄nezile' nake' beñ' Galilea, na'ch b̄die'ne' lao Heródeza', beena' n̄lane' ch̄nabi'e Galileana', la' kana'yen' zoa Heródeza' Jerusalénna'. ⁸ Na' le bibayi Heródeza' ka ble'ile' Jesúza', la' ba wlla cheenile' ile'ile'ne' daa ba benile' choe' beñ' xtilleena'. Na' goki Heródeza' ile'ile' gone' to yel' wak. ⁹ Na' biya dii w̄nabile' Jesúza', na' ni to daa w̄nabile'ne' bi billi'e. ¹⁰ Na' lekzka' na' lle' b̄xozka' ch̄nabia' len beñ'ka' chli' chsedi leya', na' zizikli chaogake' xya che Jesúza'. ¹¹ Na'ch Heródeza' len soldad che'ka' biya dii bengakile'ne', na' b̄titjgakile'ne' bwakw-gake'ne' to lech' ka daa chakw to beñ' w̄nabia'. Na'tech bizsel' Heródeza'ne' lao Pilátona'. ¹² Na' lo llana' bizoalen Pilátona' Heródeza' wen, la' kana'te chakzbani ljwelle'.

B̄choglogake' guet Jesúza'

(Mt. 27:15-26; Mr. 15:6-15; Jn. 18:39–19:16)

¹³ Na'ch biti'a Pilátona' b̄xozka' ch̄nabia', na' beñ'ka' ch̄nabia'gake' beñ' Israelka' na'ch beñ' yell, ¹⁴ na' golle' legake':

—Le' bidwa'le beeni lawii, nale chta ch̄nie' beñ', na' nad' ba w̄nabidee laoleni, na' bi chillelid' ni to

daa nale che' shi li ka chone'n. ¹⁵ Na' ni Heródeza' bi billelile' shi bi dol' nap beeni, na' ba bizseleene' laochoni. Na' ba ble'teile aga bi bene' inacho wchoglozcho guete'. ¹⁶ Na' naa gon' mandad wit chingake'ne' na'tech yisane.

¹⁷ Na' ka chakz yog' yiz, chiya' yisane' to beena' nej lillyana' kat' chal' lni Paskwa'. ¹⁸ Na' yog' ben'ka' ndop nllag na', wzologake' chosyaagake', che'gake':

—¡Guettega beeni! ¡Na' bisan Barrabáza'!

¹⁹ Nyixjgake' Barrabáza' lillyana' daa bxie' wdila' yell Jerusalénna', na' bettie' to ben'. ²⁰ Na' daa cheeni Pilátona' yisane' Jesúsza', na' stokzə wnable' ben'ka' shi wisane'ne'. ²¹ Na' ben'ka' zizikchli chosyaagake', che'gake':

—¡Bdee lee yag cruza'! ¡Bdee lee yag cruza'!

²² Na' de wyon shiyi che' Pilátona' legake':

—¿Bera dii malan' nezile ba ben beeni, lla? Bi chillelid' ni to dii mal dii ba bene' kwenche guete'. Gonch' mandad wit chingake'ne' na'tech yisane.

²³ Na' ben'ka' wzeyidgake' chosyaagake' chnabgakile'ne' wdeene' lee yag cruza'. Na' daa wzeyidgake' chosyaagake', bengake' gan wzoa xtilleeka'. ²⁴ Na' bchoglall' Pilátona' gone' ka cheeni ben'ka'. ²⁵ Na' bisane' beena' wnable'gake', beena' de lillyana' daa bxie' wdila' na' daa bettie' to ben'. Na' bene' Jesúsza' lo na'gake' kwenche gongakile'ne' ka chaklall'gake'.

Bda'gake' Jesúsza' lee yag cruza'

(Mt. 27:32-44; Mr. 15:22-32; Jn. 19:17-27)

²⁶ Na' ka nche'gake' Jesúsza' lljada'gake'ne' lee yag cruza', billaggake' to ben' Cirene lie' Simón zizee

lyixaa. Na' beḡ'gake'ne' bwa'gake'ne' yag cruz che Jesúza' na'ch janoe'ne'.

²⁷ Na' beṅ' zan zjanogake'ne', na' zan noolka' chbellgake' na' chosyaagake' ni che Jesúza'. ²⁸ Na' biyečhj Jesúza' bwie' legake' na' golle':

—Le' nool Jerusalén, bi kwellzle čha'; li kwell che kwinle na' che xiṅleka'. ²⁹ La' wllin lla kat' ina ben': “Chakomba nool willka', beṅ'ka' bi wxan na' bi bwall bḡopgake'.” ³⁰ Na'ch beṅ'ka' zoa llana' gak ka', solo inagake': “Shel' iyinjtega yaa yaoki idakwtegan neto'.” ³¹ Shi yag yaa yag banna' chongakile'n kon daa nazan čhegake', ¿alechla ki gongakile' yag billa'?

³² Na' lekzka' nche'gake' chop beṅ' wen dii mal kwenche witgake' legake' txen len Jesúza'. ³³ Na' ka bllingake' latja' gana' le Llit Yichj Beṅ' Wet, bda'gake' Jesúza' lee yag cruza'. Na' lekzka' bda'gake' chopte beṅ' wen dii malka' shlaa wej kwite'na'. ³⁴ Na' ka chda'gake' Jesúza' lee yag cruza', chi'e:

—Xa, wxi'xen čhegake', la' aga nezgakile' bin chongake'.

Na' soldadka' bengake' to wyitj kwenche wnezgakile' nogake' yidol' xe'na'. ³⁵ Na' lle' beṅ' zan chwiagake', na' axt beṅ'ka' chṅabia'gake' beṅ' Israelka' btitjgakile'ne', nagake':

—Gok bisle' beṅ' yoblə, na' naa yislashki kwine' shi leile' len' Crístona', beena' ba wlej Chioza'.

³⁶ Na' lekzka' soldadka' btitjgakilene', na' jabig'gake' kwit yag cruza' gana' nda'gake'ne' na' bshabgakile'ne' to vino dii nak zichj zla'. ³⁷ Na' che'gake'ne':

—Shi lin' nako' beṅ' wṅabia' che beṅ' Israelki, bislashki kwino'.

³⁸ Na' yichj yag cruz che'na' bda'gake' to dii cho'en dill' biḥe nda'gake'ne' lee yag cruza', nan: “Beenin beṅ' wṅabia' che beṅ' Israelka'.” Bzej-gake'n dill' griego, dill' latín na' dill' hebreo.

³⁹ Na' to beṅ' wen dii mala', beena' da' kwit Jesúza', biya dii golle'ne', chi'ene':

—Shi lin' Crístona', Beena' Bsel' Chioza' inabia', bislashki kwino' na' lekzka' bisla neto'.

⁴⁰ Na' beena' sto bsheshlene'ne', chi'e:

—¿Abikzə chall chlleblatoo Chioza'?, len kon ka chak chen' ba chak cho'. ⁴¹ Cho', ka chiyal'kz gak chechon' kwenche chixjcho che dii mala' daa bencho; san beeni aga bi dii mal bene'.

⁴² Na'ch golle' Jesúza':

—Jesús, ljadingachilo' nad' kat'ka' solo inabi'o.

⁴³ Na'ch che' Jesúza'ne':

—Dii li nia' li', naanlla soaleno' nad' latja' gana' nak mbalaz.

Wit Jesúza'

(Mt. 27:45-56; Mr. 15:33-41; Jn. 19:28-30)

⁴⁴ Na' do ka gobill biḥoḷ doxen yell-liona', blinte do ka chida shon, ⁴⁵ daa bich bzeeni' wbilla'. Na' lechaa ze loo yoodo'na' bllon' gokan chop laalə. ⁴⁶ Na'ch besyaa Jesúza' zilljə, chi'e:

—Xa, chiyon' bishbe cha'ni lall' noo.

Na' biyoll golle' ka' na'ch wite'.

⁴⁷ Na' ka ble'i beena' chṅabia' soldadka' diika' gok, be'lawee Chioza', chi'e:

—Dii li beeni nake' dowalj beṅ' wen.

⁴⁸ Na' yog' beṅ'ka' lle' na', ka ble'gakile' ka gok, ziyajgake' chball'gake' cho'alcho'eka'. ⁴⁹ Na'

yog' ben'ka' nombia'gake' Jesúza', do noolka' za'lengake'ne' axt Galileana', wzegake' zit'lə chwiagake' ka gok.

Bkwash'gake' Jesúza'

(Mt. 27:57-61; Mr. 15:42-47; Jn. 19:38-42)

⁵⁰ Wzoa to ben' wlie' José, ben' yell Arimatea, daa mbani Judéana'. Na' Joséna' nake' txen ben'ka' chñabia' ben' Israelka'. Nake' to ben' wen na' to ben' chon ka cheeni Chioza', ⁵¹ na' zoe' chbeze' wsel' Chioza' beena' inabia'. Na' Joséna' aga wyoolallee ka ben ben'ka' chñabia'lene' daa betgake' Jesúza', na' bi benlene' legake' txen. ⁵² Na'ch wyaje' lao Pilátona' na' wnabe' lsens yiletje' kw-erp che Jesúza'. ⁵³ Na' biletje'ne' lee yag cruza', na'ch bitobe'ne' to lech' xen na' jlo'ene' to loo blej daa benschawee, ga bin' wkash'gake' ni tlish' ben' wet. ⁵⁴ Na' llana' gok diiki nakan lla chsini'a ben' Israelka' chegake' kwenche bibi llin gongake' lla sabda', llana' chombaangake', na' zi lat'zə chyallj solo llana' chombaangake'.

⁵⁵ Na' noolka' za'lengake' Jesúza' axt Galileana', wyajgake' jawiagake' bleja' na' jale'gakile' nak wdixjgake' kwerp che'na'. ⁵⁶ Na'ch biza'gake', na' ka billingake' gana' zoagake', benschao'gake' daa chla' zix. Na' bizi'lall'gake' lla sabda' kon ka na leya'.

24

Biban Jesúza' ladj ben' wetka'

(Mt. 28:1-10; Mr. 16:1-8; Jn. 20:1-10)

¹ Na' lla necha' chizolo xmanna', wizaj noolka' ni bal cho'a bana', nox'gake' diika' chla' zix daa

benshao'gake', na' wyaj zi bał noolə yoblə kon legake'. ² Na' ble'gakile' aga chi'ch yaja' cho'a bana'. ³ Na' wyoogake' loo bleja', na' ble'gakile' aga bich bi kwerp che Xancho Jesúsza' de na'. ⁴ Na' shlak chakgakile' bera zejın dga, kat'kzali ble'gakile' chop ben' byo, nakwgake' lech' dii chey cheeni', zegake' kwite'ka'. ⁵ Na' noolka' bllēbchgagake' na' bchek' yichje'ka' axt lo yona'. Na'ch ben'ka' zena' che'gake':

—¿Berache chiyiljzle beena' mban ladj ben' wetki? ⁶ Kochno de ni. Ba bibane' ladj ben' wetki. Li lljadini daa wne' le' kana' zoalene' le' Galileana'. ⁷ Wne' chonan byen Beena' Bsel' Chioza' Yell-lioni gake' lo na' ben' malka', na' witgake'ne' lee yag cruza', na' ka yiyon lla yibane' ladj ben' wetka'.

⁸ Na'ch jadini noolka' daa goll Jesúsza' legake'. ⁹ Na' biza'gake' biyajgake' gana' lle' postlka' shnej len yog' ben'ka' sto gokgake'ne' txen, na' be'gake' dill' yog' daa gok chegake'. ¹⁰ Na' noolkin jayell-gake' postlka' daa gok chegake': María ben' yell Magdálana', Juánana', María xna' Jacóbona', na' len zi bał nool yoblə. ¹¹ Na' postlka' ni lat' bi wyajle'gake' daa goll noolka' legake' daa gokgakile' bizan chon chnagake'.

¹² Na' Pédrona' wzee zejdoe' cho'a bana', na' ka blline', bwie' loo bleja' na' ble'ile' lech'ka' chi'gakan ka'lə. Na'ch bizēe zjade' gana' zoe' chibanile' ka nak daa ba gok.

*Bli'lao Jesúsza' chop ben' tnez Emaúza'
(Mr. 16:12-13)*

¹³ Na' lo llana' gok ka', chop ben'ka' nak Jesúsza' txen wyajgake' to yell dii le Emaús, na' nlaa ljwellin

ka do shnej kilometro kon Jerusalénna'. ¹⁴ Na' lo zej ngoogake' nez choe'gake' dill' çheyi diika' ba gok. ¹⁵ Na' shlak choe'gake' dill' çheyi diika' gok, na' jabig' kwin Jesúza' kwite'ka' na' zejlene' legake' txen. ¹⁶ Na' la'kzi chwiagake'ne', aga gokbe'gakile' no beena'. ¹⁷ Na'ch wñabi Jesúza' legake':

—¿Bera dillaan choe'le za'le ni? ¿Berache chakyesh'zile?

¹⁸ Na' toe', beena' le Cleofas, chi'ene':

—Yog'zə beñ' nezgakile' daa ba gok Jerusalénna' llaki ba wde. ¿Astozo' li' bi nezero' daa ba gok?

¹⁹ Na'ch chi'e legake':

—¿Beran gok?

Na'ch che'gake':

—Diika' gok che Jesús, beñ' Nazareta'. Goke' to beñ' wdixjee daa che' Chioza'ne', na' bene' yel' wak na' bi'e dill' zakii dii nak shli lao Chioza' na' lao beñ'. ²⁰ Na' bñozka' chñabia' na' beñ'ka' chñabia'gake' cho' beñ' Israel bengake'ne' lo na' joschiska' kwenche bñhoglogake' che' guete', na' bda'gake'ne' lee yag cruza'. ²¹ Neto' nonnto' lez nan len' yibeje' cho' beñ' Israel lo na' beñ' zit'ka'. Na' ba gok shon lla gok diiki. ²² Na' bal' noolka' nak neto' txen wyajgake' cho'a bana' daa baabali, na' le bibaninto' ka wnagake' ²³ bich ble'gakile' kwerp che'na' gana' bkwash'gake'ne'. Na'ch bila'gake' nagake' ble'gakile' chop anjl, beñ' goll legake' mbankzə Jesúza'. ²⁴ Na'ch wyaj bal' beñ' byoka' nonlennto' txen cho'a bleja', na' nakan kon ka wna noolka', per aga no Jesúza' ble'gakile'.

²⁵ Na'ch che' Jesúza' legake':

—¡Le' beñ' bi chajni! ¡Bi llabia' bat shajle'le daa bzej dii beñ'ka' wdixjee daa goll Chioza' legake'!

26 ¿Abi nezile lliakzə bia' biya daa yen ile'i beena' nak Crístona' ka zi' yiyo'e gana' sho'e balaan xenna'?

27 Na'ch wzoloe' chzajniile' legake' Cho'a Xtill' Chioza' gana' cho'en dill' che kwine', wzoloe' zigate kon daa bzej dii Moiséza', na'tech diika' bzej yog' ben'ka' wdixjee daa goll Chioza' legake'.

28 Na' ka bllingake' yella' gana' zejgake', bentezə Jesúza' ka ben' shaj gan yoblə. 29 Na' ben'ka' benggake' byen yigaanlene' legake', che'gake'ne':

—Bigaanlen neto', la' ba wlle' naa, na' ba chal.

Na'ch wyoo Jesúza' bigaanlene' legake'. 30 Na' ka ba chi'gake' cho'a mesa', bexee to yetxtil na' bi'e yel' choxken Chioza', na'tech bxoxje'n na' bi'en legake'. 31 Na'ch biyombia'yen'gake' nan len' Jesúza', na' to binitloze'. 32 Na'ch che' ljwelle':

—jBera daan, axt mbalaz inleeb chibayi lall'do'chona' kana' za'cho tneza' choe'lene' cho' dill' chzajniile' cho' Cho'a Xtill' Chioza'!

33 Na'ch lii biza'tegake' ziyajgake' Jerusalénna'. Na' ka billingake', ndop nllag postlka' shnej na' nochlə ben'ka' nakgake'ne' txen, 34 na' gollgake' legake':

—Dii likzan ba biban Xanchona' ladj ben' wetka'. Ba bli'lawe' Simónni.

35 Na'ch ben'ka' chop gollgake' legake' ka gok chegake' tneza', na' ka biyombia'gake' Jesúza' ka bxoxje' yetxtila' bi'en legake'.

*Jali'lao Jesúza' ben'ka' nakgake'ne' txen
(Mt. 28:16-20; Mr. 16:14-18; Jn. 20:19-23)*

36 Na' shlak ni choe'gake' dillaa, tokonganzi jaze Jesúza' ladje'ka' na' bwape' legake' chiox, chi'e legake':

—Soashgale mbalaz.

³⁷ Na' le bllebɡake' daa chakɡakile' yel bχenzan chwiagake'. ³⁸ Na' che' Jesúza' legake':

—¿Berache chllebzle? ¿Biĉhe chak ĉoplall'zle?

³⁹ Li wwia ni'a na'ki kwenĉhe inezile nad'kzan. Li gox' nad' kwenĉhe inezile aga nak' to yel bχen, la' to yel bχen bibi bel' bibi llit yoon ka nak' nad'.

⁴⁰ Na' ka golle' legake' ka', bliile' legake' ni'a neena'. ⁴¹ Na' yel' ĉiba ĉizaki ĉe'ka' na' yel' ĉibanina', ni bi ĉakbe'gakile' shi lekzen'. Na'ĉ ĉi'e legake':

—¿Abi de lat' dii gaoĉo?

⁴² Na'ĉ be'gake'ne' lat' bel' ba bwey'gake' lo yi'na'. ⁴³ Na' beχeeb wdawe'b ĉwiategake'. ⁴⁴ Na' ĉi'e:

—Ka nak daa ba gok ĉa', lennan' wnia' le' kana' ni zoalen' le', kana' wnia' llia bia' yillinin gak ĉa' yog' diika' bzej dii Moiséza', na' diika' bzej dii beŋ'ka' wdixjee daa goll ĉioza' legake' na' diika' da' lee sálmoka'.

⁴⁵ Na'ĉ ben Jesúza' ka wyajni'gakile' diika' na ĉo'a Xtill' ĉioza', ⁴⁶ ĉi'e legake':

—ĉo'a Xtill' ĉioza' nan: ĉonan byen Crístona', biya dii yen ile'ile' na' witgake'ne' na' yiyon lla yibane' ladj beŋ' wetka'. ⁴⁷ Na' lekzka' nan: ides ĉo'a xtilleena' daa nan shi yiyaj yileni beŋ' dii malka' ĉongake' na' yiyakxen ĉegake'. Na' solozan Jerusalénni na' illiljan doxente. ⁴⁸ Na' le' ĉiyal' ye'le beŋ' yog' diiki ba ble'ile gok ĉa'. ⁴⁹ Na' nad' wselaa beena' bĉheb Xa' ĉioza' gone' gaklene' le', na' li soatezə Jerusalénni axt kat'ĉ Xa'na' gone' le' yel' waka' daa za' yabana'.

*Biyep Jesúza' yabana'**(Mr. 16:19-20)*

⁵⁰ Na'ch b̄che' Jesúza' l̄egake' wyajgake' yell Betániana'. Na' bl̄is neena' benl̄eeye' l̄egake'. ⁵¹ Na' ni chonl̄eeytie' l̄egake', ka bikwase' kwite'ka' na' biyep̄e' yabana'. ⁵² Na' ben'ka' nakgake'ne' txen, biyoll be'la'ogake'ne', biza'gake' ziyajgake' Jerusalénna' chiba chizakgakile'. ⁵³ Na' wzoatezi wzoagake' be'la'ogake' Chioza' yoodo'na'.

**Dill' wen dill' Kob Che Jesucristona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
f98bf0c8-4467-559d-82ab-96644a44d38f